

DEVX TRAITEZ

24. 5. 83

NOVVEAUX,
TRES-VTILES
POVR CE TEMPS.

LE PREMIER TOVCHANT
*les Sorciers, auquel ce qui se dispute aujour-
d'huy sur cete matiere, est bien amplement re-
solu & augmenté de deux proces extraicts des
greffes pour l'esclaircissement & confirmation
de cet argument.*

Le second contient vne breue remonstrance sur
les ieux de Cartes & de Dez.

Reueu & augmenté par l'Auteur
M. Lambert Daneau.



PAR IAQVES BAVMET.

1579.

Ex lib. D. de Cardonnel B7.

A. 89518



A MAISTRE FRANÇOIS
DANIEL, LICENTIE^ES

Loix, Bailly des terres & iusti-
ces de S. Benoit sur Loire,

son singulier ami. L.

Daneau, Salut.

T Rescher ami, tu me demandes mon aduis de
quelques poincts: qui pour le iourd'huy sont mis
en dispute entre toutes sortes de gens, sur la matiere
des Sorciers qui courent en France: & pour mieux
peser mon opinion: tu l'as voulue auoir par escrit. Or
pour le lië de la sainte amitié qui est entre nous deux,
dès les premieres lettres & escoles, ie ne te puis rien
desnier. Et combien que i'eusse desiré que quelque
autre de ces bons esprits que nostre aage void & nour
rit, en eust le premier dit & escrit quelque chose: tou
tesfois pour ne te faire attendre trop long temps mon
present, & ne sembler le vouloir faire acheter par lō
gues & assiduelles prieres, ie t'enuoye ce dont tu mas
requis. Te priant, trescher ami, le receuoir d'aussi
bon cœur, comme ie sai que tu m'aimes, & que ie te
le presente aussi. Ie te salue & toute ta famille,
priant Dieu t'acroistre ses graces. Escrit de Gian,
ce 18, de May, 1574.

Celuy qui est entierement tien, & plus
que sien, DANEAV.

LES POINCTS TRAITTEZ
EN CE DIALOGVE
PAR CHAPITRE.

- Chap. 1. Que signifie ce mot de Sorcier, en
nostre Langue François.
2. S'il y a des forciers au monde, & gens tels.
 3. Sur quelles choses les forciers ont puissance.
 4. Par quel moyen les forciers besongnent, &
empoisonnent.
 5. Quels passages & autoritez condamnent
les forciers, & de quelle peine ils sont di-
gnes.
 6. S'il est licite de s'aider des forciers en sa
maladie.
 7. Quel moyen il y a pour se pouuoir garder
des forciers.

5

TABLE DES MATIERES

contenues en ce present liure.

Accointance avec le diable defendue	94.95
Astrologues	21
S. Augustin ne doute des forciers	33.64
Augures	21, & 22
Baston pourquoy donné aux forciers par satan	72
Bestial peut estre empoisonné par les forciers	45.46
Bleds enchantez par les forciers	
Bonne auenture, & ceux qui la disent	22
Brunon abbé	72
Borysthene fleuve	33
Cause pour prouuer qu'il y a des forciers & suyuaus.	38.39.
Champs enchantez par les forciers	47.48.49
Caracteres donnez par satan, autant d'amusement	81.86
Comparoissiance des forciers en leurs synagogues	63.64.
66. & des diuerfes opinions sur cela	62.63.64.65. & la
resolution qu'il en faut faire	64.68
Constantin l'Empereur	93
Corps solides aisément meus par satan	74
Deuins qui appelez en l'Escripture	19
Deuins du temps de Varro	18
sorte de Deuins dont l'Escripture fait mention	19
Deuins & forciers d'où venus premierement	34
Dieu seul nous garde des forciers	99
Empoisonnemens comment se font par les forciers	77
Empoisonnemens des forciers pires que les assassins	101
s'ils Empoisonnent en prison	87
Enchanteurs	22
Enchantemens comme se font	78.79
Enleuement fait par le diable	74.75
Eryges mot d'où tiré	25
Figures donnees par satan aux forciers	60
Figures & huiles sont amusement des forciers	76.77

Figures donnees par satan pour tesmoignage de sa promesse	79
Gian ville	9
Geomances	21
sainct Hierosme a douté des forciers	32
Hommes changez en bestes	53.54
Huiles & graisses pourquoy commandees par satan aux forciers	76
Hydromances	21
Loups garous faits par les forciers	52
Marque des forciers comme se doit conoistre	56
Merueilles quoy	82
Merueilles peuuent estre faites par satan	83
Miracle quoy	81.82
Miracle & merueilles different	82.83
Miracle vray ne peut estre fait par satan	83.84
Miracles vrais faits par les saincts Anges & par les vrais seruiteurs de Dieu	85
Mort doit estre la peine du forcier	90
Nabuchadnezar comment tourné en beste	53.54
Necromantien	21
Numa 2. Roy des Romains enchanteur	80
Paroles n'enchangent ni n'empoisonnent	78.79.80
Peines contre les forciers doyuent estre ordonnees	89.90
Poisons comment se donnent par les forciers	61
Poisons donnez par les forciers par figures	77
Poison des Sorciers sauoir si tous sont à la mort	87
les douze Preux	69
Proces de deux forcieres	103.104, & suyuant.
Puissance des forciers	44.45, & suyuant
Pythonisse	20
Remede contre les forciers & leur empoisonnement	97.98
Romulus 1. roy des Romains enleué par le diable	74
Satan n'est pas tousiours menteur	57
Satan porte les forciers souuent es synagogues	71.72
Satan prend diuerses figures	71
Satan besongne par les forciers s'estant obligé à ce faire	6
Satan	

T A B L E.

7

Satan comment besongne en enforcelant	81.82
s'aider des Sorciers n'est permis	95.96
Secours du diable est à reietter encores qu'on s'en trouue	94.95
bien	46
Serpens peuuent estre charmez par les forciers	60
Serment des forciers à satan	17
le mot de Sorcier dont est pris	18
Sorciers ont esté appelez deuins	23
Sorciers bien anciens	24
Sorciers odieux.	24
Sorciers d'aujourd'huy sont proprement empoisonneurs	24
diaboliques	25
Sorcier tiré d'un mot Gothique	25
Sortiarius & Sortilegus	26
Sorciers appelez de diuers noms en Latin	28.29, & suyuaunts
qu'il y a au monde des Sorciers & par quelle raison cela se	35
prouue	35
Sorciers pourquoy en grand nombre maintenant	34, & 36
Sorciers se trouuent communément en France	36
Sorciers ont esté deuant la natiuité de Iesus Christ	41
Sorciers ne sont pures humeurs melancholiques	42.43
par quelle entree on deuient Sorcier	56
Sorciers pour quelle cause deuiennent tels	57.58
Sorciers sont tous marquez du diable	90.91
Sorciers renoncent premierement Dieu, & se donnent au	91
diable	90.91.92
Sorcier est punissable de mort	100
Sorciers bons & mauuais	101
si Chrestiens peuuent vser de l'aide des Sorciers	
ne hanter les Sorciers	
Sorciers ennemis de Dieu & du genre humain.	

Fin de la Table.

9

DIALOGVE DES SORCIERS OV ERIGES.

Antoine, Theophile.

ANTOINE.



'EST vn cas bien estraſge, Theophile, de ce que quelques vns venās de Paris nous ont rapporté en cete ville, que depuis trois mois en çà, on a deſcouuert vn nombre inſini de Sorciers eſtre eſpandus par la France, le proces deſquels ſe fait tous les iours en la court de Parlement, ſelon qu'ils y ſont amenez de pluſieurs & diuers endroits. Entre leſquels (qui eſt encores plus eſtrange) ſe trouue gens de marque, & de qualité, comme gentilshommes, damoiſelles, gens ſauans & qui ont bruit d'auoir bien eſtudié. Car du ſimple peuple & ignorant comme ſont vigneronſ, laboureurs, bergers, maneuures, & autres de tels meſtiers, tant hommes que femmes, ieunes & vieux, ils diſoyent qu'il eſt tout notoire & certain, que d'iceux ſ'en trouue au-iourd'huy vne infinité de Sorciers.

T. Encores ne diſ-tu pas tout, Antoine: car on nous a raconté, que meſmes gens impotens & aueugles du tout, ſe ſont trouuez de ce nombre: & entre autres vn nommé Honorat, qui a eſté executé en la ville de Paris par arreſt de la court de Parlemēt, & qui eſtoit l'vn des Quinze vingts,

qu'on appelle, duquel on conte choses merueilles. Et quant à moy, ie n'auoy besoin qu'on m'assurast dauantage qu'il y a des Sorciers, comme bien que plusieurs en doutent: car long temps y a, que i'en suis tout certain & resolu. Et l'ay appris premierement par raisons si viues, que celuy qui les voudroit ouyr n'en pourroit plus douter: puis i'ay esté tellement confirmé en cela pour en auoir veu en plusieurs pays, que ie le croy & l'ay creu dés long temps. Ceux qui ont pratiqué non seulement les diuerses prouinces de la France, mais aussi les autres nations du monde, ont veu gens de ce mestier & conueincus, & exécutez, comme entre autres au pays de Sauoye & es environs, les Sorciers y sont si espais, qu'on ne les en peut desnicher, quoy qu'il s'en face vne diligente perquisition, & encores plus rigoureuse iustice, iusques à en auoir brulé en vn an plus de 80. en vne seule ville de cete contree là. Ce qui n'est de merueille, ni nouveau en ce pays-là, veu que Irenæ auteur entier & tresancien escrit au 1. liure contre les Heretiques, que desia de son tēps les femmes de la Sauoye s'en mesloyent fort, & en estoient ordinairement conueincues.

A. Vrayemēt cela est terrible, & m'en esbahi.

T. Ie te diray bien dauantage, quelques vns d'entre'eux ont bien osé dire & se vâter, que s'ils auoyent quelque grand Seigneur pour chef & conducteur, ils se trouuoient bien en si grand nombre maintenāt, & si puissans, qu'ils oseroyēt faire

faire la guerre contre vn roy : & le veincroyent aussi bien aujourd'huy, que les Huns anciennement desirent par mesme art de forcellerie, Sigibert roy de Soissons, du regne de Chilperic roy de France, comme le recite Gregoire historien de France, & euesque de Tours, au 4. liure de son histoire Latine, chap. 29: & comme les Bulgares desirent premieremēt l'armee de l'Empereur de Constantinoble nommé Anastase en Illyrie, comme escrit Zonare au tome 3. de ses Annales.

A. Si est-ce toutesfois que plusieurs personnes ne peuuent croire qu'il y ait des Sorciers, & moins encores qu'on puisse enforceller vn homme ou vne beste: mais croient que tout ce qu'on en dit, est vne pure fable & moquerie, où il n'y a ne raison, ni fondement.

T. Je le say bien, & me souuient qu'il y a quelque temps qu'un certain Sorcier fut pris, conueincu & cōdamné à mort, apres meure de liberation, en la ville de Gian, où pour lors i'estoye, qui en apella à la court de parlement à Paris: laquelle en fit si peu de conte, que par maniere de dire, elle ne daigna regarder son proces: ainst tenoit pour lors toute cete accusation pour friuole, & chose incroyable, ou plustost impossible: lequel Sorcier continuant en son mal, a esté depuis pendu en la ville de Gian, pour auoir esté derechef surpris & cōueincu de ce mesme crime.

A. Comment donc, Theophile, tu crois qu'il y peut auoir des Sorciers, & qu'on peut enforcel-

ler soit homme, soit beste, par art & moyen du diable, & en la façon dont ceux qui se disent Sorciers, confessent vser.

T. A la verité, Antoine, ie le croy, & nete l'eusse dit du commencement, si ie n'en eusse rien creu: & quand tu auras entendu mes raisons, tu seras toy-mesme paraenture de mon opinion.

A. Mais es-tu maintenant de loisir pour me les discourir, si ie les vouloye sauoir?

T. Ouy: & mesme pour te resoudre sur plusieurs questions qu'on fait ordinairement en cette dispute, pour mieux esclaircir la matiere.

A. Je suis bien contant de t'escouter, & de communiquer avec toy de ce poinct: seulement trouue bon que ie t'interrogue, & ayes la patience de m'attendre, & de ne parler sinon au pris, & de ce que ie te demanderay.

T. Je le veux bien.

A. Je suis dautant plus aise de sauoir ce que tu m'en voudras apprendre, comme ie voy qu'aujourd'huy c'est vne question dont toutes sortes de gens disputent, & ou l'un en parle d'une sorte, l'autre de l'autre selon son opinion, & fantasie, sans auoir quelque fois grande raison de son aduis: & que pour n'estre resolu de ceci, ie pourrois tomber en erreur, qui me feroit de consequence.

T. Tu dis vray: car moy mesme ay veu quelques vns si douteux en ceci, que dans vn mesme iour ie les ay veu changer d'aduis, & defendre apres disner le contraire de ce qu'ils auoyent soustenu

stenue le matin : les autres, si opiniaftres, qu'on ne leur pouuoit persuader ce que difoyent tefmoins irreprochables, & l'accusé mefme volontairement confessoit estre vray, mefmemment y persistoit : tellemēt qu'il est tresneceffaire d'en auoir vn bon aduis & certain.

A. Ie te veux dōc ouyr, encore que ceux qui font venus de Paris nous ont aussi dit, qu'vn certain Iesuite Hespagnol nommé Maledonato, hōme de mauuais & malheureux nom & augure, en a disputé si long temps, que tous se faschoyent d'ouyr tant parler de la nature des diables, ayant pris son theme, & mis son affiché en ces termes, *De Demonibus* : c'est à dire des Demons, ou des Diables.

T. Quant à moy, Antoine mon ami, ie te proteste ne vouloir parler avec toy de ceci, pour t'ouurir l'appetit à vne curiosité laquelle ie condamne, comme mere d'vne vraye folie : & comme il est escrit aux Prouerbes chap. 18. vers. 2. Le fol ne prend point plaisir à prudence, sinon lors qu'il manifeste les sotises de son cœur : mais seulement pour obuier & remedier à l'erreur dont plusieurs sont desia gagez, ne croyans point qu'aucun puisse estre enforcelé : & pource, portent faueur aux Sorciers, faisans conscience de les condamner, quoy que lefdits Sorciers soyent conueincus d'auoir empoisonné & tué plusieurs par moyen & façon diabolique, & subtile. Partāt sans la necessité du temps qui le requiert, ie ne

t'en voudroye dire vn seul mot, sachât qu'il nous faut, à l'imitation des premiers Chrestiens, non seulement delaisser toutes questions & disputes curieuses, mais aussi brusler tous liures oisifs, & inutiles: ce qu'ont fait les Chrestiens, qui estoÿt du temps de S. Paul en Asie la mineur, comme le recite S. Luc Actes 19. vers. 19. Et aussi qu'il y a bien entre les Chrestiens matieres plus necessaires à nostre salut, & plus requises, encores qu'elles ne soyent ne si plaisantes à nostre curiosité, ne si propres pour nous enleuer par dessus les nues, ou pour deualer par delà les enfers.

A. L'enten bien que tu fais conscience d'ouvrir la porte aux personnes adonnees à vanité, plustost qu'à pieté: & qui veulent entendre les discours que tu me veux faire, non pour se fortifier en la crainte de Dieu, s'humilier dauantage sous la main puissante d'iceluy, & admirer avec action de graces, & raiſſement d'esprit la bonté, & misericorde, dont ce bon Pere celeſte vse enuers ceux qu'il cōserue alencontre des embusches du diable, & de ces Sorciers, qui sōt ses vrais ministres: mais qui cherchent seulement vne occasion & vn champ, pour se donner carriere, & voltiger par dessus les barrieres de la foy: estans du nombre de ceux qui doutent tousiours, & qui (comme dit S. Paul 2. Timoth. 3. vers. 7.) cherchent & questionnent à tout propos: & toutesfois iamais ne prennent cest a dire iamais n'apprennent, ni ne comprennent rien pour se resoudre.

T. Tu

T. Tu dis vray, Antoine mon ami: car il n'y a chose pire au monde, que de bailler au fol argument de sa folie, au larron obiet & occasion de desrober, au curieux argument de subtilizer: & encore ie te prieray bien fort, Antoine, que tu m'excuses, si ie ne te fay vn ample discours de tout le gère & estat des diables, de leurs couleurs humeurs, honneurs & negoces particulieres, qu'ils ont entre eux, comme l'ont fait, & le font encores maintenāt ceux qui veulent estre tenus pour les plus subtils, & aigus docteurs Scholastiques. Car de ma part ie veux parler de si horribles & ennemies bestes & creatures, le plus sobrement que ie pourray: & confesse que i'ay si peu d'acointance & de cōmunication avec elles (par la grace de Dieu) que ie ne les cognoy sinō qu'autant qu'il a plu à la sagesse diuine, par sa saincte & sacree Parole, nous en reueler. Que si vn Payen & monstrueux Philosophe Iamblique, si Procle, si vn froid Chrestien Pselle, en ont disputé plus auant que ie ne feray, ie ne suis ialoux de leur gloire, & leur accorderay volontiers la science plus grande de telles matieres: pourueu que Dieu me face la grace de m'employer & profiter en autre conoissance meilleure assauoir en la vraye & solide science de mon salut, qui est de le conoistre seul vray Dieu, & celuy qu'il a enuoyé Iesus Christ: comme il est escrit en S. Iean, chap. 17. vers. 3.

A. Ni moy aussi, Theophile, n'en veux auoir

DIALOGVE

autre conoissance que bien sobre, & t'assure que ie ne me suis iamais gueres pleu à ouir parler, & disputer de telles choses: & n'estoit que les questions ordinaires qu'on en fait maintenant, requierent d'en estre resolu, ie n'en voudroye rien sauoir du tout. Car d'en parler volontiers, avec plaisir, est desia vn commencement d'estre, ou de deuenir Sorcier soy mesme. Resous moy donc, ie te prie, de ce que ie te demanderay, autant que tu en as peu comprendre par ce beau liure de la Parole de Dieu.

T. Je prieray Dieu qu'il m'en face la grace, & me retienne mesme pour ne m'esgarer d'icelle d'autant qu'autrement ce ne seroit qu'une confusion que tout nostre propos: & se vouloir resoudre d'autre part & en autre façon, seroit entrer d'un labyrinthe, en un autre. Qu'ainsi ne soit, sur ce seul poinct, qui est, assauoir si les diables peuuent faire chose miraculeuse, & creer quelque nouveau corps dont ils se seruent, l'Escot est contraire à Thomas d'Acquin, & Occan contraire à l'Escot, & autres aussi contrarient & repugnent à tous ces trois precedés, qui tous trois toutesfois sont sortis d'une mesme escole. Mais demande moy ce que tu voudras.

A. Je te demande en premier lieu, que signifie ce mot de Sorcier, dont nous vsons en nostre linge François, quand nous parlons de ces personnes qui tuent, & empoisonnēt par moyens subtils, & d'une façon diabolique.

LE PREMIER POINCT.

Theophile.

E mot de Sorcier, sans doute est tiré du mot Latin *Sortilegus*, que les Latins ont composé à l'exemple des Grecs. Car comme les Grecs dient *Chrysmologoi*, ceux qui deuinent par les oracles, art & suggestion du diable : aussi les Latins ont nommé *Sortilegi*, ceux qui pour la communication & pact qu'ils ont avec le diable, deuinent les choses futures par quelque sort que ils iettent, comme sont dez, ou vn fastourné. Or de ce mot Latin *Sortilegi*, ou *Sortileges*, nous François, pour auoir la langue courte auons formé & basti ce mot de forciers. les Hebreux n'ont rien de commun pour le mot ni avec les Grecs, ni avec les Latins, ni avec nous: car ils les appellent *Chobarim*, d'autant que telles gens vsent de finesse, & subtilité meschante, pour faire leur mestier. Mais il est tout clair & apparêt, que le mot de Sorcier viêt premieremēt du mot barbare *Sorciaricus* & ce mot barbare *Sorcaricus* du mot latin *Sortilegus*. Et par ainsi ie t'ay dit q̄ le mot François de Sorcier viêt du Latin *Sortilegus*. Or l'une des grandes occasions pour lesquelles les hommes ont prins acointance avec le diable, ç'a esté pour deuiner & auoir la puissance de predire les choses futures, cōme de nostre nature nous sommes curieux & vains & auons les esprits hautains, qui ne se contentēt point de leur mesure & condition, mais nous vou

lons contrefaire la puissance & sagesse de Dieu, qui fait tout, tât les choses presentes, que les passees, & celles qui sont à aduenir. De fait nous voulons entrer en son secret cabinet. Et pourtant le diable se seruant en cela de la mauuaise curiosité & afection des hommes, leur a fait prendre son alliance, les a obligez à foy, s'acordant avec eux, & leur promettant de leur donner ce pouuoir, pourueu qu'eux aussi de leur costé le seruissent, & le reconussent pour leur seul maistre. Par ainsi il est aduenue que la sorte & condition d'hommes, que premierement on a aperceu auoir quelque paction & familiarité avec le diable, a esté les deuins & sortileges : car de tout temps il y a eu de ces beaux deuins au monde, & plusieurs façons de deuiner par art diabolique.

ANT. Comment cela?

THE. Varro homme docte & grand rechercheur de toute antiquité, mōstre que de son tēps il y en auoit desia quatre genres, selon les diuers clemens & moyens, dont Satan enseignoit aux hommes de s'aider. Il y auoit donc la diuination qui se faisoit par le feu, par l'air, par l'eau, & par la terre. Voila que Varro a escrit desia de son temps. Mais les autres en ont obserué depuis 5. especes. L'Escripture sainte en recite manifestement huit sortes diuerfes : cōbien que mesmes elle ne les comprend pas toutes, car il n'y a creature de laquelle on n'ait abusé pour cet effect.

ANT. Qui sont celles, dont parle la sainte escriture?

THE.

THE. Ce sont celles qui sont mentionnees au liure de Deuter. chap. 18. vers. 10. & 11. & au Levitique 23. vers. 23. pour lesquelles t'exposer & declarer, ie ne m'arrestteray à l'ordre auquel elles sont là nommees: mais briuelement ie te les diray le plus clairement que ie pourray, t'ayāt premiere-
ment recité le passage du Deuteron. Nul en toy, dit Dieu, ne sera trouué qui face passer son fils ou sa fille par le feu: ne Magicien vsant d'art magique, n'homme ayant regard au temps & aux oyseaux: ne Sorcier: N'enchanteur qui enchante: n'homme qui demande conseil aux esprits familiers: ne deuins: ne demandant auis aux morts.

A N T. Expose moy ceci.

THE. Sans m'arrestter à la version Françoisē de ce passage, qui n'a peu si distinctement rendre mot pour mot l'Hebrieu: ie t'exposeray ces huit sortes de forciers dōt parle ici Moyse, par quelque ordre prenant les mots Hebrieux. La premiere espece donc est de ceux que l'Escripture nomme *Cofemim*, & les Latins *Diuini*, nous François, Deuins: qui sont ceux qui par la secrette & inuisible communication qu'ils ont avec le diable mesme, predisent quelque chose. Et sont ceux-ci gens fins & cachez, qui semblent plustost vser de l'esprit de Dieu & de grande prudence, pour sauoir ce qu'ils disent, que de se seruir d'un moyen mauuais: parce qu'ils ne font pas semblāt d'auoir pact avec le diable. Car mesmement ce mot de *Cofemim* dōt ils sont appelez, est quelque

fois pris en l'Eſcriture ſaincte en bonne part. La ſeconde eſpece eſt de ceux qu'elle nomme *Aobot* au 18. de Deuteronomie, verſ. 11. les Latins *Pytho-nici*: Et nous François, Hommes qui ont vn diable familier: Ces deuins ici ont vne familiere, viſible & notoire communication avec le diable, & nō cachee cōme les precedēs. Car ils s'en ſeruēt quand ils veulent, cōme iceluy leur eſtāt pour vn temps ſeruiteur obligé & acordé, & meſme demeurant avec eux. Et ſont ainſi appelez *Aobot*, par ce que quand ils parlent par le mouuement de leur eſprit familier, ils parlent creux, & du ventre, comme s'ils parloyent par le trou d'une bouteille: ce qui meſme ſe pratiquoit en Grece, en l'oracle de Delphes d'une façon tresinfame & horrible. Telle eſtoit la femme Pythoniſſe, qui ſembloit faire parler Samuel à Saul ainſi qu'il eſt eſcrit, & comme elle eſt appelee, 1. Samuel 28. verſ. 8. Les autres eſpeces & ſortes de deuinations qui ſuyuent, ont ceci diferend d'avec ces deux premieres, que combien qu'elles ſoyent faites par l'operation du diable, comme les deux precedētes: toutesfois Satan ne parle pas à ceux-ci comme en ſa perſonne, ni bouche à bouche, ainſi qu'il fait aux deux premieres: mais parle à eux ſous le nom d'autrui, ou par des moyens & ſignes interpoſez, & que luy cependāt leur a enſeigne & ordonnez. La troiſieme façon dōc eſt dite en l'Eſcriture, eſtre ceux qui demandent conſeil, & deuinent en faiſant parler les morts, que les Latins appe-

appellent *Necromanti*, nous François, Necromanciens: laquelle espece estoit en vſage du temps de Homere, & en a parlé en l'Odyſſieu. II. C'est biẽ le diable qui parle lors, mais ſous le nom d'un autre, & non pas en ſa propre perſonne, il parla ainſi à Saul. La quatrieme eſt, de ceux qui ſont nommez *Megonin* en Hebrieu: & combiẽ que le mot de *Magi*, pourroit ſembler eſtre tiré de là, ceux ci ſõt plus propremẽt toutesfois, ceux que les Latins appellent *Aſtologi* & *Mathematici*: nous François *Aſtologues*. Ces quatriemes donc ou *Megonin* deuinent les choſes futures, en obſervant les ſituations, conionctions & maiſons des eſtoiles, & planettes, les heures, les natiuites, les ſaiſons, l'air meſme, comme faiſoyent les Augures des Romains, deſcriuans certains lieux en l'air, pour de là deuiner ce qu'on leur demandoit. La cinquieme eſt de ceux qui ſont appelez au 18. chap. de Deut. verſ. 10. *Menacheſin*, en Latin *Magi*, en François Magiciens. Ceux-ci ont appris du diable de deuiner, en faiſant eux-meſmes quelques figures, caracteres, ſignes, tours, vireuoltes & contenâces, en diſant quelques certains mots & paroles ſur quelque choſe à laquelle ils commandent: & eſprouuent leur deuination en vne certaine façon, qui leur a eſté enſeignee par Satã. Tels ſont les Hydromances, Geomances. Telle eſt la maniere de deuiner, en parlant & faiſant quelque choſe ſur vn gobelet, de laquelle maniere il eſt parlé en Genef. 44. verſ. 25, La ſixieme eſt

de ceux qui sont nommez *Idegonim*, en Latin *Arrioli*, en François diseurs de bonne aventure. Ceux-ci par les signes & objets qui leur sont presentez, & qu'ils ne font pas eux-mesmes, promettent de uiner le futur : ce qui est sorti de la mesme escole du diable. Tels sont auiourd'huy les interpretes des songes, chiromances, qui dient la bonne aventure voyât la main de quelqu'un, & ceux qui diés & interpretent la signification des foudres tombées, & autres choses semblables. Tels estoient ceux qui anciennement deuinoient par l'inspection des entrailles des bestes sacrifiées à leurs dieux : item par le chant, boire, ou manger des oiseaux, qu'on nommoit *Extispices*, *Oscines* & d'autres nōs. Ceux-ci tirēt la conoissance de l'auenir par quelque raison, ce semble, art & science. La septieme sorte est de ceux qui sont dits en l'Escripture, Deut. 18. vers. 10. *Mecasephim*, en Latin *Prostigiatores* & *Fascinatores* : en François, Enchanteurs. Ceux-ci par illusions, phantomes & vaines images qu'ils representent aux yeux des hommes les abusent, & semble leur faire voir ou toucher ce qu'ils demandent. Tels ont esté les enchâteurs de Pharaon, nommez aussi de ce mesme mot en Hebrieu, Exode 7. vers. 11. La huitieme & derniere espece mentionnée au lieu prealegué de Deut. 18. vers. 11, sont appelez *Chobarim*, en Latin *Sortilegi* : en François, Sorciers, qui s'assemblent en compagnie les vns avec les autres en leurs synagogues diaboliques, font pact & societé avec
le dia-

le Diable, & par là font infinis malefices. Tu vois donc comme les deuins diaboliques sont bien anciens, en grād nombre, & de plusieurs especes, & que de là les Sorciers que nous appelons au- iourd'huy sont ainsi nommez, & ont pris aussi leur origine.

A N T. Toutesfois il semble que les Latins & nous, ne nous accordions pas en la signification de ce mot de *Sortilegus* & Sorcier. Car quād i'alloye aux petites escoles nostre maistre nous disoit que *Sortilegus* en Latin veut dire vn homme, non qui empoisonne, mais qui par sort pre- dit vne chose future & à aduenir, & qui pour la deuiner vse de quelque espece de sort comme de dez, ou feues, ou pelotes bigarrees qu'ils iettoyēt anciennemēt: ou bien de vers rencōtrez à l'ouuer- ture du liure de quelque poete: comme il nous di- soit mesme cela estre adueni à vn Empereur Ro- main nommé Seuer: qui demandant & cerchāt en Virgile s'il feroit quelque fois Empereur, se rencontra sur ce vers qui est au i.li. de l'Æneide.

Tu Regere Imperio populos, Romane memento.

Souuienne toy Romain, que deffous ton empire

Les Romains regiras: & à ce bien aspire.

Comme l'escrit & recite Lampridius en la vie dudit Empereur Seuer. Mais ceux que nous appelons Sorciers, ne deuinent rien pour la plus part: ains tuent ou empoisonnent seulement: & mesme si quelques vns d'entr'eux deuinent, ils ne deuinent pas en vsant au- iourd'huy du sort,

comme faisoient les sortileges anciens & Latins mais par vne autre maniere, & seulement pour parler & communiquer avec le diable.

THE. Ce que tu dis, Antoine, est vray. Car pour parler proprement de ceux que nous appelons Sorciers, il les faudroit appeler Empoisonneurs diaboliques, ou venefiques: parce qu'ils vsent de venin. Toutesfois dautant qu'ils en vsent par la science, & conoissance que leur en donne le diable, & pour auoir pact & marché acordé avec luy, comme auoyent ceux qui par le sort deuinoient anciennement, le peuple les a confondus ensemble: & a nommé indifferemment Sorciers, tant ceux qui par cest art de sort inuenté du diable deuinoient, que ceux qui par la leçon que le diable leur fait, & par le poison qu'il leur donne, tuent & empoisonnent les hommes: dautant que les vns & les autres ont ceci de commun entr'eux, que ce qu'ils font, ils le font par la suggestion, inuention, & paction faite avec le diable. Ainsi de l'espece & partie plus conue, on a nommé tout le genre de ce malheureux nom de Sorciers. D'auantage il semble aussi que tels empoisonneurs, & venefiques, pour estre rendus plus odieux (cōme aussi & à bon droit ils le doyent estre) ont esté appelez de ce nom de Sorciers: car ils ont esté ainsi nommez apres l'Euangile receu au monde, lors que les deuins & la deuination par art diabolique a esté tenue pour crime extremement execrable entre tous, selō la parole de Dieu. i. Sa.

15. vers. 23. *Car rebellion*, dit Samuel, *est comme le peché des deuins*, c'est à dire, tresenorme & tresgrād. Outre plus, il ne faut ici chercher la propriété de la langue Latine: car ce nom Latin de *Sortilegus*, ou Sorcier, a esté donné & apropié à ces empoisonneurs, du temps que les Gots auoyent desia corrompu la propriété de la langue Latine, & qu'on ne fauoit plus que c'estoit de parler bien & proprement Latin. Or les premiers qui en ont vsc en ceste signification ont esté les Italiens, cōme il se peut aisément voir au liure des Decretales, au titre de *Sortilegis*. Combien que sainct Augustin aussi en vsc quelque part, s'acommodant à la façon de parler desia commune & receuë entre les Chrestiens Latins de son temps. Ceci mesme apert au Decret, au Canon dernier de la cause 33. quest. 1. où ils sont nommez *Sortiarij*. Car autrement c'est autre chose de deuiner, & d'empoisonner, autre chose de *Goetia*, qu'appellent les Grecs, & de *Pharmaceia*, c'est à dire d'enchantement & d'empoisonnement, encore que l'un & l'autre se face de quelqu'un par art diabolique. En Sauoye on les appelle Eryges, du mot Eryn-*nis*, comme ie croy, qui signifie diablerie, furie infernale, & enuie de tuer quelqu'un: combien que quelques vns aiment mieux les appeler Iriges du mot Grec, *Iynx*, qui signifie certaines especes d'oyseaux hideux & efroyables qui vōt seulement de nuit, comme font ces Sorciers quand ils vont en leurs synagogues: desquels oyseaux Theocrite

Poete Grec & autres font mention.

ANT. Comment donc les anciens Latins appeloient-ils ceux que tu nommes proprement empoisonneurs diaboliques? & me di aussi, s'il y en a eu au monde deuant la natiuité de nostre Seigneur Iesus Christ.

THE. Ouy Antoine mon amy, il y en a eu au monde auât que nostre Seigneur Iesus Christ fut né, & aparust en chair, & ne faut penser que le Fils de Dieu, qui est venu pour destruire & renuerfer les œuures du diable, nous ait apporté ce nouveau mal, & ait donné ceste nouuelle puissance à Satan: l'empire & vogue duquel il est venu oster, & defaire. Et qu'ainsi ne soit, le vieux testament fait mention de ces subtils & Sataniques empoisonneurs, au Deut. 18. vers. 10. Sap. 12. vers. 4. & du temps de Moyse ils estoient desia trop conus, & de plusieurs especes. Car Satan a de tout temps depuis le monde créé, esté semblable à soy-mesme, & tel qu'il est auourd'huy, incitant les enfans d'infidelité à se venger, & à tuer leurs freres, dautant qu'il est homicide dès le commencement comme dit nostre Seigneur Iesus Christ en saint Iean 8. vers. 44. Et quant aux anciens Latins, ils apeloient tels empoisonneurs *Venefici*, c'est à dire venefiques, & les femmes *Saga*, *Thesfala*, *Mage*, *Lamia*, *striges*, *Venefice*, comme on lit en vn poete bien Latin nommé Horace, en son premier liure des carmes, Ode 27. Telle a esté anciennement vne Canidia, de laquelle il parle luy mesme

mesme en l'Ode 17. des Epodes, & en la Satyre 8. du 1. liure. Telle a esté vne Circee, dont parle Homere, en l'Odyss. liure 10. telle vne Medee, de laquelle parle aussi Ouide, au li. 7. de sa Metamorphose, & celle dōt Lucain escrit les forceries au liu. 6. de la guerre Pharsalique, & autres qu'on peut obseruer en lisant les histoires. Car combien que ces auteurs soyēt poètes, si est-ce qu'ils n'ont rien feint ni contrefait que ce, qui estoit dès lors en vſage. Dauantage Cornel. Tacitus qui est vn historien & non point vn poete au liure 2. de ses Annales fait mention d'une Martine, qui estant forcierie tua par poison Germanicus Cesar en la prouince de Syrie.

A N T. l'enten bien maintenant, Theophile, pourquoy ils s'appellent Sorciers, & comme il les conuiendroit nommer pour suyure la façon de parler des anciens Latins: mais dautant qu'il se faut acommoder à l'vſage de parler desia receu, nous appellerons donc ceux qui par la suggestiō, conoissance, & paction qu'ils ont avec le diable, tuent, ou blessent hommes, ou bestes, ou corrompent quelque autre creature: nous les appellerons di-ie, Sorciers, & leur fait, Enforcelemēt, & ceux qui sont ainsi empoisonnez & gastez par eux, enforcelezz.

T H E. Il le faut ainsi, afin que ceux qui nous orront disputer, nous puissent entendre sans s'abuser.

SE COND LE SECOND POINCT.

Antoine.



V m'as promis Theophile, de me monstrier & prouuer par viues raisons, qu'il y a des personnes en ce monde qui sont tels.

THE. Tu dis vray.

ANT. Prouue-le moy donc, car iusques à ceste heure à la verité, ie n'en ay rien creu.

THE. Il y a trois moyens de prouuer & faire foy de quelque chose, quelque incroyable & difficile qu'elle puisse estre estimee, assauoir l'autorité des hommes, l'experience des choses, & la raison prise d'un bon fondement: tous lesquels trois moyens ont lieu en ceste matiere & difficulté, & m'ont persuadé ce que i'en croy: & en premier lieu l'autorité. Car il y a certains passages tirez tant de l'Escripture sainte, que des autres bōs auteurs qui demonstrent qu'il y a à la verité telles personnes, que celles que nous appelons Sorciers, ou fins & diaboliques empoisonneurs. Vié ça, Antoine, ne crois-tu pas à la parole de Dieu?

ANT. A qui croiroy-ie donc?

THE. Tu fais bien: car comme dit S. Pierre en sa 2. epistre. vers. 19. *C'est vne parole tressseure, & qui, comme dit aussi saint Paul, 2. Tim. 3. vers. 16. a esté inspiree & donnee de Dieu mesme: toutesfois les Atheistes de nostre temps n'y croient pas.*

ANT.

ANT. Quant à moy, Theophile mon ami, graces à Dieu i'y croy, & ne la voudroye desdire en rien.

THE. Or ceste Parole sainte & sacree fait mention de ces empoisonneurs, venefiques, & Sorciers, qui est vn argument qu'il y en a eu desia dès ce temps là. Ly moy au vieil Testament, au Deuter. chap. 18. vers. 10. que ie t'ay desia allegué: en Iere. chap. 27. vers. 9. où saint Hierome mesme escrit ainsi en exposant ce passage, Les Sorciers qu'appelle ici l'Escripture, sont ceux que nous pouuons aussi appeler, Venefiques, & empoisonneurs, qui seruent aux fantasies du diable, & qui en Hebrieu sont nommez *Cassaphin*. Ly aussi le chap. 5. du Prophete Michee, vers. 12. *Je raseray dit Dieu, les sorceleries de ta main, & n'y aura nuls deuins en toy*, où tels empoisonneurs sont conioincts avec les deuinatiōs magiques. Ly le Pse. 58. vers. 6. *Ils sont cōme l'aspic sourd*, dit le Prophe-
te, *qui estoupe son oreille lequel n'escoute point la voix des enchanteurs ne du charmeur fort expert en charmes*. Ly aussi le Prophete Nahū, cha. 3. vers. 4. Voila quant au vieil Testament. Et quant au nouveau, qui est l'autre partie de l'Escripture sainte, ly l'Epistre de saint Paul aux Galates, chap. 3. vers. 1. *O Galates mal aduisez, qui vous a enforcellez*. & au chap. 5. vers. 20. auquel chapitre tous les plus sauans docteurs & expositeurs, tant vieux que modernes, tiennent pour chose resoluë, qu'il y a des Sorciers & empoisonneurs, qui par moyēs

subtils, diaboliques & inconus corrompent le corps, la vie, la santé, & le bon entendement mesmes des hommes.

A. Vrayement voila plusieurs passages de l'Escripture sainte, lesquels ie verray, & collationneray estant en la maison.

T. Quant aux autres auteurs tant ecclesiastiques que prophanes, qui les voudroit tous reciter, il y en a plus de cinq cens, qui conferment & assurent qu'il y a des Sorciers, & de ces diaboliques empoisonneurs entre les hommes. Tous lesquels auteurs ie ne te veux ici alleguer, mais pour cause de briueuté quelques vns seulement d'entre eux.

A. Tu fais bien.

T. Quant aux ecclesiastiques, auquel nombre ie compren les liures de l'Escripture sainte qu'on nomme Apocryphes, il y a premieremēt le liure de Sapienc. chap. 12. vers. 4. *Pource qu'ils vsoyent, dit-il, des Chananeens, de sorceries execrables & de sacrifices contraires à toute sainteté*: puis l'article du concile de Carthage, & celuy du concile tenu en la ville de Constantinople, pour la seconde fois au lieu du palais Royal & faubourg d'icelle ville, nommé Trullō, qui est l'article 61. auquel est faite expresse mention de tels malefices & malfaiçteurs, que le concile appelle, Malefices mortels. En tiers lieu, S. Augustin en plusieurs & diuers lieux, mais notamment au sermon 207. *du temps* qui est fait expressement contre ceste sorte de

te de gens, & lesquels ledit saint Augustin nōme
Enchanteurs: lesquels il monstre par l'art & sug-
gestion du diable, pouuoir faire qu'une personne
meure, ou qu'elle guerisse: plus au traité septieme
sur saint Iean, le mesme saint Augustin fait mē-
tion, & deteste ceux qui par enchantemens, li-
gatures, & moyens subtils de l'ennemi, qui est le
diable, besongnent, seduissent, & ofensent les hō-
mes & leurs corps. Tritheme Abbé de Span-
hement en a escrit vn gros liure tout entier, & a
mesme respondu aux questions que l'Empereur
Maximiliā, bisayeul de celuy qui vit auiourd'huy
luy a fait sur ceste matiere. Quoy plus? veux-tu
encores d'autres tesmoignages, & des loix mes-
mes? Il y a la loy ancienne des Douze tables, qui
punissoit ces Sorciers, voire qui enchantoyent
les bleds estās sur terre, comme le tesmoigne Pli-
ne au liure 28. chap. 2. Il y a la loy ciuile des Ro-
mains dite Lex Cornelia, qui les punit aussi. De-
puis vn Empereur de Constantinople nommé
Leon, en vne sienne Constitution, qui est 65.
en nombre, commande qu'ils soyent griefuement
chastiez. Quoy plus? Ce tresdocte poete & excel-
lemment experimenté en toutes choses Virgile
en l'Eglogue 3. & huitieme le tesmoigne aussi: &
qui te pourra seruir depuis peu de temps encore,
Troile de Malucto grand Iuriconsulte, Martin
d'Arles Theologien, & autres, monstrēt & prou-
uent euidemment en leurs liures touchāt ce fait,
qu'il y en a. Ce que ie t'ay voulu coter seulemēt,

afin que tu les lises à loisir à part toy. N'as-tu pas maintenant assez de tesmoins & d'autoritez pour confirmer mon dire.

A N T. Plus que ie n'en voudroye. Mais Theophile, ie te requiers seulement que tu respondes à vn doute que i'ay ici dessus.

T H E. Quel est-il?

A N T. C'est que saint Hierosme sur l'epistre de saint Paul escrite aux Galates, laquelle tu m'as aleguee, chapitre 3. verset 1. semble dire & tenir, que saint Paul n'a point creu qu'il y eust des Sorciers, cōbien qu'il die, *O fols Galates qui vous a enforcelez?* mais qu'en cela saint Paul s'est seulement accommodé à la façō commune de parler, nō pas pour affermer & acertener qu'il y eust des Sorciers, ou enforcelemens.

T H E. Tu as bien retenu le dire de saint Hierosme, Antoine, & à la verité il a ainsi escrit du cōmencemēt : mais vn peu apres, & sur le mesme verset, il parle autrement. On dit (adiouste saint Hierosme) que l'enforcellement dit *Fascinus*, ou estourdissement, nuit proprement aux petits enfans, & à ceux qui sont encores en bas aage, qui ne peuvent encore aller, ni marcher seurement: Pourtant Virgile Poete payen, a dit Eglogue 3.

Ily a un quidam qui gaste par sa venē

Mes petits aignelets que graisse n'y soit venē.

Mais Dieu fait si cela est vray, ou nō: car il se peut faire que les diables aident à ce faire. Voila les paroles de saint Hierosme : en quoy tu vois qu'en
vn in-

vn instant il change d'aduis (dont il sera traité cy apres) & est incertain de ce qu'il en doit dire. Mais autres grands docteurs, escriuans sur le mesme passage, tiennent formellement qu'il y a des Sorciers, & des enforcelemens : & prennent pour preuue de ce, ce dire de saint Paul mesme, comme le fait S. Iean Chrysostome, & autres plus modernes. Quant à saint Augustin, qui ne cede en rien à saint Hierosme, ni en doctrine ni en autorité, ie t'ay desia monstré quelle est son opinion & aduis, & qu'il maintient qu'il y en a.

A. Ie suis content maintenât pour ce regard, Theophile, & voy bien que les autoritez que tu m'as aleguees, font suffisante preuue qu'il y a des Sorciers. Toutesfois tu m'as dit que l'experience mesme & la raison nous contraignent, & conueinquent de le confesser.

T. Il est vray, Antoine, & si tu veux, en deux mots tu l'entendras.

A. Ie le veux bien.

T. Quant à l'experience, il est plus clair que le iour, que le monde s'est aperçeu de tous temps, & en tous aages, qu'il y auoit des Sorciers, & des enforcelemens faits par l'art & suggestion du diable. Car pourquoy, & cōment est-ce que les loix, qu'on faisoit pour lors, eussēt parlé & establi des peines contre les Sorciers, s'il n'y en eust point eu de ce tēps-la? On ne fait point de loy d'vne chose qui iamais ne fust veüe, ni conue: car les droits tiennent les cas, & crimes qui ne furent iamais

veus & aperceus, pour choses impossibles, & qui ne s'ot point du tout. On demāda quelquesfois à Solon, tresprudēt legislateur des Atheniēs, pourquoy il n'auoit establi par ses loix aucune peine contre les parricides, c'est à dire, cōtre les enfans qui tuent leurs propres peres & meres, Parce que (respondit-il) ie ne croy point qu'il s'en puisse ia mais trouuer: & pourtant il n'en faut point faire de loy. Deuant la natiuité de nostre Seigneur Iesus Christ, il s'en est trouué, & bien long temps auparauant: tesmoin Moysse, qui les a condamnē par le commandemēt exprēs de Dieu, en Exode chapitre 22. verset 19. au Leuit. 19. verset 31. & 20. verset 27. Nomb. 23. verset 28. Deut. 18. verset 11. Or on dit que ce fut Zoroastes, homme Persien de nation, grand astrologue & Magicien: qui le premier par la communication qu'il auoit avec les diables, vsa de cet art, comme de l'astrologie iudiciaire, & de l'art magique, qu'il enseigna depuis aux gēs idolatres de son pays. Apres l'aduenement de nostre Seigneur Iesus Christ, qu'il y ait eu des Sorciers en tout aage, & en tout siecle, il apert assez par les liures des histoires, qui en sont pleins: proces criminels qui en ont esté faits Loix: & peines qui ont esté mises, & escrites contr'eux, tant par le droit ciuil des Rom. que par le droit canon des Papes: & notamment, des conciles generaux & decretis sur ce faits esdits cōciles Item par les Titres & Rubriques qui se lisent encores touchant ce crime & forfait. Au liure du

Decret

Decret, il y a en la cause 26. la question 1.2.3.4. & 5. où tu le peux voir & qui en parlēt. Or sur tout telles gens ont esté fort communs & ordinaires en nostre France, comme il se peut aisément conclure des arrests de la cour de parlement, dōnez contre eux, & que plusieurs gens doctes ont recueilli en leurs liures : & encores mieux de la determination & condamnation qui fut faite en la Sorbonne, en l'an mil. 398. sous le Roy Charles vj. de certains articles & erreurs, que ceux qui estudioyent pour lors en l'vniuersité de Paris estudiās à tellez sciences tenoyent & publioient. Quoy? en cet aage où nous viuons, on en voit plus que iamais.

A. Mais pourquoy cela, Theophile? ie te prie dy le moy, si tu le fais.

T. C'est bien certes vn tresgrand & tres-horrible iugement de Dieu sur le monde, duquel la cause est conuē de Dieu. Car les iugemens & faits de Dieu, sont tousiours saincts & iustes, cōbiē qu'ils nous soyent secrets, & inconnus, comme avec l'Escripture, Pseau. 25. ver. 10. dit tresbien, S. Augustin, & notammēt en cete matiere, au liu. par luy intitulé, De la diuination des diables.

A. Mais en ce temps, y a-il plus d'ocasion apparente de punir le mōde, qu'il n'y auoit il y a trois ou quatre cens ans auparauant?

T. Ouy bien: car tāt plus le monde reiette opiniastrēmēt la parole de Dieu, & la lumiere de l'Euangile, que Dieu luy-mesme a allumee en ces

derniers temps: tant plus le mode se monstre ingrat, & est digne de griefs & horribles iugemens de Dieu: & de demeurer en tenebres & ignorance, sous la tyrannie & seruitude du diable. Parquoy Satan, pour tenir ainsi les rebelles à la verité de Dieu, sous sa patte, par maniere de dire, & les endurcir dauantage, a eu de Dieu la bride laschee, & efficace d'erreur, pour tromper & abuser plusieurs qu'il gagne par ces moyens, selon que l'esprit de Dieu nous enseigne deuoir estre fait, & que saint Paul l'a escrit en la 2. aux Theffal. chapitre 2. verset 10. *Et pourtant, dit saint Paul, Dieu leur enuoyera efficace d'abuson afin qu'ils croient à mensonge.* Satan donc a aujourd'huy obtenu de Dieu ce grand pouuoir, pour abuser ceux qui perissent: d'autāt qu'ils n'ont point receu, & creu la dilection de verité, pour estre sauuez: & ainsi ils sont aisément gagez par le diable.

A. Mais quelques vns estiment, que tout ceci n'auient, que par vne folle fantasie, & vn humeur melācholique, dont ceux que nous appelons Sorciers, sont pleins & malades, & non point par vn iugement de Dieu.

T. Ils se trompent, Antoine mō ami, ne plus ne moins, que ceux qui estiment & dient les demoniaques & lunatiques (qui estoient du temps de nostre Seigneur Iesus Christ, & lesquels il guerissoit) n'auoir esté autre chose que personnes malades d'un humeur gros & melācholique: enquoy ils troublent la certitude de la foy Chrestienne,

stienne, desnient la vertu & nature diuine de nostre Seigneur Iesus, & mētent aussi impudēment. Car comment les diables se royent-ils sortis des corps des demoniaques, & auroyent-ils parlé, s'il n'y eust eu qu'une folle apprehension & humeur melancholique en tels malades? Ainsi ces Sorciers sont gens endiablez, & asservis sous la puissance de Satan, qu'ils adorent, se mettent à genoux deuant luy, & luy portent des chādelles. Cōbien que quelques vns d'entr'eux sont encores plus sales. Car luy leur aparoiſſant en forme d'homme, ils luy baissent mēme le derriere, comme ils le confessent franchement: & le tout auicēt d'autant que Dieu punit tres-iustement en ceste sorte, & par cest abandon qu'il donne à Satan, ceux qui, comme ie dy, tres-malicieusement & opiniaſtrement le reiettent, & son Euangile, ou bien le delaisſent, l'ayant receu bien froidement. Combien que ie te puis dire aussi, Antoine, que cōme Dieu a voulu qu'à la venue de son Fils nostre Seigneur Iesus Christ en ce monde, il y ait eu plusieurs demoniaques, sourds, muets & malades, pour par ce moyē glorifier dauātage ſon Fils, & auoir plus de subiet pour demonſtrer la puissance d'iceluy: aussi de ce temps, où il nous a rendu par sa ſaincte grace la clarté de son Euangile, il veut que plus de gēs rebelles ſoyent surpris en tels laqs de Satan, & ſoyent Sorciers, pour mieux faire conoiſtre à ceux qu'il a illuminez, & preſeruez de ce mal, combien il leur fait de grace, &

combien est grand l'heur de ceux qui croient à sa sacree verité. Entens-tu donc maintenant, Antoine, pourquoy aujourd'huy il se descouure & trouue plus de Sorciers qu'il ne faisoit il y a cent & six vingts ans?

A. Ouy bien, Theophile mon ami, & t'en remercie. Mais passe à la troisieme & derniere preuve, que tu as, pour monstrier qu'il y a des Sorciers & enforcelemens.

T. C'est la raison, laquelle le me persuade, & elle est telle: Par tout ou nous voyons la vraye & propre cause d'une chose assez puissante, & mesmement presente pour produire son effect, nous pouuons à bonne raison croire & conclure que là aussi est l'effect, & qu'il s'ensuit. Pour exemple, où est le Soleil, là aussi est la lumiere: car la lumiere vient du Soleil: là où est la bise, là est le froid: car le froid est causé & engendré par la bise: & pour parler plus proprement en cete matiere, & des causes qui ont vne ame & vne volonté, les Philosophes dient & tienēt cete reigle pour certaine, Que quand vne cause, qui a en soy ame, a la volonté & la puissance coniointe ensemble de faire quelque chose, incontinent elle le fait: exēple, Si vn hōme a faim, & a du pain en sa main, il mange: s'il a soif, & du vin, il boit: s'il a froid, & a aussi du feu là present, il se chauffe: car il a la volonté & puissance ensemble de ce faire. Or il est ainsi, que Satan est la cause de tous ces mestiers & abusions, & Satan a la volonté & la puissance ensemble,

ble, (laquelle par le iuste iugement de Dieu luy est donnee) d'ainfi tromper, gagner & s'asservir les infideles. Partant il ne faut point douter, que il ne le face aussi tost, & ne les gagne & tienne assuiettis. Et pour le te faire mieux entendre, tu ne doutes point, qu'il n'y ait tousiours eu au monde, & n'y ait encores des infideles, c'est à dire, gens qui ou mesprisent en ne tenāt grād conte, ou du tout refusent la conoissāce de Dieu, ou repugnēt à la volonté & doctrine d'iceluy, quand elle leur est presentee parla predication de sa parole.

A. Non, le n'en doute point, & en voyōs trop.

T. Dautre part, tu ne doutes pas que le diable n'ait tousiours eu depuis le temps qu'il a delaisfē sa premiere origine, & a esté fait diable, cete volōté de destourner les hommes de leur salut, de la conoissance, & fiance qu'ils doyuent auoir en la parole & es promesses de Dieu: & que par tous moyens à luy possibles, il ne tasche à gagner à foy, ces gens là, c'est à dire, ceux qu'il void & conoit ou froids à seruir Dieu, ou du tout disposez à reietter & contenter cete sacree Parole & maiesté diuine.

A. Il est vray: car le diable est accomparé à vn lion rugissant, qui cērche tousiours quelcun pour le deuorer: n'est-ce pas le dire de saint Pierre, en sa 1. Epist. chap. 5. vers. 8?

T. Tu as bonne memoire, & qui plus est, Antoine, il est appelé cet Ancien serpent, en l'Apo-calipse. 20. chap. vers. 2. cet ennemy commun des

hommes, en saint Matthieu 13. verset 28. lequel besongne & obtient ce qu'il veut faire, notamment & spécialement sur les enfans d'infidélité: comme mesme le monstre & afferme saint Paul aux Ephes. 2. vers. 2. Car l'ire de Dieu vient & se descharge iustement sur eux, comme il est dit en la mesme Epistre aux Ephes. 5. vers. 6. Il reste donc, puis que tu vois biē que le diable a tousiours ceste volonté de mal faire, & seduire les hōmes, en les destournant de la conoissance de Dieu, & de l'assurance qu'ils doyent mettre es promesses d'iceluy, de sauoir s'il en a aussi la puissāce: & puis nostre argument sera bien conclu & prouué en toutes ses parties.

A. Tu dis vray: mais le diable a-il ceste puissance de pouuoir ainsi gagner les hommes, qui sont creatures de Dieu, & formez à son image, creez aussi principalement pour sa gloire?

T. Le diable ne l'auroit point, si elle ne luy estoit donnée de Dieu, qui par vn iuste iugement veut punir ceux, qui sciemment & malicieusement le mesprisēt ou delaissent: & cōbiē que nous ne puissiōs pas dire pourquoy cestuy-ci est plu-
stost attrapé de Satan, que cestuy-là, sinon que c'est la iuste & sage volonté de Dieu, qui l'ordonne ainsi, les conseils de laquelle volōté nous peuuent estre, & sont de fait souuent cachez, & inconnus: toutesfois ne sont iamais iniustes ni mau-
uais. Et si est ce neantmoins, que nul ne deuiant
Sorcier, sinon par sa propre faute, & qu'il n'ait
sciem-

sciement & premierement renoncé son Dieu son createur, & son sauueur, & pris volōtairēmē l'aliance & amitiē du diable, le sachant estre diable, pour le reconoistre, auoir, & aduouer au lieu du Dieu vivant.

A. Est-il bien possible cela, Theophile mon amy, qu'il y ait homme qui renonce à Dieu, & qui sachant que celuy qui parle à luy, & le sollicite, est Satan, le vueille seulement escouter, & qui pis est, se vueille donner à luy?

T. Ceci est trop vray, & le font tous ceux qui deuiennēt Sorciers: car apres que satā les a abordez ou en particulier, ou és sabbats, & assemblée qu'ils font: il leur dit franchement, qui il est, les fait renoncer à tout le secours & puissance de Dieu, & leur fait faire promesse de le tenir à l'aduenir, luy qui est là present, pour leur propre Dieu: & auoir leur recours à luy: & puis par quelques façons qu'il leur enseigne, & commande, apres qu'ils ont fait ceste promesse, ils l'adorēt: les vns se trainās à genoux vers luy, les autres luy offrans vne chandelle allumee, les autres le baisant en quelque partie de son corps emprunté, les autres en autre sorte, & maniere qui leur est là eniointe & commandee par Satan mesme.

ANT. O que c'est à bon droit donc qu'ils sont ainsi punis de Dieu, puis que si meschamment, traistremēt, & sciement ils abandonnent Dieu leur createur, leur pere, leur vie, & leur salut, pour adherer à Satan & ne m'en esbahy plus,

T H E. Pour ceste occasion aussi, Dieu donne cete si espouuantable efficace, & puissance à Satan, de les gagner & tenir sous sa main, dautant qu'ils ont reietté sa dilection: ainsi que dit S. Paul en la 2. aux Theſſal. 2. vers. 10: & est vn iugement de Dieu tout commun, & ordinaire, que Dieu liure & dōne à Satan ceux qui ne se veulent fier & arrester à luy, qui est leur vray createur, sauueur, pere & protecteur, cōme nous le voyons tant de fois dit en la parole de Dieu, aux Rom. 1. vers. 24. 1. rois 22. vers. 22: & t'accorde bien, que Satā n'auroit telle puissance sur les hommes, si elle ne luy estoit ottroyee d'enhaut: c'est à dire, de Dieu.

A. Il n'y a rié en tout ce que tu m'as dit, qui ne soit bien croyable, & à mō iugemēt vray: & m'esbahy maintenāt pourquoy on peut douter qu'il y ait des Sorciers, & gēs ainsi possédez par le diable.

T. J'aiousteray encores vn mot, seulemēt pour conclure ce 2. poinct: assauoir, que tous ceux qui deuiennent Sorciers, le deuienēt ou par vne infidelité & desfiance qu'ils ont des promesses & assistance de Dieu: ou par mespris: ou par curiosité, ne se contentans de la mesure, & grace qu'il a pleu à Dieu faire aux hommes. Qu'ainsi ne soit, les vns sont deuenus Sorciers, & ainsi esclaués & vassaux du diable, pour esperer receuoir quelque argent de lui, comme il leur auoit promis, & en auoyent besoin estans pressiez de quelque indigence ou poureté: tellemēt que sous esperāce d'estre riches, & de receuoir quelques escus, ils se sont dannez au diable:

diable : les autres se voyans foulez par quelques plus grands & plus puissants qu'eux, desquels ils ne pouuoient auoir leur raison, se sont adressez au diable (qui est meurtrier du commencement) pour se venger. Et tous ceux-ci sont poussez par vne meschante desfiance, comme si Dieu n'auoit point soin de la necessité & oppresse qu'on fait à ses propres creatures. Et de telle façon deuiennent Sorciers les payfans, gens rustiques & ignorans qui sont pources ou iniuriez. Il y ena d'autres qui par curiosité & mespris qu'ils font de se contenter de ce, qu'il a pleu à Dieu nous reueler, deuiennēt forciers & liguez au diable, desirās deuiner & cognoistre les choses futures, ou bien voulans sauoir les secretes & occultes, & pour sans peine faire & obtenir beaucoup de choses, que le diable leur promet. De telle façon sont abusees les personnes qui sont plus aisees, sauâtes & honorables, comme gentilshommes, damoizelles, escoliers & gens estimez doctes. Mais & les vns, & les autres sont iustement punis de Dieu, & delaissez entre les mains de Satan, pour l'auoir voulu chercher & escouter.

A. Je me tien à cete heure content sur cete question, & croy qu'il y a des Sorciers, & par cōsequent des enforcellemēs. Mais, Theophile, me voudrois tu aussi dire que font ces Sorciers, & sur quoy ils ont puissance?

T. Ouy bien: mais ie t'en diray autant seulement, que i'en ay peu apreñdre des liures & histoires, que i'ay leues.

LE TROISIEME POINCT.

Antoine.

IE m'en contenteray. Ces gens-ci ont-ils aussi bien puissance de gaster & empoisonner les bestes que les hommes? Peuvent-ils aussi corrompre les eaux, les herbes & l'air mesme, comme ils se sont vantez de nostre temps d'auoir empoisonné l'air de quelques villes?

T. Antoine, tu peux bien comprendre ceste raison, Que celuy qui abat bien vn grand geant, abatra bien vn petit enfant: ainsi que celuy qui peut blesser & empoisonner vn homme, qui est vne creature raisonnable, sage, prouide, formee à l'image de Dieu, se donnât de garde de foy & de sa vie le plus qu'elle peut, & avec grande consideration: tel pourra bien plus aisément gaster & enforceller vne pauvre beste brute, cōme vn cheual, vn moutō, vn bœuf, vne vache, qui n'ont pas telle prudence & sagesse pour se contregarder que l'homme: le mesme aussi pourra encores plus facilement empoisonner vne herbe, vn arbre, vn courreau d'huis, vn degré, du vin, de l'eau, & l'air mesme: toutes lesquelles choses se laissent manier à nostre volonté, pour autant de temps qu'il plaist à Dieu chastier par ce moyen les hommes & leurs pechez.

A. Comment donc? selon que tu dis ils peuvent

uent corrompre & gaster toutes sortes de creatures soyent viuantes, soyent mortes.

T. Estans empoisonneurs & encores bien subtils, ils peuuēt gaster tout ce qui est de sa nature corruptible, & subiet à pouuoir estre corrompu & empoisonné. Or il ny' a rien en ce monde bas qui ne puisse estre corrompu, & partant leur malice & meschanceté peut estre sentie par toutes les creatures du monde.

A. Mais as-tu leu en quelque part aucuns exemples de cela?

T. Ouy. Car quand aux hōmes, il est trop no toire qu'ils peuuēt estre empoisonnez & enforcellez par les Sorciers: ce que tous les iours nous voyons. De faiēt, ces miserables Sorciers en tuant les vns, font & tienēt les autres malades & en lāgueur, tarissent & asseichent le lait des nourris, donnent vne maladie de cholique, d'estomach, de teste, de pieds, de paralisie, d'apoplexie. d'enfleure & d'autres maladies, que ni eux, ni autres ne conoissent, nō pas mesmes les medecins, & le donnent ces meschans ici tant aux femmes qu'aux hōmes, tant aux grādes personnes qu'aux petis enfans, selon que leur colere & despit contre quelcun les pouffe: les metayers font mesme ment mourir leurs maistres. Quant au bestail, ils le tuent, aussi, & le font mesme mourir en diuer ses sortes: & non seulement le tuent, mais le font enfler ou amaigrir & desfeicher par leur enforcellement, de maniere, que c'est pitié de le voir:

comme ie t'ay cité apres S. Hierosme ce passage de Vergile, *Ily a vn quidam, &c.*

Dauantage, ils charment les bestes, pour les prendre & arrester, comme il est dit au Pse. 58. ver. 5. Ils ont du venin semblable au venin du serpent, & comme l'aspic sourd qui estoupe son oreilles lequel n'escoute point la voix des enchâteurs, ne du charmeur fort expert en charmes. Et combien que S. Augustin au liure II. de Genes. A la Lettre, cha. 28, pèse que le serpent soit plus aisément charmé par les Sorciers que les autres bestes, d'autant que le diable s'en est serui du commencement pour tenter l'homme, & a esté la premiere creature qui lui a esté instrument de mal faire, & laquelle partant porte encores cete peine, d'estre plus subiet au diable que les autres bestes: si est-ce que le mesme effect & puissance des Sorciers se void sur toutes les autres bestes, comme l'experience en est vn bon tesmoin. Et aussi, que l'Escripture sainte ne dit point, en Genes. 3, que Dieu ait plus assubié le serpent sous la puissance de satan, que les autres bestes: & est certes telle raison de S. Augustin trop subtile. Pour le regard des herbes, blez, arbres, fruits & autres choses semblables, il y a le dire de Vergile, tiré de l'experience toute notoire & aprouuee en l'Eclogue 8: ou il est ainsi dit,

*Has herbas, atque hac Ponto mihi lecta venena,
Ipse dedit Mæris: nascuntur plurima Ponto.
Atque satas aliò vidi traducere menses.*

*Ces herbes & venins, qui pres la mer de Ponte
Tous ont esté cueillis, ainsi que ie te conte,
Mæris me le. donna: ils croissent à planté
Pre. de Ponte, & ay veu tout vn ble enchanté:
Qui de son propre lieu par, changement visible
Est transporte ailleurs par vn charme terrible.*

Et aussi la Loy des Douze tables (comme recite Serue, sur ce passage de Vergile, & Pline au liure 28. chap. 2, que j'ay desia cité) a ordonné peine à tous Sorciers, qui enchantoyent les bleds & les fruits de terre. Quant aux eaux & à l'air, qu'y a-il plus aisé que de les empoisonner & corrompre? en telle sorte que ces elemēs ne seront plus sains, mais pestiferes & dangereux aux hommes: veu que l'odeur & la seule vapeur d'un fumier, retraits ou voiries, ordinairement les empoisonne, voire tellement que de là s'engendre vne peste en toute vne cōtree. N'as tu iamais ouy dire qu'en Italie, en la region nommee aujourd'hui Terra di lauoro, il y a vn trou de terre qui iette si mauuaise odeur que les oiseaux mesmes qui passent & volent par dessus, en tombent tous morts? & s'appeloit anciennement, Auernus, en Latin. Ou bien, n'as tu iamais leu que l'odeur puante & sulfuree, qui sort de la mer morte es pays de Iudee, a rendu tout le pays d'environ, & les arbres mesmes secs & steriles, tant l'air est là gaste & empoisonné d'une telle vapeur?

A. J'ay bien ouy parler de tout cela: mais astu leu toy mesme, que les Sorciers ayent iamais

peu empoisonner l'air? Car quand aux eaus & aux puits, ie le croy bien, & cela est escrit en assez d'histoires.

T. Ouy, ie l'ay leu en l'histoire Ecclesiastique, de Nicephore Calliste, liu.14.chap.18.où il est dit que les Mages des Perles, pour rendre la religion Chrestienne odieuse, firēt sortir vne fort mauuaise & puante odeur, du lieu où Maruthas & les autres Chrestiens s'assembloyent pour prier Dieu.

A. Mais l'air ne flue & ne coule-il pas tousiours, poussé & agité par quelque vent grand ou petit? ce qui empesche qu'il ne puisse estre ainsi empoisonné.

T. L'eau aussi ne se remue-elle pas, & ne coule elle-pas tousiours? que tu acordes toutesfois pouuoir estre empoisonnee par les Sorciers. Car en la façon que l'eau se peut empoisonner, & l'air aussi: d'autant que l'odeur graue, & puante qui sort de poison, s'espand incontinent par l'eau & par l'air; qui sont de substance foible & aisee à gaster, estans corps humides & tendres, & receuans aisément vne humeur ou qualité externes & comme tu vois qu'une mesme eau sera incontinent chaude ou froide, l'air se change aussi en vn mesme iour, quelquesfois plus de trois fois, deuant tantost chaud & puis froid & puis chaud: ce qui se void au printemps & en Autonne principalement. Et cela se fait encores plus aisémēt au corps de l'air, qui est moins ferme & solide que le corps

& le corps de l'eau, qui est plus fort & moins disposé à partir & estre infecté.

A. Mais plusieurs croient, que quand les Sorciers dient pouuoir empoisonner l'air par art diabolique & par leurs poisons, que ce ne sont que vanteries qu'ils font, pour faire croire qu'ils ont grande puissance: toutesfois qu'ils ne le font pas, encores que quelques vns d'entre eux fantastiques croient & confessent l'auoir fait.

T. l'accorde bien que le premier qui le fait, c'est Dieu, qui par tels instrumens & executeurs de sa iustice, veut chastier les pechez des hommes: mais ie te di que ce ne sont point tousiours soles & fausses vanteries & imaginations que les Sorciers font & ont, de dire, qu'ils empoisonnent quelque fois l'air, ains est vne vraye verité, & que cela est fort faisable & partant croyable. Premièrement, toutes les imaginations qu'ils pourroyent auoir de cela, ne seroyent senties & aperceues de nous, comme elles le sont: car nous sentons de faict la corruption & contagion d'un tel air. Or vne fantasie d'autrui & imagination vaine, ne produit pas tels effects, & ne nous sauroit faire mourir: ce qu'ils font toutesfois, en corrompant l'air, & engendrent vne tres-dangereuse peste. Plus, de pëser que ce sont vanteries, cela est trop absurde & aisé à refuter, veu que telles cōfessions sont par eux faites en iustice, eux estans entre les mains du bourreau pour estre menez au gibet: d'auantage que tous s'accordent en cela, ce qui n'a-

uient és vaines imaginations d'esprit, qu'il y ait vne conformité & consentement entre tant de diuerſes perſones, & en diuers temps. Et te veux dire encores plus, c'eſt qu'ils nouënt l'eſguillete, comme on parle aujourdui. tu fais bien que ſignifie cete façon de parler.

A. Eſt-il poſſible?

T. S'ils peuuent corrompre la ſanté de l'hôme, amolir les nerfs, troubler les humeurs internes qui ſont en nos corps: ne peuuent-ils pas aſſopir en l'homme cete vertu generatiue qui iette la ſemence, tant par le refroidiſſement des parties & vaiſſeaux ſeminaires, que par vne apprehenſion & deſgoutement qu'ils donnent à ceux entre leſquels ils ont noué l'eſguillete? En quoy le tout ſe fait par art & miniſtere du diable, & pour ſemer des diſcordes entre ceux qui deuoyēt viure en paix, & deſquels ils ſe veulent venger meſchamment: qui eſt le vray meſtier & office du diable. Car il eſt ſemEUR de noiſes & de zizanie, comme il eſt dit en S. Matth. 13. verſ. 39, & en S. Iean 3. verſ. 10.

A. As-tu quelque exemple de cela és Auteurs ne iens?

T. Pour vray. Premierement S. Auguſtin entre les moyens de nuire qu'il a remarqué eſtre aux Sorciers, il ſpecifie les ligatures, au traité 7. ſur l'Euangile ſelon S. Iean: dont Nouër l'aiguillette, eſt vne eſpece tout notoirement. Dauantage, ce qui eſt eſcrit en l'Eclogue 8. par ce tres fa-
uant

uant Poete & premier entre tous les Latins, est tiré de l'experience commune & conue desia de ce temps-la:

Necte tribus nodis ternos Amarilli colores,

Necte Amarilli modo: & Veneris, dic, vincula necto.

Noue trois nœud. en vn de trois couleurs diuerses

Et di Je lis ceci pour l'amour, tu renuerfes

L'esprit de celuy-la, qu'auras ainsi lié,

Sainct Iean Chrysostome le confirme ainsi tres-expressement en ses commentaires sur la premiere epistre à Timoth. chap. 4. & S. Hierosime sur l'epistre aux Gallat. chap. 5. vers. 20. Plus ceci mesme est confirmé par le Canon Si per, qui est le dernier, en la cause 33. quest. 1. au Decret où il est dit ainsi, *Si par l'art des Sorciers & du diable il est aduenü par un secret, mais iuste iugement de Dieu, le diable faisant ces choses, que ceux qui sont mariez ne se puissent conoistre charnellement, il faut exhorter ceux à qui ceci auient, que d'un cœur contrit ils se confessent à Dieu. Et s'ils ne peuuent estre gueris qu'ils soyent separez.* Que si les Sorciers peuuent empescher la vertu nutritiue, comme le tient & prouue par viues raisons Thomas d'Aquin, en la 1. Sum. en la quest. 3. art. 4. aussi peuuent-ils corrompre & empescher la vertu geueratiue. Polydore Virgele en son liure 1. Des prodiges adiouste aussi vne raison de ceci, que lon peut voir audit liure.

A. Je ne say plus que dire, tant tu me contes

ici de choses merueilleuses.

T. Te diray-ie encore cete derniere, qui te semblera peut estre plus estrange que toutes les precedentes, & que saint Augustin toutesfois escrit, & Vergile & Apulee? Mais d'autant que ie ne la croy, ie l'ay reservee pour la derniere.

A. Et quelle est-elle?

T. C'est qu'il escrit, qu'iceux changent les homes en loups, ours, asnes & autres bestes brutes.

A. Saint Augustin escrit-il cela?

T. Li le liure 18. de la Cité de Dieu, au chap. 17. & 18. & tu verras comme il fait mention de quelques vns, tant Chrestiens que Payens, qui dient & afferment assurement, que d'hommes ils ont esté faits & transformez pour vn temps en bestes brutes, comme auoit esté vn Deniænet & vn Præstant, qui estoient mesmes anciens en l'Eglise, & autres dont il parle là.

A. Cela est du tout impossible, que le diable puisse changer nostre nature & substance: car il apartiët à Dieu seul de pouuoir creer, former. ou changer les natures des choses, & ne le peut faire Satan, ni partant les Sorciers qui ne sont que ses petits disciples.

T. Tu le prens bien, & saint Augustin le dit aussi. Car combien que ces personnes qui dient cela, pensent auoir esté ce qu'ils dient: toutesfois ils se trompent eux-mesmes, & ne sont que folles imaginations & apprehensiõs qu'ils ont eues en leur cerueau. Ce que Satã neantmoins leur a fait
acroire,

acroire, leur ayant premierement endormi & assoupi les sens, & fait auoir telles fantasies, par le troublement d'esprit qu'il leur donne: ne plus ne moins qu'il y a des maladies mesmes corporelles (comme enseignent les medecins) où il nous semble que nous sommes coqs, ou porcs, ou bœufs, outout de verre, ou telles fariboles. Partant la vraye cause de telles visions, & opinions qu'ont ceux qui croient auoir esté tournez quelquesfois en bestes, par les enforcelemens qui leur ont esté faits, est le troublement & esgarement d'esprit, où ils sont tombez par le ministere du diable: qui (comme dit Thomas d'Aquin) a troublé les quatre humeurs, & la temperature de leurs corps: & ainsi leur fait croire qu'ils sont tels que ils se dient & pensent estre,

A. Mais ainsi qu'il est dit au 4. chapitre de Daniel, Nebuchadnezar a bien esté changé en beste broutant l'herbe, par vn long temps.

T. Tu dis vray: mais pour cela il n'estoit pas changé en la substance & vraye essence d'une beste: & puis, cela se faisoit sur luy par la propre main de Dieu viuant & non par les effets & enforcelemens du diable. Or Dieu peut changer les natures & substances, s'il luy plaist: mais le diable ne le peut faire: & pourtant ce qu'on escrit des loups-garous est entieremēt faux & fabuleux quoy que quelques vns le croyēt auenir aux peuples plus Septentrionaux: item qu'au fleuve de Borysthene, les hommes deuient bestes. Et

ici de choses merueilleuses.

T. Te diray-ie encore cete derniere, qui te semblera peut estre plus estrange que toutes les precedentes, & que saint Augustin toutesfois escrit, & Vergile & Apulee ? Mais d'autant que ie ne la croy, ie l'ay reservee pour la derniere.

A. Et quelle est-elle ?

T. C'est qu'il escrit, qu'iceux changent les homes en loups, ours, asnes & autres bestes brutes.

A. Saint Augustin escrit-il cela ?

T. Li le liure 18. de la Cité de Dieu, au chap. 17. & 18. & tu verras comme il fait mention de quelques vns, tant Chrestiens que Payens, qui dient & afferment assurement, que d'hommes ils ont esté faits & transformez pour vn temps en bestes brutes, comme auoit esté vn Deniænet & vn Præstant, qui estoient mesmes anciens en l'Eglise, & autres dont il parle là.

A. Cela est du tout impossible, que le diable puisse changer nostre nature & substance: car il apartiët à Dieu seul de pouuoir creer, former. ou changer les natures des choses, & ne le peut faire Satan, ni partant les Sorciers qui ne sont que ses petits disciples.

T. Tu le prens bien, & saint Augustin le dit aussi. Car combien que ces personnes qui dient cela, pensent auoir esté ce qu'ils dient: toutesfois ils se trompent eux-mesmes, & ne sont que folles imaginations & apprehensiõs qu'ils ont eues en leur cerueau. Ce que Satã neantmoins leur a fait
acroire,

acroire, leur ayant premierement endormi & assoupi les sens, & fait auoir telles fantasies, par le troublement d'esprit qu'il leur donne: ne plus ne moins qu'il y a des maladies mesmes corporelles (comme enseignent les medecins) où il nous semble que nous sommes coqs, ou porcs, ou bœufs, ou tout de verre, ou telles fariboles. Partant la vraye cause de telles visions, & opinions qu'ont ceux qui croyent auoir esté tournez quelquesfois en bestes, par les enforcelemens qui leur ont esté faits, est le troublement & esgarement d'esprit, où ils sont tombez par le ministere du diable: qui (comme dit Thomas d'Aquin) a trouble les quatre humeurs, & la temperature de leurs corps: & ainsi leur fait croire qu'ils sont tels que ils se dient & pensent estre,

A. Mais ainsi qu'il est dit au 4. chapitre de Daniel, Nebuchadnezar a bien esté changé en beste broutant l'herbe, par vn long temps.

T. Tu dis vray: mais pour cela il n'estoit pas changé en la substance & vraye essence d'une beste: & puis, cela se faisoit sur luy par la propre main de Dieu viuant & non par les efects & enforcelemens du diable. Or Dieu peut changer les natures & substances, s'il luy plaist: mais le diable ne le peut faire: & pourtant ce qu'on escrit des loups-garous est entieremēt faux & fabuleux quoy que quelques vns le croyēt auenir aux peuples plus Septentrionaux: item qu'au fleuve de Borysthene, les hommes deuient bestes. Et

quant à ce que Varro a laissé par escrit, touchant vn certain estang d'Arcadie, lequel les hommes ayans passé deuiennent loups: ce sont fariboles, & fausses fantasies qu'ils prennēt de penser estre tels, ne l'estās pas toutesfois, mais suruenues par auenture, pour la peur qu'ils ont eu en passant tel stang: toutesfois ils ne sont pas loups.

A. Tu m'as suffisamment monstré que peuuēt faire les Sorciers: di moy aussi pourquoy ils s'adressedent & ont puissauce de nuire aux gens de biē & craignās Dieu (Ce que nous voyons prou par experience) aussi bien comme aux meschans.


T. La solution de ta doute est aisee. Premièrement, c'est que Dieu veut par ce moyen, & par telles verges & afflictions chastier les pechez des siens: car quelques gens de biē & craignans Dieu que nous appelions les hommes viuans en ce mōde, si sont ils pecheurs, comme dit saint Iean, Si nous disōs que nous n'auōs point de peché, nous sommes menteurs: tellement qu'à bonne raison ils sōt chastiez de Dieu. En secōd lieu, Dieu aussi veut esprouuer leur patience & leur foy par telles sortes d'afflictions. Ce qu'il a fait en la personne de son seruiteur Iob, lequel il a affligé par le diable, & par les Chaldeens, qui ne valoyent pas mieux que les Sorciers, pour esprouuer la patience de ce bon personnage. Car, comme dit saint aux Rom, 5. chap. vers. 3. *tribulation produit patience: patience, probatiō: probation, esperāce, qui ne nous confond iamais*. Et par ainsi cela tourne au salut de ses

de ses seruiteurs, lesquels monstrent en endurant patiemment telles verges & fleaux qu'ils se conforment entierement à la volonté de Dieu, & dependent de luy.

A. Je voy biē que i'estoye arresté en beau chemin, & que ie doutoye d'une chose fort aisee. Mais puis que tu m'as desia si bien commencé & resolu sur les troispremiers poincts que ie t'ay de mandez, a sauoir que signifie ce mot de Sorcier: Item s'il y a des Sorciers & pour le troisieme, sur quelles choses les Sorciers ont puissāce: ie te prie (Theophile mon ami) di-moy comment, & par quel moyen ces Sorciers besongnēt & empoisonnent.

LE QUATRIEME POINCT.

Theophile.

OMMENT penses-tu Antoine, que ie foye si sauant au faict de Sorcellerie? tu fais que ie t'ay dit du commencement, que (graces à Dieu) ie n'ay nulle acointance ni avec Satan, ni avec les Sorciers, & que ie n'appete ni n'affecte cete louange-la: toutesfois ie te veux satisfaire en tout ce que ie puis. Tu demandes par quel moyen les Sorciers besongnent & font les diuers maux que ie t'ay racontez. Ie te respon en premier lieu, que c'est par l'alliance & instinct, & puis par l'instruction, suggestion, mi-

quant à ce que Varro a laissé par escrit, touchant vn certain estang d'Arcadie, lequel les hommes ayans passé deuiennent loups: ce sont fariboles, & fausses fantasies qu'ils prennēt de penser estre tels, ne l'estās pas toutesfois, mais suruenues par auenture, pour la peur qu'ils ont eu en passant tel stang: toutesfois ils ne sont pas loups.

A. Tu m'as suffisamment monstré que peuuēt faire les Sorciers: di moy aussi pourquoy ils s'adressent & ont puissance de nuire aux gens de biē & craignās Dieu (Ce que nous voyons prou par experience) aussi bien comme aux meschans.

T. La solution de ta doute est aisee. Premièrement, c'est que Dieu veut par ce moyen, & par telles verges & afflictions chastier les pechez des siens: car quelques gens de biē & craignans Dieu que nous appelions les hommes viuans en ce mōde, si sont ils pecheurs, comme dit saint Iean, Si nous disōs que nous n'auōs point de peché, nous sommes menteurs: tellement qu'à bonne raison ils sōt chastiez de Dieu. En secōd lieu, Dieu aussi veut esprouuer leur patience & leur foy par telles fortes d'afflictions. Ce qu'il a fait en la personne de son seruiteur Iob, lequel il a affligé par le diable, & par les Chaldeens, qui ne valoyent pas mieux que les Sorciers, pour esprouuer la patience de ce bon personnage. Car, comme dit saint aux Rom, 5. chap. vers. 3. *tribulation produit patience: patience, probatiō: probation, esperāce, qui ne nous confond iamais*. Et par ainsi cela tourne au salut de ses

de ses seruiteurs, lesquels monstrent en endurant patiemment telles verges & fleaux qu'ils se conforment entierement à la volonté de Dieu, & dependent de luy.

A. Je voy bié que i'estoye arresté en beau chemin, & que ie doutoye d'une chose fort aisee. Mais puis que tu m'as desia si bien commencé & resolu sur les troispremiers poincts que ie t'ay de mandez, asauoir que signifie ce mot de Sorcier: Item s'il y a des Sorciers & pour le troisieme, sur quelles choses les Sorciers ont puissâce: ie te prie (Theophile mon ami) di-moy comment, & par quel moyen ces Sorciers besongnēt & empoisonnent.

LE QVATRIEME POINCT.

Theophile.



COMMENT penSES-tu Antoine, que ie soye si sauant au faict de Sorcellerie? tu fais que ie t'ay dit du commencement, que (graces à Dieu) ie n'ay nulle acointance ni avec Satan, ni avec les Sorciers, & que ie n'appete ni n'affecte cete louange-la: toutesfois ie te veux satisfaire en tout ce que ie puis. Tu demandes par quel moyen les Sorciers besongnent & font les diuers maux que ie t'ay racontez. Je te respon en premier lieu, que c'est par l'alliance & instinct, & puis par l'instruction, suggestion, mi-

nistere & operation du diable. Car ceci est tres-vray, Qu'il n'y a Sorcier (qui sont ceux desquels nous parlons) qui n'ait paction arrestee avec le diable, & ne se soit donné à luy. Et pour tesmoignage de ce, ils ont & portent vne marque, que le diable leur a faite en quelque partie de leurs corps, les vns sous la paupiere de l'œil, les autres entre les fesses, les autres au dedans de la bouche, pour estre plus cachee. Biē que quelques personages estimēt que tous Sorciers ne sont pas marquez, mais selon que Satan les pense plus ou moins asseurez & deuots à son seruice, que il les marque, ou non: assauoir qu'il marque ceux dont il se doute, & non ceux qu'il tient pour asseurez. Mais la verité est, que sans exception il les marque tous, en les baissant & mordant: parce qu'il leur veut faire entēdre par ce moyen, qu'ils sont pour l'aduenir à luy. Or pour conoistre cete marque & empescher leurs poudres, les iuges bien instruits font tondre & abatre d'vn rasoir le poil qu'ils portent par tout le corps. Ainsi donc ces Sorciers ont alliance & paction avec le diable, & icelle iuree, mutuelle & reciproque: c'est à dire telle, que comme ils s'assuiettissent & donnent au diable, aussi le diable de sa part promet les secourir, aider & suruenir lors qu'ils le requerront & le prieront. Partant suyuant cete promesse que le diable leur a faite, il besongne & s'employe pour eux & à leur requeste.

A. Mais attendu que Satan est vn menteur
& mesme

& mesme pere de mensonge, commēt leur tiendroir-il sa promesse? il seroit donc veritable.

T. Satan n'est pas tousiours menteur, encore qu'il soit tousiours trompeur: mais il dit verité quelques fois, pour tromper & abuser davantage ceux qui le croient: & tient quelques fois sa promesse, pour nous persuader qu'il n'est pas vn trompeur. Quand Satan a dit à nostre Seigneur Iesus Christ, Tu es le saint de Dieu, Marc 2. vers. 24. il disoit vray: & toutesfois pour cela son intention n'estoit pas de bien faire à ceux qui l'oyoyēt. Quand le mesme Satan disoit de Paul & de Sylas, *Ces hommes ci sont les seruiteurs du Dieu souverain, qui vous annoncent la voye de salut* il disoit vray & n'estoit pas menteur: combien qu'il dist cela pour estre creu, & puis pour tromper plus aisément, Actes 16. verset 17. Ainsi quand Satan tiēt sa promesse aux Sorciers, c'est pour les mieux entretenir & tromper davantage.

A. Poursuy donc à m'enseigner & discourir le moyen, par lequel les Sorciers besongnent par la suggestion & leçon que leur donne Satan.

T. Satan donc commence par là, de faire iurer premierement ces pources miserables, & promettre qu'ils renoncent au Dieu viuant leur propre createur, seigneur, & dominateur du ciel & de la terre, des abysses & de l'enfer, pour luy servir, à luy qui est Satan & le diable: car il se declare à eux franchement estre tel, sans le dissimu-

ler, & pour auoir leur recours & assurance en luy seul. Cete renonciation au Dieu viuant, est la premiere entree & reception que Satan fait de ces malheureux. Puis les ayant ainsi receus, il leur demande s'ils veulent quelque chose de luy: & lors leur enseigne à se venger de ceux qu'ils hayssent. Et leur baille ou fait bailler poudres, racines & autres drogues, pour tuer ou empoisonner de gayeté de cœur tout ce qu'ils voudront, soit homme soit beste. Et notez que ce Sorcier ainsi receu, deux ou trois iours apres, en signe de vray hommage fait quelque present à Satan son maistre, car il luy dōne ou vne poule, ou vn chat, ou quelque autre chose. Qui est encores la ratification de la renōciation faite de Dieu son createur, & comble du mal. Quelque temps apres, pour sauoir d'eux comment ils ont fait valoir & employé les drogues qu'il leur a baillées, & accompli son commandement de tuer, & empoisonner & se venger, il les conuoque & assemble en certains lieux, qu'il leur nomme & assigne luy-mesme, & le temps aussi qu'il luy plaist aduiser, sans auoir rien de certain ni ordinaire sur cela, sinon quand, autant & où bon semble à ce maistre: & les vient semondre & aduertir quelquesfois luy-mesme, leur aparoyssant en personne pour les appeler & se representant à eux en forme d'homme, ou telle qu'ils le peuuent recognoistre: tellement qu'en vne grande compagnie d'autres personnes, le seul Sorcier recognoit cet homme,
les au-

les autres non, encore qu'ils voyent vn homme là : mais ils ne fauent qui il est ni pourquoy il vient, comme fait bien le Sorcier, deuenu son deuot & seruiteur. Quelquesfois Satan fait sommer & appeler à ces miserables synagogues, ses detestables escoliers par leurs propres compagnons, & par autres Sorciers, auxquels il en donne charge, sans en prendre la peine luy-mesme. Or eux estans, appelez y comparoissent. Que s'ils prennent excuse de la longueur du chemin, ou pour quelque infirmité ou debilité de corps, ou pour crainte d'estre veus & apperceus en allant, luy-mesme promet les accommoder de monture, ou autre moyen aisé pour y aller : ou de les porter luy-mesme au lieu assigné, ou leur bailler des bastons, graisses & oignemens : les assurant que s'ils s'en frotent le corps, ils iront aisément, ou qu'ils seront inuisibles tout le long du chemin & ne seront aperceus d'aucuns : bref, que par ce moyen cōmodement & sans grand peine & trauail, ils feront le chemin qu'il leur commande faire. En cete façon donc ce mal-heureux ennemi du salut des hommes, tasche à remedier aux excuses des Sorciers, & à la peur & crainte qu'ils peuuent auoir, pour les rendre inexcusables, & les auoir & retenir tousiours de mieux en mieux en sa deuotion & en ses liens. Or estans ces Sorciers ainsi assemblez, luy comparoist en diuerses formes : car il leur aparoist vne fois en forme d'homme, vne autre fois en forme de bouc, vne autrefois autre-

ment selon qu'il luy plaist: leur fait renouueller ce serment, de le tenir tousiours pour leur dieu, dansent autour de luy, luy font hommage en la façon qu'il leur commande pour lors, chantét quelquesfois quelques choses en sa louange:&le tout ainsi fait, luy leur demâde derechef dequoy ils ont afaire, & dequoy ils luy veulent faire demande & requeste: les oit & leur donne encore selon leur volonté mauuaise:à l'vn vne drogue& poison desia tout fait & cōposé, pour empoisonné celuy qu'il hayra & ce qu'il voudra:à l'autre il fait vn enseignement du moyen de faire vn bon poison & bien venimeux. Aux autres il dōne certains mots ou figures & caracteres, leur faisant acroire que par la vertu & force d'iceux, ils font & sauent ce qu'ils veulent faire & sauoir, ou empoisonneront ce qu'ils voudront empoisonner: & leur promet par pactiō & acord fait entre eux son secours, alsistâce & sa puissance en cela. Brief, le moyen par lequel les Sorciers besongnent, est en partie par poisons clairs & manifestes, & mixtions tenues pour certain, & par iugement des medecins mesmes, mixtions empoisonnees& drogues meschantes, & en partie sans moyē qui nous semble & soit conu propre pour empoisonner, ou qui nous soit mesme euident & visible. Quant aux drogues veneneuses qu'ils donnent, les medecins les conoissent & l'afferment: car ils recueillent par les propres confessions que font les Sorciers, declarans souuentefois les choses dont ils ont

ont fait leur onguët, & p lesquelles ils ont enforcé & empoisonné ceux qu'ils ont tuez, ou que ils tiennent malades & allégorez. Quant aux empoisonnemens faits par ces meschans, par vn moyen qui ne nous semble pas propre, ou que nous ne voyons pas, comme pour auoir seulemēt soufflé contre nostre visage: cela ne doit estre trouué estrange: car c'est dautant qu'ils ont lors quelque meschante herbe, drogue ou racine en la bouche, qui leur a esté baillee par le diable, par la force & puanteur de laquelle ils nous donnēt ce mal. Et quāt à ce que quelquesfois eux-mesmes ne nous touchēt pas, & ne laissent de nous empoisonner: cela se fait par vne drogue, ou haleine, ou racine que Satan nous iette à leur priere & requeste. Et le fait Satan ainsi en vertu de la paction & promesse qu'il leur a faite. Car luy-mesme en cela execute leur volonté, & se fait leur valet & seruiteur.

A. O que tu m'as dit choses horribles, Theophile mon ami, & le cœur me fremissoit & trembloit dedans moy, quand tu me racontois toutes ces diaboliques & abominables façons, par lesquelles les Sorciers apprennent à mal faire: mais d'où les fais-tu?

T. D'une infinité de proces qui desia leur ont esté faits, ou tout ceci est contenu en leurs responses, & confessions, & l'affirment aussi estre vray.

A. Quant à moy, il m'est aduis qu'il y a deux

ou trois points impossibles en ce que tu me viés de dire.

T. Qui sont-ils?

A. En premier lieu, ie croy: & me persuade bien que le diable peut apparostre en forme d'homme: car autrement il nous faudroit denier l'histoire de la tentation de nostre Seigneur Iesus Christ, faite par le diable, apparostant visiblement & corporellement en forme d'hōme à Christ cōme les bons anges ont apparu aux vrais seruiteurs de Dieu leur citans enuoyez. En secōd lieu, i'accorde que les Sorciers ne peuuent rien apprendre de satan, qu'à mal faire: comme est d'empoisonner, de se venger, de tuer leurs ennemis, & de faire comme lui, qui est menteur & homicide du commencement: & aussi que, comme dit S. Iean 8. chap. ver. 44, & 1. Iean 3. ver. 10, ceux qui se vengent & haïssent leur frere, sont enfans du diable: & Dieu au contraire, nous commande d'aimer d'une sincere & vraye charité nos propres ennemis, en S. Matth. 5. chap. vers. 44. Ie croy bien tout cela estre vray.

T. Quest-ce donc que tu ne crois pas, mais pen-
ses estre impossible en ce que ie t'ay dit?

A. Premièrement ce qu'ils dient, assauoir, qu'ils se trouuent veritablement & en corps en telles assemblees & synagogues: secondemēt, que satan les y puisse porter: tiercement, que sans vrais poisons & sans moyēs & drogues appliquees par eux-mesmes ils puissent empoisonner quel-
cun

cun: car ie ne croy nullement, que par paroles, figures ou caracteres ils le puissent faire.

T. Ie respondray à ces trois points & à tes trois doutes par ordre. Or quant à la premiere, tu ne crois point, dis-tu Antoine, que les Sorciers soyent presens personnellement & en corps, és assemblees & Sabats, comme on les appelle, où ils se vantent d'auoir esté. Cōment donc penses-tu qu'ils y ayent esté?

A. Par fantasie seulemēt & par imagination d'esprit, cōme souuēt nous croyōs en dormāt auoir veu & parlé à quelcū la nuit, qui estoit toutesfois à plus de cent lieues loin de là. Et se fait ceci en ces Sorciers, à mon aduis, par illusion du diable, cōme souuēt il nous abuse: de maniere que nous croyons certainement voir, toucher & manier ce que nous ne voyons ni ne touchons point. Toutesfois, & afin que tu ne me penses parler sans raison, ie te di que plusieurs gens doctes l'ont ainsi creu, & le croient encores comme ie fay: auaoir que tout ceci n'est qu'une vaine & sole imagination d'esprit, & nō presence corporelle. Tu m'as allegué ci dessus toy mesme l'opinion de sainct Augustin, touchant ceux qui pensent auoir esté faits loups par enforcelemēs, laquelle tu as prise du liure 18. de la Cité de Dieu: où il dit que c'est seulement la fantasie de l'homme, qui est vne des cinq parties & facultez de l'ame ou du cerueau, laquelle lors est ainsi troublee & empeschee par l'art du diable, & les sens assopis & retenus. Que

si le vin fait voir aux yurognes vne infinité de choses qu'ils ne voyent point : si la melancholie, qui rēd les hommes fols, fait croire aux insensez que ils sont ce qu'ils ne sont pas : à plus forte raison Satan par ses illusions, peut faire acroire à plusieurs, qu'ils sōt où ils ne sōt pas. Car il peut troubler les sens & humeurs de l'hōme, comme Thomas d'Aquin le tient : & le dispute saint Augustin au liure 7. de ses commentaires sur le Genesē, à la lettre, chap. II. & en vne siēne epistre à Nebride son grand ami, qui est la 72. en nombre, où il dit qu'il y a trois sortes de choses que la fantasie conçoit & represente, a sauoir celles qu'elles a veuēs quelque fois, celles qu'elle a pensees & imaginees elle mesme sans iamais les auoir veuēs, & celles qu'elle a receues & entendues des autres estre telles par raison & argumens. Or les imaginations des Sorciers sont du second genre, a sauoir de celles que la fantasie de l'homme pense d'elle mesme. Et pour confirmation plus ample de cela, le mesme saint Augustin, en l'epistre 101. à Euode, touchant les visions prodigieuses, dit, quād elles nous aparoiissent si viuemēt, que nous croyons à la verité auoir veu choses si estranges, l'ame ne sort pour cela de nostre corps, & ne va pas peregriner & courir aux lieux où nous pēsons auoir esté, ains demeure dedans le corps : & y demeurant, elle void, par le moyen des objets qui luy sont presentez, tout ce que nous disons auoir veu : seulement nos sens corporels sont assoupis dedans

dedans nous, pour ne nous reueiller cependant que ceste vision passe: & croyons neantmoins auoir veu à la verité tout cela, ou parlé, ou beu, ou mangé, ou dansé, d'autât que l'obiet qui nous a esté representé, a esté merueilleusement vif & puissant. Les exemples en sont si communs que rien plus. Ledit S. Augustin en l'epistre 100, parle d'un certain medecin de Chartage, nommé Gennade, qui doutant s'il y auoit quelque autre vie que ceste-ci, auoit esté en songe si viuement frappé d'une vision, qu'il pensa & creut par deux fois auoir esté mené en un certain lieu, où il auoit ouy chanter les anges: & toutesfois son corps, comme il confessoit luy mesme, estoit demeuré en sa chambre, & couché en son liect. Aussi le mesme S. Augustin, au liu. 18, de la Cité de Dieu, cha. 18, raconte d'un quidam, qui pensa fermement auoir communiqué la nuit avec un Philosophe Platonique, & auoir appris de lui l'exposition d'un passage de Platon, qu'il n'entendoit pas auparavant. Il est escrit en la vie des peres, d'un qui non seulement de nuit, mais qui en plain iour pensoit, quand il voyoit sa fille, qu'elle fut vne vache: & ne la voyoit autre que vache, combien que Machaire qui la voyoit, la voyoit fille & non vache. Bref, n'as tu pas leu quelquefois, Theophile, au liure 6, d'un ceuvre appelé Les iours Geniaux d'Alexandre, chap. 21, d'un certain criminel, qui pensa auoir esté par trois iours aux enfers, & en dit des nouuelles à son Iuge, luy reuelant un secret qu'hō

me viuant n'auoit seu? Et au Canon Episcopi 26, Question 5, qui est pris du Concile d'Aquilee, il est notamment dit, que toutes telles vanteries des Sorciers & Sorcieres, qui dient auoir esté en telles assemblees, sont seulement folles imaginations d'esprit que satã leur fait auoir, & que leurs corps ne bougent de la maison. Pour conclure ma doute, voici les propres mots, soit de S. Augustin, soit qu'autre soit auteur du liure intitulé De l'esprit & de l'ame, chap. 28. Et pourtant, dit l'Auteur, les diables font quelques choses qui sont admirables aux hommes, par lesquelles ils les attirent & deçoient: & de la aduient que quelques femmelettes fragiles suyuent Satan, estans trompees par les illusions & phantosmes qu'il leur presente. Lesquelles assurent & croient, qu'elles vont à cheual la nuit, en la compagnie d'une certaine Diane, deesse des Payens, ou avec Herodias, ou Minerve, en grande troupe d'autres femmes: & qu'elles sont toutes au commandement du diable. Car Satan qui se transfigure en ange de lumiere, apres qu'il a gagné ces femmes, & qu'il les a fait siennes par leur infidelité, se trāsforme en diuerses figures, & ressemblances de diuerses personnes, abuse ceux qu'il tient ainsi captifs, & leur monstre en songe choses tantost ioyeuses, tantost tristes: & mesmes leur fait voir plusieurs personnes, quelques vnes desquelles ils ont cognues, les autres non, & les pourmeine en songe par lieux esgarez. Et combien que l'esprit seulement de ces infideles void ces choses, toutesfois on estime que ce n'est pas seulement à l'esprit, mais
aussi

aussi au corps & aux sens que telles choses aduenient, & se presentent. Mais celuy me semble estre trop sot & hebeté, qui pense que ces visions, qui se font seulement en esprit, se voyent aussi par les sens du corps: veu qu'Ezechiel & les autres Prophetes, mesme Iean l'Euangeliste, & les Apostres ont veu en esprit, & non en corps, les visions qu'ils racontent. Que veux tu, Theophile, plus formel pour moy, & plus contraire à ton dire, que cete autorité-ci? Que si tu me respons maintenant à tout cela, Theophile, ie croiray que les Sorciers se trouuent en corps es assemblees dont ils parlent.

T. Que ce poinct soit incroyable à quelques vns, Antoine, & aussi que quelques fois ces Sorciers pensent estre où ils ne sont pas, ie l'accorde: mais ie nie pourtant qu'il soit impossible & faux qu'ils n'y soyent quelque fois. Et de faict, ceux qui nient ainsi asseurement que les corps soyent là, ils parlent plus hardiment qu'il ne faut. Car l'experience mesme, qui se void, monstre le contraire. Ne s'est il pas trouué des personnages qui par curiosité ont voulu voir ces assemblees, & y sont allez de fait, lesquels se sont trouuez personnellement en leurs propres corps sur les mesmes lieux où telles cōgregations se faisoient, dont ils sont retournez à leurs maisons à grand peine & travail de chemin? Comme vn qui s'est trouué en la ville de Neuers, ayant esté inuité d'y aller par vn payfan son metayer: & depuis vn gentilhomme au pays de Poitou s'y trouua, pour y voir vne da

moiselle qu'il aimoit. Comment les Sorciers remarqueroient ils les lieux, les personnes, conteroient ils combien ils sont, sauroient ils les noms, noteroient ils les chesnes & autres arbres qu'ils y voyent, s'ils n'y estoient en personne? Pourquoy sortiroient ils de leur logis, ou de la ville auant les portes fermées, auroient ils peine à marcher, & comment en reuiendroyent ils visiblement & personnellement, s'ils n'y estoient & alloient en personne & non par imagination & fantasie seulement? l'experience & le tesmoignage donc & confession que font les Sorciers, nous assure du contraire de ton opinion : & de penser que ce sont vanteries qu'ils font, elles leur sont trop dangereuses. Car ils le cōfessent lors qu'il est question de les mener au gibet, & que cela ne leur peut plus seruir, ains seulement nuire, & lors mesmes qu'ils se repentent d'auoir fait cela. Dauantage, comme escrit quelque part le bon pere Athanase, assauoir au liure de l'Humanité de la parole de Dieu, nos pensées & imaginations quelques puissâtes quelles soyent, ne transportent nos corps de lieu en autre ni ne touchent les autres qui en sont loin. Je t'accorde bien qu'il y a d'autres choses que Satan nous represente, par vne seule illusion & imagination que nous auons : mais pour cela conclure que les Sorciers, qui inuitez vont à leurs assemblees, n'y vont que par fantasie, ie te nie la consequence car ils reuiennent en personne de ces lieux-la: donques ils y estoient allez en person-

personne: & sont leurs corps aussi bien absés que leur ame, du lieu où ils demeuroyent & estoient auparauant. Qu'ainsi ne soit, celui que tu as allegué dernier, & qui estoit criminel, & alla aux enfers, comme il est escrit au passage que tu as coté toy mesme, fut deux iours veritablemēt absent, & ne le peut on trouuer en toute la prison, quoy qu'il y fust diligemment cherché, Il y a bien des choses qui ne peuuent s'accorder avec la nature de nos corps, & que satā nous presente & fait voir quelque fois, mais par illusion & imagination seulement: comme de cheuaucher la Lune, nous faire voir les xii. Preux, ou Medee, Herodias, Diane, Mercure, qui sont persōnes desia mortes: ou nous faire parler à vn homme trespasé, ou qui est pour lors du tout absēt & loin de no^s, ce qui est impossible. Desquelles choses seulement parle le Concile d'Aquilee, que tu m'as allegué, & les passages de S. Augustin que tu m'as cottez, & mesme le passage du liure De l'esprit & de l'ame, que tu as tourné en François. Et t'accorde que telles visions qui sont repugnātes à la nature, ne sont que pures imaginations de nos esprits, & illusions que nous fait satā: mais qu'y a il en ces assemblees des Sorciers & moyen de s'y trouuer, qui soit contraire à la nature de nos corps, ou repugnant aux discours de raison? Et mesmes ceux qui afferment ainsi resolutement, qu'en ces rauissemens extraordinaires nos corps n'y sont point du tout, parlent plus hardiment & magistralement que S.

Paul, qui dit ainsi de son ravissemēt (combien que ie te confesse iceluy auoir esté fait de la main de Dieu non du diable, & estre autre que ceux dont ie te parle maintenant, ou desquels tu m'as parlé toy-mesme.) S. Paul donc en la 2. aux Corinth. chap. 12, vers. 3, dit ainsi, *Et say que tel homme (si ce fut en corps, si ce fut hors corps, ie ne say, Dieu le sait) a esté rui en Paradis.*

A. Mais on a trouué quelque fois en leur liēt & chambre, les corps de ceux qui disoyent pour lors auoir esté en telles assemblees.

T. Ie te nie, Antoine, que ç'ayent esté leurs propres corps, qu'on a veu en leurs liēt, mais seulement la semblance de leurs corps. N'as-tu iamais leu ce que fit Michol femme de Dauid, voulāt par finesse celer la fuite dudiēt Dauid son mari, à ceux qui le cerchoyent pour le tuer? 1. Samuel 19. vers. 12: & cōme (combien qu'elle n'vfast point de forcelerie) elle mit vne statue au liēt, & vn oreiller sous la teste de cete statue, & la couurit d'habillemens, pour faire acroire que cestoit Dauid, & fit acroire qu'il estoit là present, & le creurent ceux qui le cerchoyent? Le diable pour cacher ses disciples, & empescher qu'ils ne soyent descouverts, quelquesfois suppose vn corps faux au lieu du vray, qui est absent: & voila d'où vient que plusieurs pensent, mais toutesfois faussemēt, que ces forciers ne sont point en corps en ces assemblees, d'autant que Satan a quelque fois mis & supposé la ressemblance de quelque corps, au lieu

lieu & en la mesme chambre, où lon auoit veu ceux qui vont à telles assemblees.

A. Je l'enten bien: mais en second lieu ie trouue impossible ce qu'ils dient, que le diable quelque fois les y porte, ou fait porter.

T. Penfes tu faux ce qui est escrit de nostre Seigneur Iesus Christ en l'Euangile, que le diable le transporta en Ierusalem sur le pinnacle ou creneaux du temple? comme dit & tesmoigne saint Mathieu, chap. 4. vers. 8, & saint Luc chapitre 4. vers. 9.

A. Nenny: mais ce fut par la volonté de Dieu. & estoit vn fait extraordinaire.

T. Je te l'accorde: mais penfes-tu que ce n'est pas aussi par la volonté de Dieu, & pour exercer ses iustes iugemens contre tels meschans & infideles, qu'il dōne & ottroye au diable de les pouoir ainsi mener, manier, transporter & gouverner. Que si le diable a bien osé toucher vn si saint corps, que celui du Fils de Dieu, sur lequel il n'auoit nulle puissance & obligation: s'il a bien peu enleuer & mener par l'air nostre Seigneur Iesus, il ne craint pas de s'adresser à ces meschans, qui sont desia à luy & corps & ame. Que si Dieu a bien dōné au diable puissance sur l'ame de ces meschans Sorciers, pour leur persuader d'abandonner leur createur: à plus forte raison il donne au mesme diable puissance sur leurs corps pour les pouoir porter & manier Car comme tu vois en l'exemple de Iob, Dieu n'abandonne si volontiers au

diable l'ame de ses creatures, comme il fait le corps, Iob 2. vers. 6. Dauantage, le diable ne les porte pas tousiours, mais quelquefois seulement pour leur oster leur peur & leurs excuses.

A. Mais il leur feroit luy-mesme plus grand peur apparoissant à eux pour les porter.

T. Ouy bien s'il aparoissoit en quelque forme aussi horrible qu'est sa nature & nature, d'ange maudit; mais il se deguise, & prend vne autre forme. Car luy, comme ange, ne peut estre veu, d'autant qu'il est esprit inuisible; mais comme quand il parle du commencement aux Sorciers, il se presente à eux en habit & figure d'homme, aussi quand il vient pour les porter & enleuer, il se presente en forme de cheual, de mulet, d'oiseau ou autre forme. Quelquefois mesme il les porte sans estre veu, leur baillant seulement vn baston entre les iambes, & faisant accroire que le baston les porte: comme sa puissance, estant prince de l'air ainsi que dit S. Paul aux Ephe. 6, vers. 12, surpasse bien la nostre, & besongne inuisiblement & plus agilement.

A. I'ay bien ouy parler d'un Abbé nommé Brunon, qui se fit transporter en vn moment de Piemont à Rome par vn diable; aussi d'un nommé Theophile, duquel on conte choses semblables. Mais penes tu que cela soit vray?

T. Je ne say pas si ce qu'on dit de ceux-la est veritable: mais ie say que si le diable, par l'ottroy de Dieu peut blesser & destruire nos corps, comme il

me il se void en l'histoire de Iob, à plus forte raison il les peut aussi, par le mesme ottroy, porter, enleuer, charger & manier comme le loup fait la brebis qu'il a prise & tient entre ses dents: non que pour cela il soit cheual, ou mulet, ainsi qu'il apparroist: mais s'il se peut, comme dit S. Paul en la 2. aux Cor. 12, vers. 1. 4, transfigurer mesmes en Ange de lumiere, il se peut donc bien transfigurer en ces formes-la. Car il luy est plus contraire & malaisé de contrefaire le seruiteur de Dieu & la lumiere, que d'emprunter l'apparence extérieure d'un homme, d'un mulet, d'un bouc & d'un cheual. Mesmes Alexand. que tu m'as allegué toy-mesme, en ses iours Geniaux, liure 4. chap. 19, escript d'un certain moine nommé Thomas, homme cogneu veritable, que s'estant quelque fois courroucé amèrement contre les autres moines, & s'estant incontinent retiré en vne solitude, vid le diable en forme d'homme, qui s'apparut à luy: mesme le pensant gagner, l'accompagna long temps, & le passa un gros ruisseau, le chargeant sur ses espaules.

A. Mais est-il possible que satan les puisse transporter si tost, & si loin?

T. N'ay-ie pas desia allegué ce qui est escript de Iesus Christ nostre Seigneur, en S. Luc, 4. v. 5. que le diable l'enleua, le transporta, & luy monstra en un moment de temps tous les royaumes de la terre? Et de faict, ie ne say, Antoine, pourquoy tu doutes de cela, veu l'agilité & vifesse

dont le diable peut vser en tous ses mouuemens & actions: car rien ne le peut empescher, & ne luy est penible, ni malaisé de fendre l'air comme il nous est quand nous courons, pour la subtilité de son essence: car il est esprit. Et pourtant S. Augustin au liure de la Diuination des diables, chapitre. 3, dit qu'ils surpassent de viftesse la course des plus legers hommes ou bestes du monde, voire mesme des plus legers oiseaux qui soyent en l'air: & suyuant cela Thomas d'Aquin, en sa Sûme 110. quæst. 3, dit, que les corps luy obeissent, afin qu'ils se puissent mouuoir entre iceux plus aisément. Et afin que tu n'en doutes plus, ie te veux alleguer les exêples de cela, confessez mesmes par les Payens. Y a-il histoire plus celebre que l'enleuemēt de Romulus, qui a esté le premier fondateur de Rome, qui fut fait par le diable, pour les superstitions, deuinations, brigandages, rauissements de femmes, & meurtres horribles, ausquels ce 1. roy de Rome fut adonné? Car combien que les autres recitent autrement la façon dont il mourut: Plutarque toutefois auteur sur to^r croyable, & docte entre tous historiens Grecs & Latins, maintient cete-ci estre la vraye, en la vie qu'il a escrite dudit Romulus: assauoir, qu'un certain iour ledit Romulus fut enleué du diable en la veuë & presence de tout son peuple, avec lequel il estoit assemblé. Et pour monstrier que ce fut le diable, les circonstances & choses aduenues en son rauissement & enleuement sont adioustees

stees. Vn gros brouillart d'oc suruint, aussi espais que tenebres de la nuit, avec lequel estoient meslez grandes foudres, tonnerres, & tempestes de forts vents, qui estonnerent tellement tout le poure peuple qui estoit là assemblée, qu'un chacun s'enfuit tout espouuanté. Voila vn bel exemple & tesmoignage d'un enleuemēt & emportemēt de corps fait par le diable. Mais au mesme lieu Plutarque en adiouste deux autres: le premier, d'un quidā nommé Aristeus, qui estoit de nation Proconnesien: & le second d'un nommé Cleomede Astipaleen. Cet Aristeus fut en vn momēt & subitement ravi par le diable, & pris de l'ouuroir d'un foulon où il estoit, & transporté tout soudain iusques en Italie, en la ville de Crotone, qui est en Calabre, où il fut veu & parla à plusieurs. Cleomede estoit homme grād comme vn geant, violēt & meurtrier: lequel ayant esté cause de la mort de plusieurs petis enfans, & poursuyui par les peres d'iceux qui le cerchoyent pour le tuer, se cacha dedans vn grand coffre, qu'il ferma mesmes sur soy: mais le coffre étant aussi tost rōpu & brisé par ceux qui le poursuyuoeyēt, Cleomede ne s'y trouua ni mort, ni vif: car il auoit esté enleué de là par Satan. Je t'allegueroye l'exemple du Pape Alexandre VI. qui est tout notoire & certain, & lequel fut vn Sorcier & ravi du diable: mais tu penserois que ie disse cela en haine des Papes, lesquels ie hay & deteste. Tu vois donc par les raisons & exemples susdits, qu'il est fort

aisé à Satan, qui est ange de sa nature, d'enleuer, & transporter nos corps. Comme pour cela ie te puis alleguer ce qui est escrit en l'histoire de Susanne, vers. 35, de Habacuc, qui fut transporté & enleue par vn ange, depuis Iudee iusques en Babilone, en vn instant. Mais ie croy que tu ne doutes plus de cela.

A. Pourquoi donc les fait-il greffer d'huiles, ou autres oignemens?

T. Il ne commande pas cela à tous, mais à quelques vns seulement, qui sont plus craintifs & douillets ou delicats, comme sont les femmes, afin d'assoupir & endormir leurs sens: & ainsi les emporter sans qu'ils s'effrayent, ou qu'ils sentent aucune douleur, ou ayent quelque crainte de se voir ainsi enleuez & portez. Car la gresse dont Satan leur commande d'vser, ne sert de rien à ce mystere, sinon pour les amuser & abuser: ou bien si cete gresse sert, c'est pour stupefier ou endormir leurs sens, pour ne sentir ne mal ne peur aucune. Et c'est Satan qui les enleue lui mesme & les porte, combien qu'en leur donnant ces drogues, il contrefait malicieusement l'ordonnance de Dieu touchant les Sacremens & signes exterieurs que Dieu nous a donnez pour en vser: & tousiours persuade d'autant mieux à ces malheureux, de se fier aux moyens & choses qu'il leur donne, par la vertu desquelles ils se pensent voler ou estre faits invisibles: toutesfois, comme i'ay dit, c'est satan qui lui-mesme prent la peine de les porter à son col.

A. Ie

A. Je ne veux point de tel vallet,

T. Ni moy aussi, Antoine. Mais maintenant crois-tu ce que ie t'auoye dit?

A. Vrayement tu me le persuades: seulement respon à ma derniere & troisieme doute.

T. Quelle est elle?

A. Si ces Sorciers peuuent tuer, empoisonner ou mal faire seulement par charmes & paroles, figures ou caracteres, & sans dōner du poison, ou sans adiouster & vser de quelque moyen entreuenant & appliqué reellement à la personne empoisonnee. Car ie croy bien, quand le diable leur a donné ou enseigné de faire de vrais poisons, que ils peuuent empoisonner: & ne doute point que le diable ne les sache bien. Car il fait & cognoit la nature & vertu des choses créées de Dieu: & qui plus est, S. Augustin l'atteste au liu. de la deuination des diables. chapitre 3. Mais que les Sorciers puissent besongner & empoisonner sans poison appliqué reellement, ie ne le puis encore croire: car ni les paroles, ni les figures, ni les nombres ne sont faits pour empoisonner les hōmes, ains pour autre fin: cōme mesme Arist. quelque part se moque de telles opinions. Et puis il est tout certain par les regles de la phisique, que nulle action ne se fait, sans qu'il y ait quelque moyen propre & apte qui entretienne, & soit appliqué au patient qui endure. Car en toute action physique & naturelle, il faut necessairement que les bouts & extremittez de celui qui agit, & de celui

qui patit, se baissent, ioignēt & entretouchēt l'un l'autre. Exēple, Quand tu me frapes, ta main me touche: quand le feu me brusle ou il me touche, ou bien il eschauffe l'air qui me touche. Chose qui ne se fait, quand on vse seulemēt de paroles, figures, ou caracteres pour blesser & empoisonner. Ce que Pline aussi nie tout à plat avec moy, au liu 28, de son Histoire naturelle, chap. 2. encore qu'il montre que cete question a esté fort debatue entre les Payens, mais à la fin il conclud ainsi. Tous les plus sages ont nié que les paroles & enchantemens puissent rien servir à faire guerir ou malade quelqu'un.

T. Tu es plus sauant, Antoine, que ie ne pensoye. Au commencement de nostre propos tu me parlois des petites escoles, maintenant tu te mōstres estre bon Physicien: toutes fois ie respon à ta doute & à ta raison. Et premieremēt, nies-tu ce qui est escrit au Pseau. 58. vers. 5. 6, touchant le serpent caut? *Tel n'oit la voix magique de l'enchanteur, tant soit-il caut: ains bouche son oreille contre tel chant de peur d'estre charmé.*

A. Nenni.

T. Tu ne saurois donc nier qu'on ne puisse charmer, enchanter & nuire par le seul chant, ou par la seule voix.

A. Mais que cela se face sans moyen, comment feroit-il possible?

T. Aussi ne se fait-il pas sans moyen propre & apte à faire le mal, & mesme appliqué sur le patient: mais

mais le moyen de cete execution, qui se fait, nous est caché & incognu, & au Sorcier mesme. Car c'est le diable en personne, qui par drogues & moyens propres execute ce que le Sorcier demande, encores qu'iceluy diable ne soit veu & ne semble entreuenir en cet afaire: mais qu'il semble qu'il n'y ait qu'un chant, ou qu'une nue figure dont le Sorcier vse.

A. Comment cela?

T. Parce que Satan, en vertu de la promesse & paction qu'il a faite à tels siens seruiteurs & deuots, comme ie t'ay desia dit, se fait leur seruiteur lui-mesme: & execute, eux vsans de telles paroles ou figures qu'il leur a commandees & recommandees, ce qu'ils veulent executer, pour sembler estre puissant & veritable en ses promesses, & leur faire accroire que ce qu'il leur donne est trespropre & de grande vertu, & par ce moyen les enlancer tousiours de mieux en mieux en ses laqs. Bref pour leur faire par ce moyen plus deuotement & religieusement adorer les creatures, & delaisser le createur d'icelles. Et par cecy mesmes il cōtrefait les saints mysteres & Sacremens, que Dieu a donnez à son Eglise pour tesmoignage de ses graces, confond & vilipēde leur autorité, certitude & valeur, pour faire attribuer à certains signes & inutiles elemens, l'honneur qui est deu à la chose signifiée, & les faire adorer.

A. Ce n'est donc pas par les paroles qu'ils empoisonnent, ni par les figures: mais par

moyens secrets & propres, que Satan emploie sans le faire sauoir au Sorcier mesme.

T. Tu le comprends bien. Ne plus ne moins que deux brigans qui sont en vne mesme forest, & qui entendront le sifflet l'un de l'autre tuent le marchant. Car si l'un siffle, incontinent l'autre ou apparoit, ou depesche ce dont le signe lui est donné, sans que son compagnon qui l'a signé le voye & sache de quelle façon ni instrument l'autre tue & coupe la gorge du poure passant: ou comme vn seruiteur qui suiura son maistre, & qui lui a promis de massacrer celui qui sera derriere sondict maistre, si tost qu'il en aura entendu le signe: ainsi Satã execute à ce signal de paroles & figures qui lui est donné du Sorcier, ce que le Sorcier veut faire, pour entretenir sa promesse, & obliger à soy d'autât plus ce poure miserable. Et te di bien dauantage, Antoinne, assauoir, que toutes ces figures & caracteres dont Satan commande d'vser, ne sont qu'amusemens seulement & mines, qui ne seruent de rien ni aux autres, ni à lui-mesme, pour faire & executer ce qu'il fait, sinon pour vn simple signal de la volonté du Sorcier qui par ce moyen se manifeste. Mais comme les ioueurs de passe passe & de gobelets amusent le monde, qui les regarde, par certaines mines, remuemens de mains, & paroles qu'ils dient quand ils font sortir du sang de leur frôt, ou qu'ils trouuent cinq cailles ou ils n'en auoyent mis que trois, afin que la subtilité de leurs mains, dont ils s'aident

s'aident seulement pour faire tout ce mistere, ne soit point aperceüe du peuple, & qu'on ne puisse cognoistre comme ils ont mis subtilemēt deux cailles qu'ils tenoyent entre leurs doigts, avec les trois autres qu'ils auoyent desia presentees sur la table. Ainsi Satā pour amuser ses malheureux escoliers, & les empescher de s'enquerir & vouloir sauoir comme & par quel moyen il fait ce qu'il fait, les arreste à certaines figures, mots prononcez, nombres, figures & caracteres: ce qui ne sert de rien toutesfois ni à la matiere, ni pour l'execution de ce qu'il fait, mais sert seulement, comme i'ay dit, d'amusemens & de mines.

A. Comment est-ce donc que Satan besongne, quand il semble que ce soit par charmes, paroles, nombres, caracteres & figures, & fait ce qu'il fait, ou bien le fait faire à ses miserables disciples & Sorciers?

T. Il besongne seulement par causes & choses naturelles, & non autremēt. Car tout ce que Satan fait ou par soy-mesme, ou par les siens, est ou vne pure & fausse illusion des yeux, ou seulement vn effect produit des causes & choses naturelles. Car il ne peut faire autre chose, ni besongner plus puisamment.

A. Mais ne peut-il pas faire des miracles cōme dit S. Paul 2. Thess. 2. vers. 9. & comme il est dit en l'Apocalip. 16. vers. 14?

T. Qu'appelles-tu Miracle?

A. I'appelle miracle vn œuvre qui est fait con

tre la force & vraye nature & propriété que Dieu a donnée aux choses par luy créées: comme quand le fer, qui de sa nature est pesant, nagea sur les eaux: ce que fit Elisee 2. Rois 6. vers. 6. comme quand vn mort ressuscite, & comme quand l'eau deuient & est veritablement changee en vin, ce que fit nostre Seigneur Iesus Christ en la ville de Cana, Iean 2. vers. 1. tout cela est miracle.

T. Tu as vrayement dit & defini que c'est que Miracle: car comme escrit S. Augustin, ce seulement doit estre appelé Miracle, qui est vn œuvre tellement difficile, qu'il surpasse les forces & puissances de toutes les natures créées: c'est à dire, que toutes les natures créées ne sauroient faire, & partant est fait seulement par la force. & puissance d'un seul Dieu. Voila à la verité comme, & ce qu'il faut appeler Miracle. Mais S. Paul ni l'Apocalip. aux passages, que tu mas allgué, ne le prennent pas si estroitement & rigoureusement, ains pour tout œuvre qui est admirable, estrange, & nouuel aux hommes, encore qu'il puisse estre fait par quelques causes naturelles, si elles nous sont inconues, ou le moyen de ce faire inconeu. Partant S. Paul le prent pour ce que nous disons plus generalement, *Merueilles*. Car touchant ce que nous deuons proprement appeler Miracle, & que tu as defini toy-mesme ci-dessus, le diable n'en sauroit faire.

A. Comment donc? y a-il difference entre ce que nous deuons proprement appeler Miracle, & *Merueilles*?

T.

T. Tres-grande, & quand au mot, & quand a la chose. Car Miracle, s'appelle en Latin *Miraculum*: Merueille se nomme en Latin, *Mirum*. Comme il se peut recueillir de S. Augustin au liure 3. de la Trinité. Merueille donc, est vn œuvre qui est fait & produit des causes naturelles : mais ou qui nous sont inusitées & incognues, ou bien par vne ordre & voye, dont nous hommes nous ne pouuons vsfer. Exemple, Quand Architas Tarentin, grand Philosophe faisoit voler en l'air vne colombe de bois, c'estoit Merueille, & nō Miracle. Car il faisoit cela par certains mouuemens, & contrepoids qu'il donnoit aux membres de cete colombe, & le tout par raison & causes naturelles. Quand le mesme faisoit, qu'vn seul homme pouuoit enleuer de la mer vn grand nauire, comme dit Plutarque en la vie de Marcellus, c'estoit merueilles & non Miracle Car cela se faisoit par causes naturelles. Ainsi les medecins, ainsi les ingenieux font vne infinité de choses. Or quant aux merueilles, Satan en peut faire & bien aisément, & en comparaison de ceux que les hommes font, de si excellens, qu'il n'y a rien de pareil & nous surpasse infiniment.

A. Pourquoi cela?

T. Pour trois raisons: la premiere pour l'excellence de sa nature au regard de la nostre. Car il est ange & spirituel, & nous hōmes de terre & charnels: & partant il peut ce que nous ne pouuons pas. La seconde, pour la celerité de ses actions &

mouuemens: car il fait en vn moment le chemin que nous ne saurions faire en six iours. Et pourtant il est tantost ici, tantost la, sans que l'air ou autre corps l'empesche. La troisieme raison, pour la cognoissance & experience des choses qu'il a infiniment plus excellente que nous. Et pourtāt il fait ce que nous ne sauons pas, mesmes es choses naturelles.

A. Mais pourquoy ne peut-il faire les œuvres qui sont vrais miracles?

T. Parce que premierement il faut pour les faire, abolir & destruire la propriété que Dieu a donnée aux creatures: ce que Satan ne peut. Car comme vn seul Dieu peut creer les proprieté, aussi luy seul les peut abolir. Secondement, parce que pour faire miracle, il faut creer & dōner nouuelle propriété & nature aux choses: ce que Satā ne peut aussi. Car c'est vn seul Dieu qui est Createur des natures & proprieté. Tiercement, le miracle est vn œuvre qui surpasse la puissance de la nature crée, quelque excellente qu'elle soit. Et pourtant S. Pier. Act. 3. v. 12, ayant fait ce miracle de guerir le boiteux, dit ainsi, *Hommes Israelites, pourquoy vous esmerueillez-vous de ceci, ou pourquoy auez-vous l'œil fiché sur nous, cōme si de nostre puissance ou saincteté nous auions fait cheminer cestuy ci? le Dieu d'Abraham & d'Isaac & c.* Partant c'est vn œuvre propre & special à Dieu, lequel ne donne iamais sa gloire au diable.

A. Toutesfois les Anges benits, & les saints
Apo-

Apostres en ont bien fait.

T. Cela est vray. Mais Dieu ne veut communiquer sa gloire au diable en telle façon & mesure qu'il la communique aux saints Anges & à ses vrais seruiteurs. Ce qui appert assez par ce que Moyse & Aaron faisoient des miracles, que les Magiciens de Pharaon, tresexcellens escoliers du diable & besongnants par la vertu d'iceluy, ne pouuoient nullement faire, & qu'ils confessoient estre le doigt de Dieu, & estre contre toute la force & proprieté de nature, en l'Exod. 8. chapit. vers. 18. Et la raison est, que les diables ne pretend pas à glorifier Dieu, comme font les saints Anges & vrais fideles & seruiteurs de Dieu. Partant, combien que Satan ne puisse besongner ni rien faire, sinon autant que Dieu lui en donne la puissance, & quand & où il lui en donne: toutes-foi si ne peut il réuerfer l'ordre de nature qui est establi de Dieu, & besonger par autres choses que naturelles, bien qu'elles ne nous soyent conues: & que l'ordre & la viftesse dont il use, nous fait estimer son œuvre miracle. Comme il serre incontinent & assemble les choses naturelles, qui lui sont necessaires pour besongner. Pour exemple, Il serre incontinent les nuées, & en fait venir la pluye: il assemble en vn instant l'air, & l'espaissit & en fait vn corps: il paistrit & melle les venins ou autres choses, pour faire ce qu'il pretend. Dauantage il besongne, execute & presente ce qu'on lui demande, si viftement que rien plus: mais le tout

par causes naturelles. Et partant cōme ie t'ay dit & conclu, les figures, nombres & caracteres ne font pas cela qu'on fait : mais sont seulement les semonces & les tesmoignages de la promesse & paction de Satan laquelle il execute, & fait luy mesme ce que le Sorcier ou Magicien demande, & veut estre fait, Car c'est satan mesme qui a ordonné ce signal, lequel il ne veut estre trouué faux ni inutile: & partant le tout se fait par l'œuvre du diable, quoy qu'un seul S. Jerome semble en douter. Mais S. Jean Chrysostome le dit ouvertement sur l'epist. aux Gal. ver. 2: & avec lui le concluent bien tous les autres, & Pierre Martir spécialement, sur le 1. liu. de Samuel, chap. 28. Ainsi Satan besongne ayant esgard à sa promesse & paction, C'est cete mesme raisō, pour laquelle les diables sont coniuerez par les Sorciers, ou appelez pour venir parler à eux, d'autant que le diable leur a donné ce signal, auquel il a promis de se représenter, & y vient aussi. Ainsi Numa second roy de Rome, homme enchanteur, si iamaïs il en fut, a souvent par ce moyen parlé, & communiqué avec les diables, comme mesme le recite Plutarque, en la vie dudit Numa. Or ayant maintenant la resolution de tes trois difficultez, que reste-il plus, Antoine?

A. Je te demande si tous leurs poisons sont à mort.

T. Eux mesmes ne le sauvent pas, quoy qu'ils dient: mais vn seul Dieu le fait. Car nostre vie & nostre

nostre mort ne sont ni en nostre main & puissance, ni en la main du diable ou du Sorcier, ains d'un seul Dieu nostre createur: cōme il est dit en l'Ecclesiaste, chap. 8, vers. 9. Toutesfois l'intention des Sorciers est bien de donner leur poison quelque fois à mort: & quand ils sont menassez, ils font tout ce qu'ils peuuent pour l'oster & guerir: & inuoquent de faict le diable à cette fin, mais souuent ils ne le peuuent oster, quoy qu'ils y taschent & le vueillent, & se trouuent eux mesmes trompez. Car l'arrest & le decret de Dieu les empesche, qui a determiné nos iours & nos mois, cōme dit Iob 14. cha. vers. 5. *Ses iours ne sont ils pas determinez le nombre de ses mois est enuers toy tu en as fait l'ordonnance, & ne passera point outre.*

A. Peuuent-ils vser de leurs poisons & facons, quand ils sont entre les mains de iustice?

T. Je croy de ma part qu'ouy, s'ils pouuoient librement communiquer avec le diable, comme ils le font estans en liberté, & s'ils auoyent les mesmes poisons en prison, dont ils vsent, & qu'ils ont hors la prison en leurs maisons. Qu'ainsi ne soit, le diable a estranglé les Sorciers estant entre les mains de la iustice & en prison, estant prié par ces meschans de les faire mourir là, & en a tué de tout condamnez. Toutesfois il me semble pour deux raisons, que les Sorciers ne peuuent, estans bien ferrez en prison, vser de leur malice & façon acoustumee. La premiere pour autant qu'ils n'ont pas là le moyen, ni la

liberté de pouuoir aisément communiquer avec le diable, Et pour bien descouurir vn Sorcier, il luy faut donner peu de liberté, communication ou faueur, afin qu'il craigne de communiquer à son diable. Partant le iuge doit aller & estre à l'improuiste & souuent au lieu où est ledit Sorcier, pour le surprendre s'il parle point au diable. La seconde raison est, que telles gens craignent, qu'estans desia soupçonnez, & en vsant de leurs façons & poisons, ils soyent incontinent surpris, descouverts & conuaincus. Car la chose la plus craintive du monde est vn homme meschant, & sur tous le Sorcier, lequel n'a plus de fiance en Dieu, d'autât qu'il l'a renoncé pour son createur & sauueur.

A. Certes, Theophile, tu m'as tout persuadé ce que tu m'as dit. Et maintenant ie croy qu'il y a des Sorciers, & cognoy que ce sont gens meschans & execrables: & te prie de me dire de quelle peine & punition tu les estimes dignes.

LE CINQVIEME POINCT.

Theophile.



E n'est pas à moy, Antoine, de donner & faire des loix en France c'est à faire au Roy, & ici à la seigneurie: & dauantage, les peines. des crimes sôt arbitraires en Frâce

Toutes-


Toutefois ie te puis dire en vn mot, que tout Sorcier est digne de la haine publique de tout le monde, & pourtant digne de mort : car il est vn ennemi public de gère humain, apostat de la foy Chrestienne, criminel de leze maiesté diuine & humaine, traistre, reuolté & transfuge de Dieu, veu qu'il s'en est enfuy au champ de l'ennemi de Dieu. Bref, c'est vn empoisonneur, & meurtrier diabolique. Partant il doit estre puni & comme meurtrier & cōme apostat, veu qu'il a pris alliance avec le diable, & renoncé son Dieu son createur & son Roy. Et pourtant le Sorcier est condamné à mort en la loy diuine, Deutero. 18, vers. 10. Car tout homme ayant accointance avec le diable, est apostat & transfuge de Dieu: comme qui auroit pris l'alliance de l'ennemi commun de tout le pays. Et en l'Escripture telle rebellion & peché contre Dieu, est estimé & mis entre les plus grands & enormes. 1. Samuel 15, vers. 23. Et pourtant tous les conciles Ecclesiastiques ont condamné les Sorciers, comme celuy de Constantinople tenu au faux-bourg dicelle ville nommé Trulle, article soixante & soixante & vn, & en la cause vingtsixieme, question 1. 2. 3. 4. & 5. au Droit canon. Et quant au Droit ciuil, la loy Iulia, *De maleficiis*, les condamne à mort : & l'Empereur Leon par vne sienne Constitution encores plus recente, qui est la soixantecinquieme en nombre. Et n'y a homme de bon & sain iugement qui n'ac-

corde & me confesse, qu'il les faut chercher, chasser & chastier comme pestes publiques & ennemis de tout le genre humain, duquel ils renoncent l'auteur, & adorent le destructeur qui est le diable. Bref, ce sont tres fins & tres malheureux ouuriers & trompeurs.

A. Je m'esbahi bien comme il y a donc des Iuges si doux ou plustost si mols que de craindre ou faire conscience de condamner & faire mourir les Sorciers.

T Et moy aussi, & monstrent tels iuges que ils ne fauent bonnemēt que c'est de la crainte de Dieu: les ennemis formels duquel, ils ne haïssent point, mais les suportent & laissent viure. Que reste-il donc Antoine, que tu vueilles fauoir?

LE SIXIEME POINCT.

 'IL est permis à vn homme Chrestien, d'vser de leur aide & secours, pour se guerir d'une maladie, que eux ou autres nous auront donnee, ou bien dont ils diront fauoir le remede. Bref, s'il est permis de se seruir de leur moyen, pour le bien, secours & aide de quelqu'un, soit pour le public, comme en guerre, soit pour vn particulier, comme pour guerir vn malade.

T. A la

T. A la fin, Antoine, tu m'as fait faire vn plus grand discours que ie ne pensoye & ne m'estoye proposé du commencement: mais puis que iefuis en train, & que tu le veux sauoir, ie te le diray. Et en premier lieu, Antoine, tu dois sauoir que les aduis & opinions des hommes, & des loix humaines ont esté diuerses sur ce que tu me demandes, tellement que quelques vns ont fait cete distinction dānable, de dire qu'il ya de bonnes & de mauuaises Eriges ou Sorcieres. Combien que quant à la Loy de Dieu, elle a tousiours esté toute vne & de mesme. Car cete Loy diuine a tousiours condamné les Sorciers & defendu de s'en seruir. Mais quant aux hommes & à leurs loix, pendant que les grans Rois & Monarques qui regnoyēt au monde ont esté idolatres, ils se sont seruis indifferemment de la magie, & des façons & aides des Sorciers. Or à l'exemple des Princes, tout le peuple aussi puis apres en vsoit, & s'en aidoit, comme encores il se fait aux pays & regions barbares, telles que sont les hautes Indes & pays de Cambalu où habite le grand Cham de Tartarie. En toute la seigneurie & domination des Perses, on n'a point fait conscience ordinairement d'en vser: & estoit lors & aujourd'huy encores grand honneur entre ces idolatres, d'estre grand & sauant Magicien. De l'Egypte, & que telle science fust en prix, l'Escripture saincte en Exode 3. chap. nous le tesmoigne. A Rome aussi les Empereurs mes-

mes se sont adonnez à la magie, & ont vſé des façons & aides des Sorciers. Neron (comme l'eſcrit Suetone) a eſté l'un des plus grands Magiciens & Sorciers, qui furēt iamaſ au monde: combien que (comme eſcrit Pline) depuis il quitta & abandonna toute cete vanité, & s'en mocqua. Adrian l'empereur (ainſi que recite Dion en ſa vie) eſtudioit aux arts magiques: & par l'art des Sorciers ſe fit guerir d'une hydropiſie, où il eſtoit tombé. Les Huns peuple barbare, comme ie t'ay deſia raconté & recité de Gregoire eueſque de Tours, en leurs batailles vſoyent de ſorcellemens & magie, pour veindre leurs ennemis. S. Cyprian a eſté du cōmencement & lors qu'il eſtoit payen, de ce meſtier comme lon dit: mais par la grace de Dieu depuis cognut la vanité, & le mal qui y eſtoit, & le laiffa & fut fait Chreſtiē. Tous leſquels exemples monſtrent aſſez, qu'entre les Payens du commencement on ne faiſoit ni difficulté, ni conſcience d'uſer du ſecours de telles gens, comme de choſes indifferentes: toutes fois depuis, pour les execrables façons & adiurations qu'on y voyoit, les loix ciuiles & Romaines ordonnerent, qu'il ne ſeroit permis indifferemment d'en uſer, mais ſeulement pour quelque bien & ſoulagement euidentement public, ou priué. Et pourtant il eſt ainſi eſcrit au Code de Juſtinian, Empereur Romain, liure 9. tit. 18. en la loy 4, qui a eſté faite par l'Empereur Coſtantin, *Il faut (dit la loy) punir & à bon droit*

chastier

chastier, par tresfrigoureuses loix, la sciēce de ceux qui s'aidans d'art Magique, sont descouverts ou d'auoir attenté quelque chose sur la santé des hōmes, ou d'auoir tourné ou eschaufé l'esprit pudique de quelqu'un à aimer : mais il ne faut blasmer les remedes qu'on trouue pour les corps humains, pour l'aide desquels es chāps on se sert d'art magique, de peur que les pluyes nuisent aux vignes meures, ou qu'elles soyent batues de vents, ou de gresle : car par ce moyen la santé ni renommee d'aucun n'est blessée, ains tels actes profitent : de peur que les biens donnez de Dieu, & le labeur des hommes ne se perdent, & soyent gastez. Donné à Rome le premier iour de Feurier, au consulat de Constantin Auguste & de Licin Casar.

A. Voila vne terrible Loy Theophile, & bien mauuaise, & peu Chrestienne pour vn Empereur Chrestien, comme on dit Constantin auoir esté.

T. P'estime que Constantin ne l'estoit encores, quand il la fit : car il dōne trop de licence aux hommes d'vser du secours des Sorciers & Magiciens, & veut que cela soit permis, pourueu que ce soit pour vn bien public ou priué. Et pourtant cete loy a esté depuis corrigee par vn autre Empereur aussi Romain, nommé Leon, qui defend d'vser de tel secours & aide pour quelque raison & occasiō que ce soit : appellant tout le faict des Sorciers, Magiciens & autres telles gens, pure imposture. C'est la Constitution 65, & cete-la, comme meilleure, a esté depuis suivie. Sainct Augustin, les paroles duquel sont

escrites au Canon Admoneant, 26. Quest. 7. monstre que c'est pure imposture & embusches du diable de s'aider de ces moyens-la. Au chap. 2. titre De Sortilegis, aux Decretales, il sont aussi condamnez: & la raison en est tresbonne.

A. Quelle est elle?

T. C'est, qu'il ne nous faut auoir aucune accointance ni directement, ni indirectement avec satan: & ne nous deuons aider de luy, ni des choses qu'il nous presente. Car il n'y a qu'un vray Dieu, auquel il nous faut adresser? *Et pourquoy comme dit le Prophete Elie, allons-nous au secours de Belzebub, veu qu'il y a un Dieu en Israel?* 2. Rois, chap. 1. vers. 3. Il nous faut tellement adherer au vray Dieu, que nous ne fassions hommage en sorte que ce soit, petit ou grand au diable ni à ses ministres, ainsi que dit le Pse. 81, vers. 11. Car nous ne saurions seruir à deux maistres, à Dieu & au diable: partant il nous faut tenir à l'un purement, & exclusiuelement à tout autre.

A. Mais ceux qui s'en aident s'en trouuent bien.

T. C'est tout vn: car Dieu defend de nous adresser au diable ni à ses supposts, quelque conseil ou secours qu'ils nous presentent. Deut. 18, vers. 10: pource que ce qu'il en fait, c'est pour nous tromper & desbaucher à la fin du seruice de Dieu. Et tout le secours que nous pensons auoir par ce moyen, pour la guerison & soulagement

gement de nos corps, nous tourne en vne grieve maladie, ou plustost à vne mort de nos ames, qui se separent de Dieu, qui est leur propre vie. Tel secours donc du diable & des Sorciers, à la verité, & pour en parler proprement, est vn poison mortel. Et puis, combien en voit-on de gueris ou soulagez par ce moyen? de dix qui y vont, il n'y en a pas vn qui s'en trouue bien, & qui en guerisse: & quand encores tous s'en trouueroient fort bien, puis que Dieu nous defend de prendre tel remede, encores qu'il nous soit volontairement présenté, nous le deuons laisser, sans s'en faut que nous le deuions chercher, querir, ou pratiquer. Car allant autre part au secours qu'à celuy que Dieu nous a ordonné, c'est vn vray signe d'une meschante rebellion, & d'une diabolique des fiance & infidelité, bref, d'un mespris de Dieu. Par lesquels vices nous tombons en vne mort & condamnation eternelle.

A. Quoy donc ne pouuons-nous en sorte que ce soit nous aider de la main d'un Sorcier, pour nous secourir en nostre mal?

T. Quelques vns estiment qu'ouy, pourueu que cela se face par vn commandement que leur fasse la iustice & le magistrat: & non par prieres & supplication que nous leur adressions. Car si nous les prions, nous leur gratifions(disent-ils) & caressons: mais si la iustice & magistrat leur commande de nous guerir, c'est par contrainte, & en vertu & autorité de Dieu (qui a ordonné

les Iuges) que nous-nous en seruons. Voila leurs raisons. Mais ie di & maintien, que cete distinction & doctrine est fausse, & ceste opiniõ mauuaise: car comme dit S. Paul. Rom. 3, vers. 8, il ne faut iamais faire mal, afin que bien aduienne, soit par autorité de iustice, soit autrement. D'auantage, si vn Iuge nous commande d'idolatrer, de renoncer Dieu, & suyure le diable, serons nous pour cela excusés & inculpables si nous luy obéissons? certes nenny. Or quand il commande au Sorcier de nous guerir, & à nous de prendre ce remede, il nous commande de mal faire. Car de fait, quãd le Sorcier nous veut guerir, ou desforcer, par le moyen qu'il a du diable, & par l'inuocatiõ, ou recours qu'il fait au diable, deussions nous mourir & lãguir cent ans, nous, ni la iustice n'en deuons vser aucunement. Car c'est tousiours aduouer le diable, & prendre son aide, à laquelle dès nostre baptisme nous auons entierement renoncé: & n'est en la puissance du diable de nous faire viure, ains de Dieu seul. Ouy bien si celuy qu'on dit estre Sorcier, sauoit quelques bonnes & propres medecines pour nous aider, & que le secours qu'il nous veut donner soit sçeu & appliqué par luy sans aucune memoire ou inuention du diable, & sans autre façon superstitieuse, & comme feroit vn bon medecin & bien sauant: lors nous pouuons en bonne conscience vser de son remede. Car quãd le remede qui nous est présenté, est fondé en raison naturelle,

relle, & science ou experience de medecine, & n'a aucune dependance de Satan ni de quelconque superstition, nous en pouuons chrestienne-ment vser, sans regarder si c'est vne femme ou vn payfant, ou mesme quelcun soupçonné d'estre Sorcier qui le nous donne. Car plusieurs en sont soupçonnez, qui ne le sont pas pourtant: mais de nous aider d'eux & de leur moyen, remede ou conseil, entant qu'ils ont recours au diable, il ne nous est licite: & est autant de mal des'en aider, que d'estre Sorcier soy-mesme.

LE SEPTIEME POINCT

Antoine.



Voy donc? Theophile, quel remede y a il de se garder d'eux? ou bien estant empoisonné, de se guerir & deliurer?

TH. Je te puis dire en cela ce qu'a dit saint Augustin, qu'en telles maladies les medecins pour la plus-part ne voyent goutte, tant elles sont estranges & inconues: car elles viennent de la boutique & artifice de Satan. Si est-ce toutesfois que pour en guerir, il est tref-bon & necessaire d'appeler les medecins, & les plus experts: se faire visiter par eux, suyure leur ordonnâce, & experimenter, s'il plaist à nostre Seigneur de benir leur labeur & ordonnance,

F.i.

pour nous deliurer du mal & de la peine que nous sentons. Car les medecins, par la grace de Dieu, en guerissent tous les iours, & en ont par-ci deuant gueri plusieurs: & l'art de medecine est don de Dieu. Eccles. 38. vers. 2. & ha grâs effects, & experience: sinon, & qu'ayant experimenté tous remedes des medecins, nous ne trouuions soulagement à nostre maladie, il ne faut pour cela auoir recours aux Sorciers, & guerir vn mal par vn autre mal, & sauuer le corps en perdant son ame. Ce que font toute fois aujourd'hui plusieurs meschamment & malheureusement: mais il faut se remettre en Dieu, attendre patiemment son secours, le prier & l'inuoquer tres ardemment, sachant que c'est luy seul, Pse. 37. vers. 5. & 27. vers. 14. & 50. vers. 15, qui a en sa main, comme dit l'Escripture, Eccles. 8. vers. 8, les issues de nostre vie & de nostre mort. Pseau. 68. vers. 21. Car il fait par quel moyen il veut estre glorifié en nous, & quand nostre heure, qu'il a ordonnee, fera, & iusques à quel temps il est besoin que nous soyons chastiez. Mais il ne permettra que tétation plus qu'humaine nous saisisse. 1. Corint. 10. vers. 13. Bref, il se faut en telles afflictions consoler le plus qu'on peut, par la sainte & sacree Parole de Dieu.

A. Mais pour se garder d'estre empoisonné & enforcélé par ces meschans, que faut-il faire?

T. Il n'y a drogue, recepte, ni medecine qui soit

soit preseruatue de cela, sinon que de se recom-
mander soir & matin à Dieu, en se leuant & sor-
tant du liēt, ou bien en se couchant. Et d'autant
qu'en allant, en mangeant & beuuant ils nous
enforcelent, il ne faut point (selon le conseil de
S. Iaques & de S. Paul) ni aller, ni boire, ni man-
ger, que premierement nous n'inuoiq̃ōs Dieu,
& nous ne nous recommandions à luy au nom
de nostre Seigneur Iesus Christ. Car en nous e-
stāt mis en la sauuegarde de Dieu, qui est le sou-
uerain Roy, & qui a toute puissance sur les dia-
bles & les Sorciers, qui fait camper & marcher
vn camp d'anges à l'entour de ses enfans, qui
nous pourra nuire? Si Dieu est pour nous, qui se-
ra contre nous? dit l'Escripture Rom. 8. vers. 30.
Et faut bien songneusement mediter ceste ex-
cellente promesse de Dieu, qui nous est faite en
la faueur de nostre Seigneur Iesus Christ, & est
escrite au Pseaume 91.

*Qui en la garde du haut Dieu
Pour iamais se retire,
En ombre bonne & en fort lieu
Retiré se peut dire.*

*Car du subtil laqs des chasseurs,
Et de toute l'outrance
Des pestiferes oppresseurs
Te donra deliurance.*

*Si que de nuict ne craindras point
Chose qui espouuante,
Ne dard, ne sagette qui poind,
De iour en l'air volante.*

*N' aucune peste cheminant
Lors qu'en tenebres sommes.*

*Ne mal soudain exterminant
En plain midi les hommes.*

*Malheur ne te viendra chercher,
Tien-le pour chose vraye,
Et de ta maison approcher
Ne pourra nulle playe.*

*Sur lionceaux & sur aspics,
Sur lions pleins de rage,
Et sur dragons qui valent pis,
Marcheras sans dommage.*

*Car voicy que Dieu dit de toy.
D'ardant amour m'honore,
Carder & secourir le doy:
Car mon Nom il adore.*

Voila donc, Antoine, le plus seur moyen & meilleur preseruatif que i'y sache: combien que pour n'estre aisément surpris par eux, il ne les faut auoir, hanter ni frequenter quand nous les doutons, quoy qu'ils nous applaudissent: car ce sont gens les plus flateurs, papelards & dissimulez du monde, que Sorciers, faisans selon le naturel de leur maistre, beau semblant, & caressant celuy qu'ils taschent à tuer & empoisonner. Et pour conclusion, ie diray ce remede-ci, qui est tres-vray, pour obuier à ce que ces meschans ne facent gueres de mal. C'est qu'il faut que tous iuges soyent soigneux & diligens à les recercher, & punir rigoureusement,

reusement, sur tout Messieurs des cours de Parlement: ne s'amusans à vaines disputes sur ce fait, mais prenans vne resolution, Que c'est la pire & plus dangereuse peste qui soit au monde, que ces gens-ci: qui sont mesmes appelez ennemis communs du genre & salut humain, parla Loy derniere, Cod. De malefic. où la Loy permet à vn chacun qui les cognoit, de les prendre de sa propre autorité, & les amener à iustice tant ce crime a esté estimé execrable. Et voudroye de ma part, Antoine, que le Roy de France & autres Rois & seigneurs souuerains, eussent attribué la cognoissance de tels empoisonneurs, meurtriers, apostats & meschans, en dernier ressort aux Baillifs d'une chacune province, tout ainsi qu'ils leur ont attribué en souveraineté, la cognoissance & iugement des assassins: d'autant que c'est vn crime plus meschant & detestable, de tuer vn homme de poison, & par telle façon diabolique & secrette (comme font les Sorciers) que de le tuer d'une espee ou pistole: ce que font les assassinateurs. Et ainsi le dit la Loy premiere, au mesme titre. Sur tout, & pour finale conclusion, tu vois, Antoine, comme nous-nous deuons incessamment recommander à Dieu, pour ne tomber aux laqs & pieges de Satan & des Sorciers ses supposts, qui nous sont cachez, & esquels toutesfois nous sommes exposez continuellement: comme nous leuons rendre graces perpetuelles à Dieu, de ce

qu'il nous en sauue & contregarde par chacun iour, & de ce qu'il ne nous a lasché la main, pour tomber en mesme idolatrie & renoncement de son saint Nom, comme ont fait ces malheureux. Brief, tu vois comme nous deuons infiniment admirer la sainte bonté & prouidēce de ce grād Dieu enuers le monde: sa bōté, en ce qu'y ayāt si grand nombre de Sorciers au monde, qui ont si meschamment & laschement quité Dieu & son parti, & pris celuy du diable, il n'abyfine & n'a desia abyfiné ce monde: & sa prouidence, en ce que Satan faisant tant d'efforts pour destourner les hommes de leur salut, & y besongnant si puissamment & finement, toutesfois il plaist à Dieu d'en garder vn bon nombre sain, & empescher les conseils de satan, & faire que le meilleur parti gagne & tienne mesme les meschans en crainte: notamment que ses esleus ne soyent point pour cela esbranlez. Or donc soit à Dieu par nostre Seigneur Iesus Christ, gloire, & honneur, & action de graces à tout iamais. Ainsi soit-il. Veux tu plus rien, Antoine?

A. Nenni, & te remercie dela peine que tu as prise à m'enseigner. A Dieu.

T. A-Dieu.

DEVX PROCES EXTRAICTS

des registres publics, par lesquels ce qui a esté
traité ci dessus est esclairci & confirmé.

*Extrait des responces faites sur le proces criminel
fait en forme à lencontre de N. du lieu de N. terre
de chapitre, à la poursuite & instance du Procureur
general de nos seigneurs, en l'annee 1573. & le
trentieme de Novembre.*

Laquelle enquisse apres plusieurs responces
par elle faites sur les interrogats à elle baillez
par ci deuant, n'ayant voulu confesser la verité,
en apres a respondu & confessé ainsi que se verra
en ses responses ci apres escrites.

Interroguee combien d'enfans elle a eu de
son premier mari. Respond point : car elle ne le
connut iamais charnellement: ouy bien d'un sien
cousin germain, duquel elle eut vne fille, laquelle
elle enfanta à Valery en la maison de son pere, &
fut baptisee, & vescu biē apres environ demi an,
dequoy elle en demande à Dieu pardon, & à Iu-
stice, & dequoy tousiours depuis en a esté con-
tristee en son cœur, & est encores, & en demāde
iournellement pardon à Dieu : & dit qu'elle en
fut absoluë par un prestre, vers lequel elle s'en
confessa, & c'estoit auant la reformation de l'E-
uangile, & n'en fut iamais inquisse par iustice.

*Du 15. de Ianuier 1574. presens les
seigneurs de Iustice.*

Ladite enquisse ayant iuré, & interroguee si el-

le s'est point readuisee de dire verité de ce qui luy a esté ci dessus demandé: Respōd, l'auoir dit.

Interroguee si ce que N. luy a maintenu est pas veritable. Respond que non.

Interroguee si elle a pas dit ci deuāt que si la dite N. luy maintenoit ce qu'elle auoit dit ci deuant seroit vray. Respond qu'ouy.

Si fuyaāt ce ladite N. le luy maintient pas deuant. Respond qu'ouy mais que ce sont mensonges.

Si ce qu'elle luy maintint lors est pas veritable. R. qu'elle luy maintient des mensonges.

Si ce qu'elle confessa le iour auant hier touchant l'enfant du cousin germain de son premier mari est pas bien veritable. Respond qu'ouy, & qu'elle en est à la misericorde de Dieu & de la Iustice.

Et en apres estant exhortee de conoistre sa faute s'est mise à genoux criant merci à Dieu & à Iustice, a cōfessé que ce que ladite Theuene luy auoit maintenu, si elle l'auoit dit en verité, qu'il estoit vray qu'elle est Eryge, dequoy elle en crie à Dieu mercy.

Interroguee combien de temps y a qu'elle se mit Eryge. Respond qu'elle ne le sauroit bonnement dire, sinon y a bien enuiron trois ans, & qu'elle a esté avec la theuene ou elle a dit.

Interroguee comment est-ce qu'elle se mit Eryge. Respond par mal auisement, elle fit hommage à cete pute beste.

Inter-

Interroguee comment il estoit. Respond qu'il estoit roux comme vn renard.

Interroguee que c'est qu'il luy dit. Respond qu'il luy dit, luy ayāt parlé, qu'il estoit le diable.

Interroguee qu'il luy fit faire. Respond qu'il luy fit renoncer Dieu, & puis le baïsa sous la queue.

Quel nom il dit qu'il se nommoit. R. qu'il s'appeloit Morguet, & luy bailla du pain, & elle luy bailla vn cheueux de sa teste, & ce fut es prez sous Valeri, ou elle passoit allant vers la ville.

Combien de temps y a qu'elle se mit Eryge. R. qu'il y a enuiron trois ans.

Interroguee combien de fois elle l'a veu depuis. Respond deux ou trois fois & estoit comme vn chien rouffet ou vn renard, & ce fut es prés sous le village.

Interroguee ou elle l'auoit trouué. Respond esdits prés de nuict ou il y auoit du feu & y buoyent & mangeoyent, & y estoient enuiron quatre ou cinq personnes, tant hommes que femmes, & qu'ils buoyent & mangeoyent comme ledit Morguet faisoit, & quand ils auoyent beu & mangé elle s'en retourna: & dist que quand elle se donna à luy, il luy bailla vn baston blanc, & luy dit que quand elle voudroit l'aller trouuer en la synagogue, qu'elle dist baston blanc baston noir porte moy là ou tu dois.

Interroguee qu'est-ce qu'il luy bailla d'autre.

R. qu'il luy bailla de la poudre noire dedans vn papier: la seconde fois qu'elle le trouua, dés que elle se fut donnee à luy, & qu'elle en mist sur gés, ou sur bestes à qui elle voudroit faire mal.

Interroguee combien de fois il luy en bailla. Respond deux fois, la premiere fois fut és prez sous Valery: & la seconde fois és mesmes prez.

Interroguee qu'est-ce qu'elle auoit fait de la premiere. Respond qu'elle en auoit mis sur vn leur chat qui mourut ayant languy trois ou quatre iours, puis mourut: & le reste que elle le perdit: & de l'autre dit que il y en a encores en du papier dans son arche qui est au village de N. & estoit sur l'enchartre de ladite arche.

Combien de temps il y a qu'il luy bailla de ladite seconde poudre,

Respond trois ou quatre ans

Interroguee si N. son mary sauoit pas bien qu'elle estoit de sa secte. Respond qu'ouy, pour ce qu'il y auoit des voisins qui l'auoyēt outragé, & non elle.

Interroguee si sondit mary alloit pas quelquesfois avec elle, ou elle avec luy. Respond que quand il se leuoit quelque fois de nuict, que il faloit bien aller avec luy, ou il plaisoit à Dieu: & y buoyent, mangeoyent, & dansoyent: puis s'en retournoyent. Et que s'estoit esdits prez: quelquesfois en des buissons de grataloup, & y auoit

auoit veu trois ou quatre fois la N. & que auant
que partir de là, ils baisoyent leur maistre pres
la queue: & y alloyent quelquesfois de deux
mois en deux mois, & quelquesfois aussi de
trois en trois

Interroguee si elle a point veu la N. femme
de N. Respond que non, & ne sçait qu'elle y
aye esté, si ce n'est dés qu'elle a esté mariee, bien
est vray qu'on la crie comme les autres.

Interroguee si elle mist pas de ladite poudre
sur la fille de ladite. R. que non: & ne sçait si
ce pourra auoir esté ladite N. pource que lon di-
soit qu'elle auoit fait d'autres choses, ou bien N.
mary de ladite inquisse.

Qu'est-ce qu'on fit à ladite fille pour la gue-
rir. Respond que ce fut avec certaines herbes
qu'on auoit aportees.

Combien de temps y a qu'elle fut la derniere
fois à la synagogue. R. qu'il y peut auoir six à sept
semaines auant sa detention.

Remise à continuer à nostre premiere venue.

*Autres responses de ladite enquisse faites es
mains de la iustice, le 19. I anuier 1574.*

Laquelle ayant iuré, & estant interroguee si
elle s'est point reauisee de dire verité, & si ce que
elle a ci dessus cōfessé est pas veritable. Respond
qu'ouy.

Si ce qu'elle a confessé touchant de l'enfant qu'elle a eu d'un cousin germain de son premier mari n'est pas bien veritable. R. qu'ouy.

Combien de fois elle eust la cōpagnie de son dit cousin. R. trois fois. Et dit qu'elle ne pouoit auoir la compagnie de son dit premier mari parce qu'il estoit enchanté.

Si ce que la N. luy a maintenu est pas bien veritable. R. Qu'ouy.

Si elle a pas esté à la synagogue avec elle. R. qu'il y a bien dixhuit ans.

Avec qui elle y alla la premiere fois. R. Avec N. son mari.

Inter. qui l'a induit à aller à ladite synagogue, & de se mettre Eryge. R. Que ce fut N. son mari, lequel luy dit si elle vouloit aller avec luy, qu'ils banqueteroyent & feroient bonne chere: & allerent és pres sous le village.

Qu'est-ce qu'ils trouuerent à ladite synagogue. R. qu'ils y trouuerent ledit Morguet son maistre, qui estoit comme vn renard rouflet.

Qu'elle declare ceux qu'elle a veu en ladite synagogue. R. qu'ils y estoient N. son mari qui estoit allé avec elle, & cinq autres nommez en son procez.

Combien de temps y a qu'elle a veu en la synagogue les sus-nommez la premiere fois. R. qu'elle y auoit esté parauant qu'elles n'y estoient pas: mais qu'il y a bien enuiron dix ans qu'elle les y a veu la premiere fois.

Inter.

Inter. en quel lieu ils alloyēt à la synagogue.
 R. sous les prez deuers le bié du moulin au dessus d'iceluy & en plusieurs autres lieux, comme vers le publes de grataloup.

Qu'est-ce qu'elles faisoient en ladite synagogue, & que c'est qu'elles y portoyent. R. qu'il leur estoit auis qu'elles mangeassent & beussent, & portoit avec elle vn baston blanc.

Qu'est-ce qu'il leur cōmandoit de faire quād ils s'en retournoyent de la synagogue. R. qu'il luy disoit qu'elle fîst du mal tant aux gens qu'aux bestes, & à ceux qui leur feroient du mal avec de la poudre qu'il leur bailloit en vne boïste, & d'autres fois en du papier, & icelle mettre sur ceux à qui elle voudroit mal, & qui luy feroient du mal.

Interr. sur qui elle a' mis de ladite poudre. R. sur vn chat qui estoit en leur maison: & puis en bailla vne autre fois à vn chat de leur voisin, lequel mangeoit leurs pouffins: lequel aussi mourut, & estant mort le ietta au bié du moulin afin qu'on ne s'en aperceust. Et l'autre fois à vne de ses poules laquelle aussi mourut. Dit aussi, qu'elle en mit sur vn leur caillat avec vne pierre qu'elle luy ietta, lequel aussi en mourut. Dit aussi qu'elle mit de ladite poudre en vne place de leur courtil où il y auoit des oignons, lesquels vindrent tous noirs: & les fallut ietter là parce que ils estoient gastez.

Inter. Quelle est la cause pourquoy elle se mit

Eryge la premiere fois. Resp. parce qu'elle estoit fachee de ce que N. son frere ne luy vouloit bailler pour faire vn hocqueton, qu'il luy deuoit encores de son mariage. Et en retournant de la maison de sondit frere, passant par les prez, elle rencontra le diable, qui estoit en forme d'un renard rouffet.

Inter. qu'est-ce qu'il luy dit. R. qu'il luy dit, que si elle se vouloit dōner à luy, qu'il luy baille-
roit du drap pour faire le hocquetō qu'elle vou-
loit, parce qu'il la vid ainsi fachee: & que s'estant
donnee à luy, qu'elle ne s'en repentist pas puisa-
pres. Et luy declara qu'il estoit le diable, dequoy
elle fut bien esmeuë. Et toutesfois elle se donna
à luy, en disant, Voici mon corps, il est à ton cō-
mandement. Et suyuant ce, luy fit renōcer Dieu
son createur, & prēdre ledit diable pour son mai-
stre: lequel luy declara qu'il s'appeloit Morguet.

Inter. comment elle fit hommage au diable.

R. qu'elle s'agenquilla, & luy baissa sous la
queue, & estoit bien froid.

Inter. où c'est que le diable la marqua. R.
qu'il ne la marqua pas, mais qu'elle tira vne cat-
te de son poil qu'elle luy bailla: & luy bailla lors
vne boite, où il y auoit de la poudre noire.

Si estant de retour en leur maison, elle ne de-
clara pas à son mari comme elle auoit fait avec
le diable. Respond qu'ouy, & que son mari
luy respondit, bien, bien, si tu as bien fait tu le
trouueras.

Combien

Combien de temps apres elle alla en la synagogue. R. que quelque temps apres, & enuiron deux mois apres sondit mari luy dit, allons, nous yrons iusques là haut : & monterent tous deux sur vn baston blanc qu'il auoit, qui les porta iusques au milieu des prez vers vn buisson qu'il y auoit, là où ils trouuerent le diable, & plusieurs de leur secte qui dansoyent & sautoyent, & se mirent avec eux, & dancierent comme les autres. Et ce fut de iour la premiere fois qu'ils allerent en ladite synagogue, laquelle se tenoit aussi bien de iour que de nuict.

Interr. quels propos sondit mari dit quand ils monterent sur ledit baston. R. qu'il dit, *Baston blanc, baston noir, meine-nous là où tu dois de par le diable.*

Interrogué si elle mesme n'auoit pas vn semblable baston, & qui le luy auoit baillé. Resp. qu'elle en auoit aussi vn, qui estoit plus court que l'autre, lequel le diable luy auoit baillé & luy dit, qu'elle en feroit ce qu'elle voudroit, & la conduiroit là où elle voudroit aller.

Si autāt de fois qu'elle a esté en ladite synagogue, elle a tousiours porté ledit baston. Resp. qu'ouy, & qu'elle n'y a iamais esté qu'elle n'ait porté ledit baston, & disoit en montant dessus ledit baston, *Baston blanc, baston noir, porte moy là où tu dois de par le diable.*

Inter. où est ledit baston. R. qu'elle le tenoit caché dans vne haye pres le pollier, & que nul ne

le fauroit trouuer qui ne fust de fa secte comme elle.

Sur qui elle a employé de ladite poudre outre ceux qu'elle a déclaré. R. sur nul autre.

Sur ce le sieur Procureur general a requis attendu qu'elle ne veut declarer les autres, qu'elle soit comminee & suyuie tant par les fers, que torture, iusques à ce que la pure verité sorte de sa bouche.

Et depuis interroguee sur qui elle a baillé & mis de ladite poudre tant gens que bestes. R. qu'elle n'en a mis sinon sur ceux qu'elle a sus déclaré.

Qu'elle declare derechef ceux qu'elle a veu à la synagogue, & qui sont de sa secte. R. ceux qu'elle a ci dessus déclaré, & qu'elle leur maintiendra bien.

Inter. Si elle a pas induit sadite fille de se mettre de sa secte. R. que non, & qu'elle pense que ce fut son pere.

Inter. combien de temps il y a qu'elle a esté la derniere fois en la synagogue. R. enuiron trois mois auant sa detention, là où elle a veu tous les sus-nommez.

Inter. qu'elle donnoit au diable. R. que tous les ans elle luy dōnoit vne poule qu'elle luy bailloit quand elle alloit en ladite synagogue.

Remise à continuer comme dessus.

Repetition

*Repetition de ladite inquisi^{on} faite es mains que
dessus, le 20. Iannier 1574.*

Laquelle ayāt iuré, & interroguee si elle s'est point reauisee de dire verité. R. qu'elle l'a dite de ce qu'elle a feu.

Interr. si tout ce qu'elle a sus confessé est pas bien veritable. R. que tout ce qu'elle a dit & confessé est veritable.

Interroguee la cause pourquoy elle n'a voulu parler à la iustice. Respon, que c'estoit Satan qui la gardoit de parler, & ne pouuoit parler.

Qu'elle declare si ce qu'elle a ci dessus confessé est veritable. Respon, qu'environ huit ans apres qu'elle fut mariee avec son dernier mari que sont environ trente ans, sondit mari luy commanda d'aller demander à Nicolas Landesiez son beau-frere, vn auqueton qu'il luy deuoit de reste de son mariage, ou bien qu'elle demeurast avec luy s'il ne luy vouloit bailler. Ce qu'elle fit: & estant departie de la maison de sondit mari, & estant arriuee en la maison de sondit frere, luy demanda ledit auqueton lequel il luy refusa, luy disant qu'il n'auoit pas d'argent, & qu'il la vouloit garder pour la fille d'elle enquisse, laquelle il auoit nourrie. Dequoy estant bien fâchée s'en retourna en la maison de son mari en pleurant & se contristant de ce qu'il ne luy auoit baillé ledit auqueton passant par les prez sous la ville elle trouua vne beste semblable à vn renard

fort hideux qui s'aparut à elle qui estoit à l'enui-
 ron d'un buissō qui estoit au milieu desdits prez,
 lequel luy demanda qu'elle auoit, à cause qu'elle
 se lamentoit ainsi, elle luy dit qu'elle se lamen-
 toit de ce que son frere ne luy auoit voulu bail-
 ler du drap pour faire vn hoqueton. Lors il luy
 dit qu'elle ne se faschast point, & qu'il luy baille-
 roit bien du drap ce qu'elle voudroit pour faire
 ledit hoqueton: & luy ayant demādē qui il estoit
 il luy dit qu'il estoit le diable, & s'appeloit Mor-
 guet, & qu'il falloir qu'elle se donnast à luy, &
 qu'elle n'auroit iamais faute de rien, & qu'il fal-
 loit qu'elle renōçast Dieu, & print ledit morguet
 pour son maistre. Ce que à son pourchas elle fit,
 & fit hommage audit Morguet son maistre, & en
 signe d'hommage le baissa sous la queuē, & luy dit
 qu'il falloir qu'elle luy donnast quelque chose, &
 elle tira vne catte de poil de sa teste qu'elle luy
 donna, & sondit maistre luy donna du pain, du-
 quel elle en mangea dauātage, pource qu'il estoit
 amer comme de peyret: & combien qu'il luy pro-
 mist du drap ne luy en bailla point. Luy com-
 manda qu'il falloir faire beaucoup de mal, & tuer
 gens & bestes avec ce qu'il luy bailleroit: & enui-
 ron trois ou quatre iours apres, ledit diable s'a-
 parut à elle pres d'un Orme, qui est pres de leur
 maison, & luy demanda qu'elle auoit de ce qu'elle
 se faschoit tousiours, à quoy elle luy respondit
 qu'elle se faschoit à cause d'une iument poil rou-
 rouge qu'ils auoyēt, qui luy auoit baillé vn coup
 de

de pied au bras, tellement qu'elle le pensa auoir rompu. Et lors sondit maistre luy bailla vn baston blanc, & en quelques endroits de places noires, & luy dit qu'elle en frapast ladite iument, ce que elle fit, & frapa ladite iument, laquelle ayant vn peu esté malade mourut, & luy dit sondit maistre que tous ceux qu'elle toucheroit avec ledit baston mourroyent. Plus confesse qu'ils auoyent en leur maison vne vache poil fromenta, laquelle estoit mauuaise & batoit les autres, & ausi elle, quand elle l'atachoit, dequoy estant faschee luy donna du pain sur lequel elle auoit mis de la poudre que le diable luy auoit baillee en vne boiste avec ledit baston, & mourut bien tost apres. Plus confesse qu'elle auoit de ladite poudre en sa main de laquelle elle frapa vn chat de leur maison poil gris qui mourut.

Plus confesse auoir frapé vn autre chat de Pierre morel de poil gris sur le noir, à cause que ledit chat mangeoit les poussins lors qu'ils faisoient la granerie de monsieur de vansy, & le frapa avec vn baston lequel auoit touché de ladite poudre, lequel tout à l'instant mourut & craignant qu'on ne s'en aperceute le ietta au bié du moulin.

Plus confesse que sont enuiron trois à quatre ans que la N. sa fille auoit vn enfant de son mari, & pource qu'elle n'auoit du laict pour le nourrir, la N. vefue de feu N. alla querre ledit enfant: puis l'apporta en leur maison. Et estant en leur maison, elle enquisse en fut faschee, & ainsi que

ladite N. le tenoit aupres du feu, elle luy mit de ladite poudre sur la forcelle, lequel ayant languy deux ou trois iours, mourut sans baptesme. Dit aussi que long temps auparauant ils auoyent vn petit couchon qui vouloit entrer par vn pertuis en leur courtil, elle print vne pierre avec la main ou elle auoit tenu de ladite poudre, puis la ietta contre ledit couchon, lequel tâtost apres mourut. Dit aussi qu'elle essaya de ladite poudre sur des oignons qui estoient en leur courtil qui deuindrent tous noirs & les fallut ietter là. Plus en bailla à vne poule, qui mourut l'ayant estrainte contre la porte.

Interroguee combien de fois elle a esté à la synagogue, & avec qui. Respond qu'elle y a esté si souuēt, qu'elle n'en sauroit dire le nombre: & y alloient quelques fois de nuict, & quelques fois de iour: & alloient tant ausdicts prez sous la ville, vers le bié du moulin des bouuiers, que vers les buissons de grataloup & autres lieux.

Qu'elle declare ceux qu'elle a veu en ladite synagogue. Respond, qu'elle y a veu plusieurs personnes nommez en son procez, & aussi son mari qui fut le premier qui l'y mena la premiere fois, sur vn baston que le diable auoit baillé à son mary & dit, baston blanc baston noir porte moy là où tu dois de par le diable. Et les portoit en ladite synagogue: & estās là, buuoyent mangeoyent dansoyent: & y auoit du feu que leur maistre
faisoit

faisoit, qui estoit sur le pers. Mais elle ne conois-
soit pas que tel manger luy profitasse de rien,
parce qu'elle n'estoit plus rassasiee que au pa-
rauant.

Interroguee qu'elle declare les autres qu'elle
a veu en ladite synagogue. Respond, que des
enuiron dix ans en çà elle a esté en ladite syna-
gogue diuerfes fois: & y a veu ceux qu'elle a desia
ci deuant déclaré, lesquels dansoyent & sautoyēt
avec leur maistre autour de ce feu. Et quand ils
s'en departoyent elles baisoyent leurdit maistre
sous la queue, & estoit bien froit, & sentoit
fort mal.

Interroguee combien de fois il luy bailla de la-
dite poudre. R. trois ou quatre fois la premie-
re fois en vne boîte blanche platte, & les autres
fois en du papier.

Inter. qu'elle declare à qui elle en a baillé ou-
tre ceux qu'elle a sus nommez & declarez. R.
n'en auoir mis à autres qu'à ceux qu'elle a sus de-
claré.

Combien de temps y a qu'elle se mit Eryge la
premiere fois. R. qu'il y a enuiron trente ans.

Remise à continuer.

*Repetition de ladite enquisse es mains que
dessus, le 21. Iannier 1574.*

Laquelle ayāt iuré, & interroguee si ce qu'elle
a cy-deuant cōfessé est bien veritable. R. qu'ouy.

F. 3.

Si elle y veut rien adiouster ou diminuer. R. Qu'elle y veut adiouster comme elle cōfesse que elle a eu la compagnie de N. & N. cousins germains l'un de l'autre, & cousins germains de son premier mary, y a bien environ quarante ans & qu'elle s'en cōfessa à vn prestre qui l'en absolut.

Inter. Sil n'est pas vray qu'elle ait induit. N. sa fille d'estre de sa secte d'Erigerie. R. que nō, bien est vray qu'elle l'a veu en la synagogue souuentresfois.

Sur ce a esté remise a ouyr droit.

Addition aux confessions faites par ladite inquisite le 27. de Ianuier. 1574.

Laquelle ayant iuré comme dessus, & interroguee si ce qu'elle a confessé est veritable, a dit & respondu que tout ce qu'elle a confessé est bien vray.

Inter. Si elle y veut riē adiouster ou diminuer. a respondu qu'elle n'y veut rien diminuer, mais qu'elle veut descharger sa conscience & declarer que N. fils de son mary & de sa premiere femme est aussi Eryge Aussi N. fils de ladite inquisite & de son mari, & qu'il y a bien enuiron dix ou douze ans que ledit N. y est, & environ sept ans ou huit ans que ledit N. s'y mit & fait cela par ce que quand ledit N. se maria sont environ dix à vnze ans N. son mary ne vouloit pas qu'il eust

la femme qu'il prit dequoy ils en eurent plusieurs
 fascheries, mesmes que l'edit N. en fut en confi-
 stoire à Geneue deux ou trois fois & puis s'en
 alla à Lion & auoit vendu vn cheual dont il em-
 porta ce qu'ils en eurent, depuis retourna & es-
 poulsa sadite femme de laquelle il auoit eu deux
 enfans auât que de l'espouser & depuis il a touf-
 iours maluersé & l'a veu plusieurs fois a la syna-
 gogue diabolique tant es prez sous le village
 vers le buisson vers le peuble de grataloup vers
 le bié des moulins tant de celuy des bouuiers
 que de celuy des N.

Et quand audit N. fils d'elle enquisse & dudit,
 dit qu'il se mit Eryge de regret qu'il eust à cau-
 se qu'il vouloit auoir a femme N. fille de N. &
 ne l'ayant peu auoir il se despita tellement que
 depuis il a tousiours mal versé & ne rendoit tel-
 le obeissance au mary d'elle enquisse ni a elle qui
 fôt ses pere & mere cōme il faisoit auparauât mais
 faisoit tout a rebours & depuis l'a veu a la syna-
 gogue diabolique avec les autres tant esdits
 pres vers les publes que vers lesdits biez du mou-
 lin & ne fait qu'il ait fait autre mal ni à gens ni
 à bestes.

Confesse aussi que N. frere d'elle enquisse est
 aussi de leur secte & est Eryge par ce que des'en-
 uiron quatorze ans en ça elle l'a veu en la syna-
 gogue diabolique avec les autres desia par elle
 cōfessez es lieux ci dessus declarez & ne fait qu'il
 ait fait autre mal sinon qu'il estoit bien rebelle

à sa mere & d'elle inquisse, laquelle mourut de vieillesse, & toutesfois que la mere de N. luy au-
roit donné le mal, en vne poulaille qu'elle luy
auoit apportee.

Remise comme dessus.

Du lundy premier de Feurier. 1574.

Rapporte N, off. que depuis le 27. de Ianuier
que ladite inquisse eust accusé les sus nommez el-
le s'est tousiours mal trouuee, & n'a despensé
beaucoup de viande, parce qu'elle estoit malade,
& que ces iours passez les iambes luy seignoyent
fort, & ne peut sauoir dont cela venoit, sinon
que son maistre l'eust batue, & que dés hier elle
n'a rien voulu manger.

En apres a esté interroguee dont procede sa
maladie, & que c'est qu'elle a trouué. A dit & re-
spondu que son maistre l'auoit batue, la ou elle
est, & demandoit pardon à Dieu.

Interroguee Si ce qu'elle a confessé est bien
vray, aussi les accusations qu'elle a fait de N. &c,
estoyent veritables. A dit qu'ouy.

*Autres responce & confessions de N. fille
de la precedente inquisse, faites es mains de
la Iustice. Le dixneuſieme de Ianuier 1574.
outre autres responce par elle faite en son
proces.*

Laquelle ayant iuré & interroguee si elle s'est
point

point readuisee de dire verité. R. l'auoir dit de ce qu'elle a sceu.

Si ce que la N. luy a maintenu est pas veritable. R. qu'elle a mal maintenu.

Si elle fut iamais à la synagogue diabolique, & auecques qui. R. qu'elle n'y a iamais esté.

Si elle y a iamais esté auec N. sa mere. R. que non qu'elle sache : surce luy a esté confronté sa dite mere qui luy a maintenu l'auoir veu à diuerses fois, tant vers les prés vers le bié au dessus du moulin, & que la dernière fois qu'ils y furent, y a enuiron trois mois.

Si ce que sa mere luy a maintenu est pas veritable. R. que non, & que si sa mere le veut qu'elle le veut bien, mais ne fait comment ce a esté fait.

Remise à continuer comme dessus.

Repetition de ladite. N. faite es mains que dessus le 20. Iannier 1574.

Laquelle ayant iuré & interroguee si elle s'est point readuisee de dire verité. R. qu'ouy, & que elle dira la verité.

Interroguee combien de temps y a qu'elle est forcieri. R. qu'il y a enuiron trois ans, & que ce fut à la sollicitation de son pere & de sa mere, qui la firent aller auec eux vne nuit vers le bié des prez.

Interr. que c'est qu'ils y trouuerent. R. qu'ils y trouuerent le diable estant comme vn homme

noir qui estoit fort laid avec plusieurs autres gēs qu'elle ne conoissoit sinō la N. & son pere & sa mere qui estoient avec elle, & la dansoient & saultoient avec le diable.

Inter. que c'est que le diable luy bailla R. que ne luy bailla rien mais bien son pere qui luy bailla de la poudre & des racines qui estoient propres à faire mourir gens ou bestes ou qui ils vouloyent.

Inter. comme elle vsoit de ladicte poudre & racine.

Respond qu'il falloit mettre les racines en la bouche, & l'ayant en la bouche tous ceux cōtre qui on souffloit mourroyent, & quand à ladicte poudre qu'il la falloit mettre, sur ceux qu'ils vouloyent faire mourir

Interroguee sur qui elle à apliqué de ladicte poudre.

Respond qu'elle en mit sur vne vache de poil blanc y a environ vn an & demi parce que ils ne leur auoyent voulu bailler du bled vers le moulin laquelle mourut : plus sur vne vache poil rouge appartenant a N. à cause qu'il s'estoit courroucé, avec son mary parce qu'il auoit rapporté à chacun qu'elle auoit mauuais bruit.

Inter. si elle à pas fait mourir les deux bouquets des N.

Respond que non.

Inter. si elle a pas baillé le mal à N. Respōd qu'elle mit vne racine. en sa bouche que son pere luy

re luy auoit baillee, puis souffla contre lediēt N. dequoy il tomba malade & pour le faire guerir luy porta du pain, du vin, & des pommes pour le faire guerir & en mangea & guerit, & en sortant de la maison elle toucha vne vache de poil rouge dudiēt poncet avec vne verge que sondict pere luy auoit baillee laquelle deuint malade.

Inter. quelle verge c'estoit Respond vne verge blāche que son pere luy auoit baillee & luy dit que tout ce quelle toucheroit d'icelle mourroit.

Inter. quel propos son pere luy tint pour la faire mettre Erige Respond qu'il ne luy dit autre sinon qu'elle allast avec eux.

Inter. ou est ce qu'ils la menerent. R. Vers le bié es prez de messieurs.

Interr. que c'est qu'elle fit estant vers lesdits prez. R. que son pere la fist adresser à ceste cagne.

Interroguee Que c'est qu'elle appelle cagne. Respond que c'estoit comme vn homme noir laid & ord.

Interr. Comme elle fait que c'estoit le diable. R. qu'il luy dit qu'il falloit qu'elle se donnast a luy, & luy ayant demandé qui il estoit luy dit qu'il estoit le diable & qu'il falloit faire ce qu'il commanderoit.

Interroguee Si elle se donna à luy & comment. Respond qu'il luy dit qu'il luy falloit obeir & faire comme son pere & sa mere & les autres qui y estoient.

Inter. Si elle se donna pas a luy. R. Qu'ouy & le baïsa sur les genoux & luy dit qu'elle renonçast Dieu son createur sa part de paradis & son baptisme. Ce qu'elle fit & renonça Dieu son baptisme & sa part de paradis & le print pour son maistre.

Interr. Si elle luy fit hommage & comment. R. Quelle luy baïsa sur le genoux & le diable la mordit sur le front.

Interr. comme c'est qu'elle le sentit quand elle le baïsa sur le genoux. R. Qu'il estoit biē froit.

Interr. Que c'est que le diable luy donna. R. Que le diable ne luy donna rien mais que ce qu'elle en faisoit s'estoit pour complaire à son pere & à sa mere.

Int. Que c'est qu'elle donna au diable. R. Vne poulle blanche le lendemain qu'elle se fut dōnee à luy.

Interroguee que c'est que le diable luy dit qu'il falloit faire. R. que le diable luy dit qu'il falloit faire mourir des gens & des bestes afin de luy obeir & de se venger de ceux qui luy feroient du mal.

Que c'est que le diable luy bailla pour faire du mal à gens & à bestes. R. qu'il ne luy bailla rien mais que ce fut son pere qui luy bailla de la poudre rouffette dans du papier, & de la racine. Et que quand elle voudroit mal à quelqu'un qu'elle luy baillast de ladite poudre.

Interroguee comment sondit maistre se nom-

nommoit. Respond, qu'il luy dit qu'il s'appelloit Morguet.

Interroguee si elle a esté par diuerfes fois à la synagogue avec son pere & sa mere. Respon, trois fois.

Interroguee comment c'est qu'ils faisoient quand ils alloient à la synagogue. R. qu'ils montoyent sur vn baston blanc, puis disoyent, baston blanc baston noir porte-moy là où tu dois de par le diable & il la portoit là où ils vouloyent aller.

Interr. Si estans montees sur lescits bastons & ayant dit lescits propos, par ou ils sortoyent. R. que s'estoit par la porte.

Remise à continuer.

Repetition de ladite inquisi es mains que dessus le 21. Iannier 1574.

Laquelle ayant iuré & interroguee si elle s'est point readuisee de dire verité. R. Que Dieu luy en face la grace.

Si ce qu'elle confessa hier est bien veritable. R. qu'ouy.

Qu'elle declare que c'est qu'elle confessa. R. qu'elle confessa que son pere & sa mere la font venu querir pour aller à la synagogue ou elle a esté avec eux trois fois.

Inter. Quand ce fut la premiere fois qu'elle alla à la synagogue. R. Qu'il y a environ trois ans.

Si le diable auoit point parlé à elle auant qu'elle y allast. R. que non.

Qu'elle declare comment c'est qu'elle y alla la premiere fois. R. Qu'il y a environ trois ans qu'elle estoit en la maison de son mary & ayant soupé son pere & sa mere entrerēt dās la maisō de sondit mari lequel n'y estoit pas ains estoit au vuache ou il eslieroit sondit pere luy dit qu'il falloir qu'elle allast avec luy & avec sa mere & qu'elle ne demeureroit pas beaucoup. Et en sortant de la maison & estant encores dans le porche sondit pere luy bailla vne verge blanche laquelle l'ayant prinse en sa main il luy dit qu'elle mit ladite verge entre ses iambes & elle la porteroit la ou elle voudroit : & fut portee avec ladite verge iusques vers le bié du moulin avec sondit pere & sa mere, & estant vers le bié elle y vid vn grand feu tout vert & plusieurs gens qui estoient autour dudit feu qui sautoient & chantoient & y auoit vn grand homme noir qui regardoit les autres qui estoit fort hideux à voir alors ledit N. sō pere lui dit qu'elle n'eust peur de rien qu'elle vist. Et luy commanda de s'approcher dudit homme noir & le baissa sur le genoux. Et ledit homme la mordit sur le front luy ayant au prealable declairé qu'il estoit le diable & qu'il s'appelloit soupree & se mit à dācer & sauter avec les autres disant Je bon beurret,

let ie suis prins au trebuchet bon beurlet.

Interr. Quand elle baïsa ledit homme! comment elle le sentit R. qu'elle le sentit bien froid tant quand elle le baïsa sur le genoux que quand il la mordit, & y eut mal trois ou quatre iours puis guerit.

Interr. Si apres l'ayant baïsé & estant mordue dudit homme quel propos elle tint. R. qu'il luy dit qu'elle renonçast Dieu, son baptisme, sa part de paradis, & qu'elle le prinist pour son seigneur & maistre, ce qu'elle fit à l'instant, parce mesme que son dit pere luy auoit dit qu'elle n'eust point de peur.

Inter. que cest que le diable luy bailla lors R. qu'il ne luy bailla rien lors, mais bien son pere luy bailla de la poudre rouffette en du papier & certaine racine, luy disant que quand elle voudroit faire venir quelcun malade quelle mist ladicte racine en sa bouche puis soufflast contre, & ils tomberoyēt malades & n'en mourroyēt pas & ceux qu'elle voudroit faire mourir qu'elle frost ledit baston de ladicte poudre & tous ceux qu'elle en toucheroit mourroyent.

Inter. ou est ladicte racine R. qu'elle la tenoit cachee sous vne pierre au droit de la fenestre de la chambredernier laquelle pierre est rossette & dit qu'elle tenoit la poudre tout ensemble.

Int. ou est le bastō qu'elle a porté en la sinagogue R. qu'elle le tenoit en la beuoge dans la cresse ou ils ne tenoyent point de bestes.

Interr. comment c'est qu'elle fit pour s'en retourner de ladite synagogue. R. Qu'elle monta sur la verge que son pere luy auoit baillé, puis dit baston blanc baston noir porte moy la ou tu dois de par le diable & fut incontinent en sa maison.

Interrogué, à qui c'est qu'elle a apliqué de la dite poudre. R. Quelle frotta la verge que son pere luy auoit baillé de la poudre puis en toucha la vache blanche N. Laquelle demeura trois ou quatre iours malade puis mourut & s'estoit pource qu'ils ne luy auoyēt voulu auācer du blé sur la garde des vaches qu'elle & son mary les gardoyent & y aura deux ans auant les moissons prochaines sur ce à confessé auoir mis de ladite poudre au baston au mois de may dernier & en toucha vne vache poil rouge. appartenant a N. pource qu'il auoit dit à chāsis qu'elle auoit mauuais bruit laquelle auoit languï deux iours; puis mourut.

Interroguee si elle ne bailla pas le mal à la N. fille de N. luy ostant vne fourmi qu'elle disoit auoir en la forcelle. R. qu'elle luy osta bien ladite fourmy & qu'elle ne la fit mourir, mais que ce fut la Françoisē Bartou comme elle a déclaré elle enquisē & qu'elle luy auoit baillé à tindre vn foudard dernier, & d'autāt qu'elle disoit qu'il estoit perdu & ne le luy vouloit rendre. mais du gobelet ne fait que c'estoit.

Si elle auoit pas baillé le mal a la fille de N. feignant

gnant d'aller couper sa toille chez ledit N. R. Qu'elle lui bailla vne pōme qu'elle frota de la racine que sō pere luy auoit baillée, de laquelle elle fut malade: l'ayant māgee, il demeura deux iours malade puis manderent querir elle inquisse pour aller couper de la toille qu'elle y auoit, & y alla ayant mis de la racine que son pere luy bailla & s'aboucha sur ladite fille qui guerit.

Interr. Que c'est qui fit tomber le berceau de dessus le berçoir enuiron minuit. Respond qu'elle ne fait qui c'estoit & que c'estoit auant qu'elle eust esté en la sinagogue.

Si elle a pas baillé le mal à deux bouuets de N. Respond. que non.

Inter. Si elle a pas fait mourir de ladite poudre les deux filles de N. Respond que non, & qu'elle n'estoit pas encores forcierre lors.

Inter. à qui d'autre elle a apliqué de ladite poudre. Respond qu'il y a enuiron deux ans qu'elle toucha de la susdite verge y ayant mis de la poudre, & en toucha la chevre d'une sienne tante & ayant languì deux ou trois iours mourut, pource qu'elle ne luy vouloit changer ladite chevre, à vne autre.

Inter. contre qui elle a soufflé avec ladite racine Respond qu'ayant mis de ladite racine en sa bouche elle souffla contre N. de quoy il deuint malade & y demeura quatre ou cinq iours, & pour le guerir luy porta du pain, du vin, des pommes, & frota lesdites pōmes de la racine que son

pere luy auoit baillee pour faire guerir, & en mit aussi tremper dans le vin, puis luy fit boire ledit vin, & manger lesdites pommes, puis guerit, & en le guerissant & sortant de ladite maison, mit le mal sur vne vache diceluy laquelle, deuint malade & ne mourut pas.

Interr. si elle a pas baillé le mal à la fille de N. Respond. que non, & qu'elle entend que c'est N. sa mere dautant qu'elle fait bien qu'elle est Eryge pour l'auoir veüe à la synagogue.

Inter. ou c'est quelle a esté à la synagogue depuis la premiere fois. Respond qu'elle n'y a esté sinon trois fois. Dont la premiere vers le bié, la seconde en la prellie, & l'autre fois au dessus du moulin des bouuets.

Qu'elle declare ceux qu'elle a veus à ladite synagogue. Respond. y auoir veu. N. Son pere, & N. sa mere d'elle inquisse, & plusieurs autres nommez en son proces, & dautres qu'elle ne conoist pas.

Inter. la cause pourquoy elle à tant dilayé à dire verité Respond. pource qu'elle vouloit que sa mere confessast la premiere dautant quelle l'a mis Eryge avec son pere.

Si elle maintiendra bien à sadite mere qu'elle l'a induit avec son pere de la mettre Eryge, & mené en la sinagogue. Respond qu'elle luy maintiendra bien, & surce luy a esté confrontee sadite mere, à qui elle a maintenu qu'elle l'auoit induite de la mettre Eryge avec son pere : & sadite

dite mere a dit qu'il n'estoit pas vray.

Interr. que c'est qu'elle bailla au diable pour recompense. R. qu'elle luy donna vne poule blanche aux prez sous la ville.

Si tout ce qu'elle a cy dessus confessé est bien veritable, & si elle y veut rien adiouster ni diminuer. Respond que tout ce qu'elle a confessé ci dessus est bien veritable & n'y veut adiouster ny diminuer.

Si pour s'estre dōnee au diable & auoir renoncé Dieu son createur & prins le diable pour son maistre & auoir de luy receu de la poudre & racine pour donner des maladies à gens & faire mourir des bestes, elle ne conoist pas qu'elle a offensé Dieu & la iustice, & si pour cela elle ne merite pas punition, corporelle. Respond. qu'ouy & qu'elle en demande à Dieu, à noz Seigneurs, & à Iustice mercy priant nosdits seigneurs, qu'ils en facent iustice, afin que le Seigneur prenne à mercy son ame.

Surce remise à ouir droit.

H. 2.

Les poincts traictez en cete Remonstrance.

1. S'il est permis à l'homme Chrestien de iouer.
2. S'il est permis de iouer à l'argent pour embourser.
3. Touchant les ieux publics & prix qui s'y font.
4. De ceux qui iouent pour boire.
5. Qui sont les ieux illicites.
6. Qui sont les ieux de fort & d'hazard defendus.
7. Que les ieux de hazard sont condamnez par les Payens mesmes.
8. Item par les saincts Peres anciens.
9. Item par l'Escripture sainte.
10. Responce aux obiections de ceux qui maintiennent tels ieux.

REMONSTRANCE

SVR LES IEUX

DE SORT.

MESSIEVRS & treschers freres,
 puis que la dissolution de nostre
 temps n'apperçoit, & n'apprehen-
 de le grand mal qui est au ieu de
 Sort, quel qu'il soit, i'ay aduisé de
 mettre & rediger sommairement par escrit, les
 remonstrances & raisons qui le peuuent faire
 viuement cognoistre, voire voir à l'œil, & tou-
 cher à la main. Or combien qu'il y ait des mo-
 queurs & contempteurs de Dieu, & gens en-
 ragez à courir apres leurs plaisirs, mesmement
 au milieu de l'Eglise Chrestienne, lesquels pa-
 raduventure pour tout ceci ne se corrigeront, &
 pour le regard desquels tout ce labour que nous
 prenons maintenant sera peine perdue: toutes-
 fois si se trouuera-il quelques sages personnes
 & craignans Dieu, qui ayans entendu le mal
 qu'ils font en iouant à tels ieux, s'en chastierôt,
 & ausquels ces remonstrances seront tres-vtiles
 & profitables. Donne instruction au sage, dit
 Salomon, Prouerb. 9. ver. 9. & il deuendra plus
 sage: Enseigne le iuste: & il croistra en doctrine.

Le premier poinct.

ET pour commencer nostre propos, le des-
 cuire par bon ordre & d'où il faut: nous disons

134 R E M O N S T R A N C E

que quelques bons personnages cherchent les choses de plus haut. Car ils demandent, s'il est du tout loisible à l'homme fidele & Chrestien, de iouer à ieu que ce soit. Or leurs raisons sont, Veu qu'il nous faut rendre conte à Dieu de tout le cours de nostre vie, & d'une chacune action d'icelle, ils demandent quel conte nous pourrions rēdre à Dieu du temps que nous perdons à iouer. Et veu qu'il nous faut abstenir de toute parole oisive, de laquelle Dieu nous redarguera, quoy qu'autrement elle ne soit ni iurement, ni blaspheme du Nom de Dieu, mais seulement d'autant qu'elle est oisive & dite pour neant, comme nous enseigne nostre Seigneur Iesus Christ, en S. Matthieu 12, vers. 36. comment (disent-ils) pourrions-nous nous excuser de tout le temps oisif que nous passons quand nous iouons? Il nous faut faire tout ce que nous faisons, grand ou petit, à la gloire de Dieu, dit S. Paul, en la premiere epistre aux Corinthiens, chapitre dixieme, verset trentedeuxieme, Et quand nous iouons, pouuons-nous dire faire cela à la gloire de Dieu? Le mesme saint Paul aux Ephesiens 5, vers. 16, veut que nous rachetions le temps que nous auons perdu en choses mauuaises & sottes lors que nous estions idolatres: estimons-nous donc qu'il nous soit loisible de le perdre au ieu, maintenant que nous sommes appelez à la cognoissance de Dieu? Le temps passé, dit S. Pierre en la premiere epistre chapitre quatrieme
verset

verfet troisieme nous doit auoir fusi, pour acomplir la volonté des Gentils & desbauchez, quand nous conuersions en insolences, concupiscences, iurongneries, gourmandises, beuueries: afin que le temps qui reste en chair, nous ne viuions plus selon les concupiscences des hommes, ains selon la volonté de Dieu. Il y a tant de deuoirs que Dieu requiert de nous par sa Parole, tant de moyēs & saintes occasiōs de no' employer ou à la gloire de Dieu ou au secours de nostre prochain, toutes les heures du iour & de la nuit, voire mesmes quand chacū iour seroit plus long qu'il n'est, & qu'il auroit quarāte six heures: mais qu'au lieu de nous employer à quelques saints offices & meilleures occupations nous-nous amusions à iouer, il semble à beaucoup que cela soit intolerable, & nullement du monde loisible à l'homme, qui se dit estre fidele & Chrestien. Il y a donc la lecture de la Parole de Dieu, puis des bon Auteurs: il y a la consolation des malades, la uisitation des prisonniers, le soulagement des souffreteux, & puis l'occupation qu'vn chacun peut & doit auoir en son estat & vocation particuliere. Tous lesquels & semblables exercice nous sont commandez expressément par la parole de Dieu, en saint Matth. 25. ver. 35. 36. & peu ou pas vn desquels nous ne faisons, & toutesfois nous-nous employons si long temps, & amusons à iouer & folastrer. Certes quelques vns ne peuuent comprendre comme

tout ceci bien considéré, il soit seant ni permis à
 l'homme Chrestien de perdre aucun temps, tant
 peu que ce soit, à iouer. Et pourtāt S. Ambroise,
 tant au 1.liu. Des offices, cha.23, que sur le Pseau.
 118, semble condamner toutes sortes & genres de
 ieux: comme aussi S. Iean Chrysostome en son
 Homilie 6, sur l'Euāgile S. Matth. Toutesfois de
 nostre part nous ne sommes point si rigoureux
 ni scrupuleux que cela: car nous croyons avec S.
 August. au 2.liu. de la Musique, que c'est le deuoir
 d'un homme sage, de quelquesfois se recreer &
 resiouir son esprit, pour pouuoir durer, prendre
 haleine, & reuenir puis apres plus alaigrement à
 son trauail ordinaire. Et pour respondre aux rai-
 sons precedentes, nous disons qu'il faut faire di-
 stinctiō entre les choses dont l'hōme Chrestien
 doit faire estat & ordinaire, & celles qui lui sont
 permises & ottroyees de Dieu, pour le soulage-
 ment de son infirmité: cōme est se reposer estant
 las, dormir apres le trauail, & iouer apres vne lō-
 gue peine. Pourtāt l'Escripture sainte, laquelle est
 la reigle du bien & du mal, fait mētion de iouer,
 & le permet au Chrestien, en Zach.8.ver.5. Aussi
 quand S. Paul 1. Cor.10, ver.31, dit, Soit que vous
 māgiez, soit que vous buuiez, soit que vous faciez
 autre chose, faites tout à la gloire de Dieu: nous
 pouuons sous ce mot de Faire autre chose, com-
 prendre vne honeste recreatiō, qui nous est certes
 autāt licite & permise à cause de nostre infirmi-
 té, qu'est le boire, le manger & le dormir quand
 nous

nous en auōs beſoin. Or comme noſtre Seigneur Ieſus Chriſt mōſtre, en S. Marc 2, ver. 27. que l'hō me eſt fait pour la gloire de Dieu, partant que le Sabbath ſert à l'homme, & non pas l'hōme au Sabbath: ainſi l'honneſte recreation eſt inuētee pour l'homme & pour ſa ſanté, en laquelle eſtans nous ſeruons mieux & plus deuotement à Dieu. Iouer donc à ieux hōneſtes eſt choſe indifferente & licite, & de celles qui ſont (aux Galat. 5. ver. 13.) laiſſees en la liberté Chreſtienne: de laquelle toutes-fois ie confeſſe bien qu'il ne nous faut abuſer, pour le trop grand plaſir en oiſiueté, non plus que d'aucune autre choſe de meſme genre. Et à la verité ce ſeroit vne trop grāde cruauté, de ne vouloir aucunement ottroyer, qu'une nature trop fatigee, ou perſonne trop attediee de trauail, ne ſe peuſt & oſaſt reſiouir. Car combien qu'il falle rapporter toutes & chacunes nos actiōs à la gloire de Dieu, & à l'edification & ſecours de noſtre prochain: toutes-fois quand nous-nous reſiouiſſons honneſtemēt, pour entretenir & conſeruer noſtre vigueur & noſtre ſanté, ou pour repatrier nos forces, ou regaillardir noſtre eſprit, afin que plus gayement & alaigrement puis apres nous vaquions à l'eſtat où il a pleu à Dieu de nous appeller, & le facions mieux: cela redōde en fin à la gloire de Dieu, auquel par ce moyen nous ſeruons plus prōptement, & au bien de noſtre prochain lequel plus aiſément & commodement, eſtans frais & diſpos, nous ſecourons ſelon noſtre

estat. Car l'esprit de l'homme est semblable à vn arc, lequel pour quelque fort qu'il soit, rompt s'il est tousiours tēdu, mais se garde s'il est relasché quelquefois. Nous ne defendons donc & ne condamnons pas tout ieu, & ne trouuons pas mauuais que quelquefois l'hōme Chrestié ioue & s'esbate, pourueu que tel esbat soit en choses licites & honnestes, & avec moderation. Partāt il nous conuient faire vne distinction entre les ieux que les hommes veulent faire, & esquels ils desirent s'esbater (car les vns sont licites & honnestes, les autres non, ains defendus & defraisonnables) esquelles dites deux sortes de ieux soit licite & permis, soit prohibé & mauuais.

Le second poinct.

Nous disons en general, qu'il n'est permis iouer à l'argent, pour gagner & embourser: c'est à dire, ou perdre le siē, ou gagner celui d'autrui. pour estre ferré & en faire gain. La raison de ceci est tresclaire & euidente. Premièrement, c'est que le ieu n'est ni institué, ni permis à quel qu'il soit, pour estre moyen de gagner argent ou l'acquérir, ains seulement pour exercice du corps, ou recreation de l'esprit: tellement que quiconques en vse à autre fin, cestui la n'vse pas du ieu, ains en abuse, change & altere la nature de la recreation en vne espee de gain vilain & nō permis, & partant des honnestes: & lequel soit petit soit grand, l'homme Chrestien doit fuyr & euitter, comme dit S. Paul, 1. Timoth. 3. ver. 8. Dauā-
tage

age le ieu n'a iamais esté receu, pour estre vne sorte de commerce, trafique & alienatiō de nostre bien entre les hommes, soit, que nous considerions la Loy de Dieu, soit celle des hōmes. Entre toutes les loix du monde, qui ont bien au long dechiffré tous les moyēs d'acquérir & posseder iustement le bien d'un autre, celles des Romains, que nous apelons Le droict Ciuil, l'ont fait bien amplement & soigneusement. Mais entre tous les moyens honnestes dont Le droict Ciuil fait mention, le ieu n'y est point recité, ni aucunement cōpris. Il y est biē parlé de cōtract de vête de locatiō: d'emphyteuse & autres sēblables par lesquels nous pouuons iustement auoir & amasser ce qui est à un autre: mais il n'y est fait aucune mention du ieu, ni que par icelui nous puissions rien posseder ou acquérir. Tellement que quiconque prend & retient l'argent d'un autre, pour l'auoir gagné au ieu, le retient sans aucune cause legitime, & partant l'a en mauuaise conscience, & à vrayement dire en est un pur larron. Et si cela est permis, on introduit une auarice, insatiable au lieu de la recreation d'esprit: bref, une affection de se tromper l'un l'autre, au lieu de s'esbatre & resiouir. Gagner donc au ieu est autant que desrober, quoy que les coustumes, loix politiques, vsances mauuaises & corruptions de mœurs fussent au contraire. Combiē que de ma part ie ne sache loy ni coustume qui die autrement que ce que nous disons ici, sauf que la coustume d'Orleans semble

¹40 REMONSTRANCE

permettre de demander iusquès à la somme de cinq sols tournois, si on les a gagez au ieu de paume seulement, pour estre ce ieu principalement vn honneste exercice du corps & industrie d'esprit. Mais cete coustume & permission particuliere, demonstre que la reigle generale est cōtraire, & qu'elle defend en tout autre ieu le gain, lequel elle ne permet demander en iugement ni hors iugement. M. François Hotoman, grand Iurifconsulte & Chrestien, au 2. liure par lui intitulé Des vsures, chap. 2. confirme nostre sentence & aduis: & enseigne que par disposition de Droit, le gain acquis & emboursement fait du ieu, est chose prohibee & condamnable. Et S. Augustin en son epistre 54. escrete à Macedonius, veut que l'argent gagné au ieu soit donné aux pources: afin & que le ioueur perdant soit puni ne retirât point son enjeu, & le gagnant aussi priué de son esperance, n'ayant rien de ce qu'il a mal acquis. Toutesfois ie di qu'il est trefraisonnable, que outre cete perte & l'vn, & l'autre soyent punis par le Magistrat, d'une tresbonne amende, applicable au fisque & recepte publique. Car ie vous prie, quelle raison y a-il de tourner en occasion d'auarice, ce qui a esté trouué pour resjouir & recreer l'homme? que les pources estans en si grand nombre comme ils sont en l'Eglise de Dieu: si indigens & souffreteux comme chacun les void, tant de petis enfans demeurans à instruire

instruire faute de moyens : que celuy qui se dit Chrestien, frere de ces pources, & qui les reconoit pour les membres de nostre Seigneur Iesus Christ, iouë & despense son argët à son plaisir, & que plustost il ne l'aumosne & dōne à ses pources freres, qui cōme dit le Prophete (Esaye 58. vers. 7.) luy sont sa propre chair? Helas ! que tel plaisir nous coustera quelquefois bien cher : & que telle despense nous sera quelque iour deuāt tous les saints Anges de Dieu reprochee, & par les pources & de Dieu mesme, ainsi qu'il est escrit en saint Matt. 25. vers. 44. Voire que les riches milors ayent dequoy boire & manger, & puis iouer à leur plaisir, comme ce malheureux, duquel parle S. Luc 16. vers. 19. & cependant que le pource Lazare nostre frere, meure de faim deuant nostre huis. Auquel mesmes les bestes brutes, selon leur puissance, ont fait aumosne en leichant ses playes : & nous hommes semblables à luy, qui auons dequoy perdre au ieu, ne luy en faisons aucune? Faisons selon le commandemēt du Seigneur, en S. Luc 16. vers. 9. des amis de nostre argent, non pas ceux qui le nous gagnent au ieu (car ils ne nous en fauent aucun gré) mais les pources de Dieu, qui le nous feront rendre au iour de ce grand iugement de Dieu avec vn grād profit & accroist. S. Augustin ne veut & ne permet à aucun fidele, de donner ou porter son argent à vn bastleur & ioueur de farce, combien qu'il nous donne du plaisir par sa peine : moins

le permet il dōc bailler à vn ioueur qui ioue avec nous, & lequel nous esbatons de nostre part, cōme il nous esbat de la sienne. Concluons donc que ce que nous auons dit est vray: assauoir, que le gain emboursé & acquest fait en ieu: est vn pur larcin: & gagner par ce moyen, est vrayemēt de f rober & posséder le biē d'autrui sans iuste cause & en mauuaise cōscience, à quelque ieu que nous ayons gagné, soit honneste soit mauuais & prohibé.

Le troisieme poinct.

Mais afin que personne ne prenne nostre propos autrement que comme nous l'entendons, & que pour estre trop scrupuleux & consciencieux, il vienne à condamner ce qui est licite & honneste, nous faisons deux exceptions en ceci: dont la premiere est, Que nous n'entendons parler des ieux publics ordonnez par le Magistrat, & prix qui s'y font. Car il est permis en tels ieux non seulement de gagner le prix proposé, soit argent, soit vaisselle ou autre chose: mais aussi le ferrer, emporter & posséder comme iuste aquest & n'en faut faire conscience, quand on l'a gagné sans tromperie. Ce dequoy on peut alleguer plusieurs raisons, & bien pertinentes. La premiere, que tels prix & gains sont autorisez par le Magistrat, qui non seulement les aduouë, mais aussi souuent les presente & propose lui-mesme, pour refueiller & exciter l'industrie des hommes. La seconde raison est, que tels ieux publics sont
exercices

exercices instituez & permis, non seulement pour la recreation particuliere de ceux qui y iouent & s'y esbatent: mais qui plus est, pour le bien & utilité commune de toute la republique. Car tels ieux ordinairement sont exercices appartenans, dependans & seruans à la guerre: ausquels il est tresnecessaire que tous ceux qui le peuuent faire s'exercent & s'y façonnent, afin de pouuoir secourir la patrie, au temps qu'il sera besoin. Ainsi de nostre aage est le ieu d'harquebuse, le ieu de l'arc & de l'arbaleste, pour lesquels on dresse des butes publiques, & propose on quelque certain prix, pour vn honneste allechement & recompense de telle industrie, & si profitable à la cōseruation du pays. Et est certes tel gain bien raisonnable, pour dōner meilleure occasion & courage à vn chacun de s'exercer: car (comme on dit) l'hōneur nourrit les arts, & l'industrie des hommes. Mesmes de toute antiquité il y a eu des ieux publics, bien autres toutesfois, & diuers des nôtres: d'autant que les guerres se faisoient aussi autrement de ce temps-la, qu'elles ne se font maintenant. Car n'ayans pour lors, & ne sachans que c'estoit de harquebuses, ils se combatoyent de plus pres, venoyent ordinairement aux mains & se ioignoyent corps à corps, ou bien se battoient pié contrepie, ou se renuersoyent l'un l'autre par terre, comme on lit aux histoires anciennes. Et pourtāt les ieux publics qui anciennement estoient en vsage, estoient plus commu-

nemēt ces cinq fortes: assauoir, la luite du corps, le iect de barre ou d'une grosse pierre, la course à pié ou le fault, le Ceste ou le combat à la barriere la course de cheual ou de chariots, qu'on dit en Latin *Luēta, Disens, Cursus siue Saltus, Cestus, Certamen equestre vel Currule*: comme toutes ces cinq especes sont recitees partie par Homere, li. 8, de l'Odyssée, partie par Vergile, liu. 5, de l'Æneide, partie par vn auteur Grec, nommé Pausanias. Les Romains ont adiousté depuis, La guerre Nauale, qui se faisoit sur le Tibre (cōme apert par ce qu'en escrit Dion) assauoir du temps d'Auguste l'Empereur: parce que pour lors la principale guerre qu'il auoit faite contre M. Antoine, auoit esté en mer. Depuis on a adiousté les Tournois, qui est vn exercice fort dāgereux, & qui n'a point tousiours esté trouué bon & approuué. Mais pour reuenir à nostre propos, la troisieme raison est, que tels gains & prix sont moderez & petits, & sont plustost ordonnez pour estre vn tesmoignage d'honneur & de louange à celui qui les a, qu'un riche acquist & proufit, sentant son auarice: comme cela se peut aisémēt voir par les choses que les anciens proposoyent & donnoyent pour prix, à ceux qui estoient victorieux en tels ieux publiques. Car il y auoit ces quatre choses qui leur estoient donnees pour recompēse, qui estoient de peu de valeur: assauoir vne branche d'oliuier, ou d'un arbre qu'on nomme Pin: ou quelquefois les prix estoient seulement

ment de pommes, ou de la hache, & persil, comme recite Plutarque, liure 5. quest. 3. & liure 8. quest. 4. des Symposiaques. Depuis on a accreu ces prix-la excessiuelement.

Le quatrieme poinct.

Quant à la seconde exception qu'il faut faire en ceci, c'est touchât quelque petite somme d'argent qu'on a iouee, non pour embourser ou seruer, mais pour boire ensemble. Car par ce moyē tel gain n'est pas gain ni acquest, veu qu'il est despendu sur le chāp, & reuient mesme en partie au profit du perdant, qui en boit sa part: puis aussi que c'est plustost vn petit escot & collation que le perdant dōne à la compagnie, qu'autre chose. Ce qui se fait par courtoisie & amitié, & pour entretenir la societé humaine & compagnie des hommes les vns avec les autres, & non pour autre fin. Et pourtāt telle somme qu'on ioue pour boire, doit estre fort petite & moderee: car autrement le tout est excez à condamner, & à punir par le Magistrat qui veut faire son deuoir.

Le cinquieme poinct.

OR venons maintenant à exposer qui sont les ieux prohibez, & illicites. A quoy ie respon, qu'il y en a de plusieurs sortes. Et di en premier lieu: que tous ieux que la Loy & la coustume du pays où tu es, condamne & ne permet, sont illicites. Car cōme ainsi soit que la liberté Chrestienne consiste en choses indifferentes, comme est iouer, ou ne iouer pas: telle liberté est limitee & faite scandale, apres la defense publiquement

faite d'vser d'icelles. Quand telle defense est fondee sur quelques cōsideratiōs honnestes & saintes, qu'a eu la Loy qui les a prohibees, il n'est permis en ce lieu-la d'en vser. En second lieu, ie di, & appelle tous ieux illicites, où il y a propos ou atouchemens lascifs, dissolus, ou deshonestes, soit en effect, soit seulement en paroles, ou en apparence: car S. Paul en la 1. aux Theff. 5. chap. ver. 22. veut, que mesme nous-nous absteniōs de toute apparence de mal. Tellement que tous ces sales ieux de tonnebris, & autres semblables, doiuent estre dechassez loin de la compagnie des Chrestiens. Car ils sont allumettes, ou plustost gros flambeaux & aproches d'une vilaine & secrette paillardise.

Item & en troisieme lieu, tous ieux sont illicites & mauuais, qui sont ieux de Sort: c'est à dire, où on vse du Sort, pour obtenir le gain & victoire de tel ieu. Sous cete espeece sont principalement compris les ieux de Cartes & de Dez: qui pour cete raison sont meschans, dangereux & illicites, soit en priué ou en public, soit entre gens de lettres, soit entre artisans, soit en paix, soit en guerre. Car le Sort & l'vsage d'iceluy en nos ieux, est chose condamnée & par les hōmes qui appellent tels ieux *Alea*, & aussi par la sainte & sacree Parole de Dieu. Nous François en ce temps, comprenons & entendons ordinairement tous ieux de Sort, sous ce mot de Cartes & de Dez: combien que les anciens en auoyent de plusieurs autres espees, comme le monstre Iulius Pollux

Pollux, en son liure 8. De la nomenclature, chapitre dernier.

Le sixieme poinct.

Mais les ieux où on vse de Cartes ou de Dez: ne semblēt estre d'une mesme nature. Car les vns sont où l'industrie du ioueur semble pouuoir beaucoup pour emporter la victoire, & qui de faict semblent n'estre entierement dependās de l'euenemēt du Sort: les autres sont où la victoire depend totalement du Sort cōme est la condamnade, nō per en dé, la chanse, le xxxi. & quelques autres ieux de cartes ou de dez sēblables. Quelques vns suiuant & considerant ceste distinction pēsent qu'il n'y ait que ceste sorte de ieu de Sort, où la victoire depend entieremēt du Sort & de son euenement, qui doyuent estre defendus, & que c'est le seul ieu de Sort que nous deuōs condamner. Car il faut necessairement prendre ce que le dé ietté ou la carte distribuee, donne & amaine: & pourtant on les mesle & les remue on. Autrement, de pouuoir faire venir par industrie le poinct & la carte qui t'est necessaire pour gagner, est vne vraye tricherie & piperie, qui mesme est contraire à la nature du ieu de Sort, & pour laquelle grosses noises & debats sourdent entre les ioueurs, quand elle est aperceue: & qui est aussi condamnée par les Payens, comme il appert par l'histoire de Darius le premier, & d'un certain Temenus, dont parle Pausanias en ses Messeniaques. Parquoy ie conclu, que tous

tels ieux sont purement ieux de hazard: car pour iouer le droit du ieu, il faut laisser au dé ou à la carte, de nous donner ce que ils voudront: & quoy que nous le voulions puis apres agencer, corriger & accōmoder, nous ne pouuons. Dont aduient que la victoire purement tombe où le dé & la carte le donnent, & non pas où l'industrie du ioueur l'adresse. Les anciens aussi ont appelé sans distinction tels ieux, Ieux de sort, ou de hazard: car le ieu de hazard, comme ils le définient, est tout ieu où le cas fortuit, & euenement du Sort caché & incognu donne & apporte la victoire. Tout ieu donc ou l'euenement ne peut estre apperceu ni notoire mesmes aux ioueurs, est ieu de hazard. Or ceci estant maintenant entendu, voici ce que nous disons, ascauoir, Que sans difficulté, & du consentement de tous auteurs Chrestiens tous ces ieux purement de Sort, de quelque nom qu'on les desguise, sont mauuais: & pourtant ne doyent estre permis, ni tolerez en l'Eglise de Dieu, par ce qu'ils sont cōpris sous le nom mauuais & ancien Alea. Et quant aux autres, ou l'industrie du ioueur semble pouoir beaucoup pour dōner la victoire, combien que quelques vns semblēt ne les vouloir si generalēmēt condāner tant y a que nous voyons cōme les hommes (depuis qu'une fois ces ieux leur sont permis) s'y adonnent, & y employent les heures, qu'ils deuoyent donner aux autres hōnestes actions & necessaires, comme à lire la parole de Dieu, & exercice de leurs estats & vocations & pourtant

pourtāt nous ne conseillerons de les permettre. Mais quant à la premiere espeece, que nous disons ieux entierement de Sort, nous les condamnons absolument, & nen faut disputer. Toutesfois afin qu'vn chascun en puisse mieux estre satisfait, & notamment tous Chrestiens en ayent plus grād honte, & avec moy les condānent sans tergiuer-
 fation, ie di premierement qu'ils sont reprouuez & condamnez mesmement par les Payens encor qu'ils n'eussent si grāde lumiere des choses bōnes & mauuaises, que nous auons nous Chrestiens.

Le septieme poinct.

Qu'ainsi ne soit, Cicerō (Philipi. 2) a reproché en plein Senat, à Marc Antoine, pour vn des plus horribles crimes qu'il luy peut ietter au nez, qu'il iouoit au ieu de Sort & de hazard. *Alea*, dit Ciceron, c'est à dire, selon nostre temps, au ieu de Cartes & de Dez. Suetone escrit en la vie d'Auguste, chap. 71, que le seul bruit qui couroit, que ledit Auguste iouoit à tels ieux, luy fut tourné à grād blasme : & le fit reputer desbauché, nonobstant plusieurs grādes vertus qu'il auoit. Claude Cesar, Empereur Romain, donna tesmoignage d'estre vn fol & hebeté, tant par ses autres vices, qu'aussi parce qu'il iouoit ordinairement aux Cartes & aux Dez. Gobilon Lacedemonien, estant enuoyé à Corinthe, pour faire treues avec les Corinthiēs s'en retourna tout court sans rien faire avec eux, pour les auoir veu iouer à tels ieux, disant qu'il n'estoit point seant d'auoir aucune accointance avec gens si desbauchez & de neant. Le Roy des

Perſes enuoya à Demetrius Roy d'Asie, des dez d'or, pour le taxer de folie, de legereté & de fait-neādise. Afconius Pedianus, ſur la 2, Diuination, eſcrit que tels ioueurs eſtoient cōdamnez ancientemēt à Rome, au quadruple de ce qu'ils auoyēt ioué, pour peine & punition de tel ieu. Il y auoit meſme vne Loy nommee *Rofcia*, qui banniſſoit du pais ceux qui auoyēt perdu en ce ieu, plus que la cōdition de leur perſonne & eſtat ne portoit. Et comme Platon en ſon conuiue eſcrit tresbien & tresveritablement, que les ioueurs de farce & d'inſtrumens qu'on auoit es banquets apres ſouper, eſtoit vn maigre paſſetemps de gens beſtes & ignorans, qui ne ſauoyent s'employer à choſes meilleures: auſſi nous en deuons dire autant, & à meilleure raiſon, de tous ioueurs de Cartes & de Dez. Bref, qu'eſt-il neceſſaire de tant d'allegations? Vne ſeule Loy des Romains, qui eſt encor aujourdhui aux Digeftes, le nous mōſtrera aſſez. Elle eſt eſcrite au 9, liure des Digeftes, titre 5, & eſt la premiere en nombre: laquelle dit ainſi, Si quelcun a battu celuy chez lequel on a ioué aux Cartes & aux Dez, ou luy a fait quelque tort: ou ſi durant le temps qu'on iouoit chez luy quelque choſe luy a eſté priſe, ou deſrobée en ſa maiſō, ie ne luy en feray aucune iuſtice, dit le Preteur. Si quelcun a cōtraint vn autre à y iouer, ie le puniray ſelon l'exigence du cas. Voila la Loy. Tellement que ce qui eſt gagné & preſté au ieu, ne ſe peut demander en iugement ni hors iugement: tant ce ieu a eſté eſtimé par toutes bonnes Loix, vilain

vilain, mauuais & detestable. Et pour cete occasiō, Iuuenal en sa Satyre 14, le met entre les vices qui plus aisément corrompent toute la famille, & qui sont de plus mauuais exemple en vne maison bien reglee: disant,

*Si le pere vieillard prend la carte ou le dé,
Si deuant ses enfans il s'en est aidé:
Son enfant puis apres les prend & s'en escrime,
Et imite l'enfant de son pere le crime.*

Venons plus auant, & considerons ce que les Empereurs Chrestiens en ont ordonné par leurs edits, ainsi qu'il appert au liu. apelé Le Code, li. 3, titre 43. L'empereur Iustinian ne parle-il pas ainsi? Ayât esgard au bien de noz subiets, nous prohibōs par ceste Loy, en tous lieux & à toutes sortes de gēs, de iouer ni es maisons publiques, ni es maisons priuees, aux ieux de Cartes & de Dez, ni mesme d'en estre spectateur. Et dōne charge par la mesme Loy, aux Euesques, & Pasteurs d'y prendre songneusement garde: & leur enioinct, que pour reformer ce mal, ils employent les forces & autorité des iuges & gouuerneurs de leurs provinces: cōme cela est specifié en l'Authentiq. de Sacros. episc. §. Interdicimus. Tāt les incōueniēs de ces ieux, ont tousiours esté experimentez & mauuais, & grands, cōme sont pertes de bien, blasphemés du Nō de Dieu, & autres cōsequēces trespernicieuses, qui sont là amplement recitees. Mais le Droit appellé Droit Canon, a-il eu ce ieu moins en detestation de sa part, quoy que desia les mœurs de l'Eglise fussent merueilleusement

corrompues? Certes nenni. Car en la distinction 35, au canon Episcopus, tout rondemēt & à plat il est condamné: & au chap. Clerici aux Decretal. sous le titre 1, du 3, liu. semblablement condamné. Tellement que bons & mauuais tous d'une commune voix, l'ont detesté, comme estant vne telle sentence & condamnation, mesme la voix de nature, tāt ce ieu est infame, perilleux & mauuais de foy. Et pour la consequence & effets, ie di, qu'il a perdu mesmement les Rois d'Asie, & leur estat,

Le huitieme poinct.

Mais si les Payens l'ont condamné, pensons-nous que les Chrestiens en aient moins fait, & l'aient eu moins en horreur? Voire encores plus Car pour commencer des son origine, & parler de son premier auteur le bon pere S. Cyprian dit ce ieu estre vne inuention du diable: & pourtant il le condāne, & à bon droit. Car toute inuētion du diable est maudite & ne doit estre entre nous Chrestiens. Aux Canons des Apostres, ainsi appelez & tenus bien anciens, ce ieu est prohibé & reietté du tout, cōme il appert en l'article 41, & 42 tellement que quand nous voudrons bien considerer le tout, nous trouuerons qu'en tous aages, & de toutes personnes, ce malheureux & detestable ieu & ioueurs de Cartes & de Dez, sōt & ont esté tousiours condānez, reietez & abominables. Mais pour le mieux faire entendre, il nous faut amener des raisons: afin qu'en toutes sortes ces opiniaistres soyent conueincus. En quoy pour ne sembler estre seuls qui le condānons, nous disons
qu'un

qu'un docteur nommé Nicolas De-Lyra, allegue en un sien petit liu. nommé Præceptorium, neuf raisons: pour chacune desquelles il doit estre prohibé entre les Chrestiens, & exilé de l'Eglise de Dieu. Mais nous en dirons ici d'autres encores, aussi & autant pregnantes & receuables: par lesquelles tous hommes craignans Dieu, pourront conoistre que ce ieu n'est ni licite ni tolerable.

Le neuſieme poinct.

Premièrement il est ordonné contre l'expresse defense de Dieu, qui est au troisieme commandement mis en la Loy, en ces mots, Tu ne prèdras point le Nom du Seigneur tō Dieu en vain. Or quicōques vse de sort en chose ridicule, oisive, & qui ne sert qu'au seul plaisir futile de l'hōme: cestui-la ne prèd il pas le Nom & la prouidēce de Dieu tout euidemment en vain? Car le Sort est l'un des principaux tesmoignages de la puissance de Dieu: dautāt (comme il est escrit aux Pro. 16. ver. 33. & 18. ver. 18.) qu'il est regi & gouverné immediatemēt par sa main, puissance & prouidēce. Et pourtant il ne se faut seruir de Sort ainsi ridiculemēt, comme pour tēter Dieu & voir le soin qu'il a du mōde: ains en chose de grāde cōsequēce, & où sa volōté doit estre cōme extraordinairement sçeuë & entēdue: comme en partages de biēs, electiōs de Magistrats & telles choses, pour oster toutes quereles & corruptiōs de voix: & nō en choses de neant, comme si nous faisons Dieu vallet de nos plaisirs & risees, & voulions sauoir s'il en a soin. 2 Secondement, ce ieu est institué

154 R E M O N S T R A N C E

contre la vraye nature & fin de ce que nous apelons en François Ieu, & en Latin *Ludus*. Et pourtant le ieu de cartes & de Dez, est vne vraye corruption d'une sainte permission de Dieu, & du vray ieu & hōneſte. Car tout ieu est receu & inſtitué entre les hōmes, pour deux fins ſeulement: aſauoir, ou pour l'exercice du corps (choſe a quoy le ieu de dez & de cartes du tout contraire, eſtāt vn ieu d'hommes oiſifs, faineans & touſiours aſſis:) ou bien le ieu doit ſeruir pour la recreation de l'eſprit & de noſtre induſtrie, à quoy le ieu de Sort eſt auſſi entierement repugnant & cōtraire. Car là il n'y a aucun contentement de noſtre induſtrie, ains dependons ſeulement d'un petit point de Dez ou de Cartes: tellemēt que celuy qui gagne eſt autant eſtonné & mal aſſeuré, que celuy qui perd: car l'eſprit eſt touſiours attēdant l'euenement du Sort, ſans contentement, ſinon d'auarice quād nous gagnōs. Auſſi on void que plus on ioue à tels ieux, plus on y veut iouer: & partant n'a point de contentement d'eſprit, cōme les autres ieux hōneſtes & licites. 3 Tiercemēt, la deſenſe qui en eſt faite par les Loix ciuiles & Ediēt, des Magiſtrats, rend ce ieu ſcandaleux, mauuais & illicite, quand ores de ſa nature il ne le ſeroit. Or S. Paul en la 1. aux Corinth. 8. ver. 13. dit ainſi, Quand il me faudroit abſtenir tout le temps de ma vie de chair, de peur de ſcandalizer mon prochain, ie le doy faire: à plus forte raiſon nous deuōs-nous abſtenir, à cauſe du ſcādale, de ce ieu, qui n'eſt aucunement neceſſaire pour la
vie

vie de l'homme, ni de pareille cōmodité que l'usage de la chair: dont S. Paul toutesfois veut que nous nous absteniōs, si besoin est. Car il y a autre moyen de se resiouir & esbatre, qu'à ces ieuX-la.

4 Davantage, l'Esprit de Dieu nous cōmande (Ephe. 5. ver. 16, & Colof. 4. ver. 5.) de racheter le temps perdu par nous en choses de neant & oisives, & d'employer celui qui se presente, en choses bonnes, saintes & d'edification: d'autant que les iours sont mauuais. Car quand Dieu nous dōne le loisir ou de lire en sa Parole, ou de visiter les pources, consoler les affligez, & de faire choses pareilles, il le faut prendre vistement: parce que tout incontinent vn empeschement non preu peut suruenir, qui nous en destourne: mille afflictions nous sont presentees, & est bien difficile de recouurer ce qu'on a laissé ainsi legerement passer. Mais ie vous prie, est-ce bien employé le temps & le loisir que Dieu nous donne de bien faire, que de le perdre en ieuX de dez & de cartes que nous auons demonstté tant scandaleux.

5 Puis la cagnardise & friandise de ce ieu, est sur tout grande & miserable: car il n'y a ieu qui afriande & acharne plus l'homme à iouer, qu'il fait. Et la raison en est toute euidente: car le perdant qui fait sa perte ne luy estre aduenue par l'industrie du gagnant, ains du seul hazard & sort qui luy a dit mal pour ce coup, espere recouurer son argent par le mesme Sort, qui se peut chāger, & qui de sa nature est variable. Partant il poursuit & attend qu'il luy soit plus fauorable, telle-

156 R E M O N S T R A N C E

ment qu'il reioüe & continue, eſperant & attendant la faueur & changement du dé ou de la carte: de ſorte que ce ieu eſt le propre ieu des faineas & cagnards. Mais au ieu d'induftrie, l'occafion de la perte ſe cognoit aifément & tout euidement: & pourtāt celuy qui ſe void le plus foible & moins apris, incōtinēt ſe retire & laiſſe le ieu.

6 Que diray-ie de l'auarice inſatiable qui eſt en ce ieu, quād toutes les deux parties taſchent à gagner l'argent l'vne de l'autre, ou pluſtoſt à ſe ruiner? & pourtant S. Paul Ephes. 4. verſ. 14. prend ce mot meſme de ce ieu de dez pour trōperie & choſe meſchante, taſchent auſſi à ſe tromper l'un l'autre? Que diray-ies groſſes & exceſſiues pertes, qui de tout temps y ont eſté faites, & ſ'y font encores aujourdhui? Les vns iouēt leurs cheuaux les autres leurs habits, les autres à la fin tout leur biē, ſans ſe pouuoir retirer de ce ieu premier que d'auoir tout perdu, ſi coquin & friant eſt ce ieu de ſa nature plus que nul autre ieu: & d'aucuns (comme on dit) ioueroyēt & perdroyēt leur cul ſ'il ne leur tenoit, tant ce ieu afriāde & eſchaufe les ioueurs.

7 Brief, les maudiſſons, diableries, ſermens, iuremens & blaſphemes du nom ſaint & ſacré de Dieu, y ſont toutes communes & ordinaires: & tellement ordinaires, que le ieu de cartes & de dez n'eſt point ſans cela: cōme meſme les Loix declarent telles conſequences de ces malheureux ieux eſtre aduenues de tout temps, & le voyons encores aujourdhui. Et pourtāt les Loix conſiſquēt le lieu meſme où on a ioué, com

toſt

me estant tel lieu vñ estable de pourceaux, plus-
 tost qu'une maison digne, où hōme viuāt habite
 à l'aduenir, pour le mal qui s'y fait ordinaiemēt.
 Mais quoy? Je pourroye alleguer infinies autres
 circonſtāces & raisons propres, & particulieres
 à ce detestable ieu: mais ce que nous auōs dit iuf-
 ques ici suffira, à mon iugemēt, aux gens de bien,
 qui sont debonnaires & dociles. Car quant aux
 reueſches, rien ne les peut contenter: & ont plus-
 tost beſoin d'une amende & priſon, que d'une
 remonſtrance.

Le dixieme poinct.


Toutesſois pour leur fermer entierement la
 bouche, ie reſpōdray à certaines raisons & folles
 obiectiōs qu'ils font, & ameinēt pour ſe deſēdre.
 En premier lieu ils diſent ce qui eſt eſcrit en l'E-
 cleſiaſte 7, v. 17. que il ne faut eſtre ſi iuſte, ni ſi ri-
 goureux & ſuperſtitieux: car cela eſt ramener les
 ſuperſtitiōs, & oſter la liberté Chreſtienne: à quoy
 ie reſpō, que S. Paul cōmande aux fideles de ſ'ab-
 ſtenir nō ſeulement de ce qui eſt mauuais en ſoy,
 (en la 1. aux Theſſ. 5. v. 22.) mais meſme de toute
 aparēce de mal. Or ces ieux qui ſont de Sort, cō-
 me nous auōs monſtré, ou qui en dependēt, ſont
 choſes mauuiſes, & non ſeulement aparētes: par-
 tāt ce ſeroit eſtre trop diſſolu de les aprouuer ou
 permettre. Et de fait, quelle trop grāde ſeuerité,
 rigueur & auſterité de vie enioint-on aux Chre-
 ſtiens, en leur permettāt honneſtemēt & mode-
 rément iouer & ſ'eſbatre à tous autres ieux, qui
 ſōt ou d'induftrie d'eſprit, ou auſſi pour vn ſain

& moderé exercice du corps? Chrysoft. au 1. sermon & homelie par luy faite sur les dissolutions de son temps, respondât à pareille obiection, dit que quād on retrāche de la vie des fideles les choses qui y sont superflues, on ne les reduit point à trop grande austerité de vie. Bref, mesme es choses indifferentes, la liberté Chrestienne doit estre suieſte aux loix politiques du pays, & à l'edification du prochain: tāt s'en faut qu'en choses si pernitieuses, on se doive donner licence & cōgé. Ils disent en 2. lieu, qu'ils n'y voyent nul mal, iouant à ces jeux sans iurer, sans se courroucer & sans auarice. Je respon aussi, que s'il y a du gain couché ou de l'argent, qu'il n'est possible qu'ils y iouēt sans auarice & sās desir du gain: qui est desia vne chose deshōneſte, & comme nous auons mōſtré, du tout illicite. Et quant à alleguer, qu'ils n'y voyent aucun mal: outre ce que le mal y est assez & trop grand en vſant du Sort cōme nous auons dit, il y a aussi cete responce preſte, Que la fin & iſſue de tels jeux, monſtrēt le mal & misere qui y est. Partant sur ceci & sur tels jeux, est bien notable ce que dit Salomon aux Prou. 14, ver. 12, & 13. Il y a voye qui semble droite à l'homme: mais l'iſſue d'icelle sont voyes de mort. Mesme en riāt le cœur sera dolent, & la fin de ioye est tristesse. Le cœur desbauché sera puni de ses voies, & l'hōme de bien sera separé de luy. C'est donc à leur auis qu'il n'y a point de mal: car ils sont trāsportez de leurs afections, mais l'iſſue mōſtre bien qu'il y en a par trop, & pourtāt les gens de bien y entrouuent.

uent. Ils alleguent qu'il n'y a que les berlâs, c'est à dire les maisons, l'ordinaire, & la coustume de iouer: condamnez: & non pas d'y iouer quelque fois en son priué. Mais ie respon au contraire, que c'est le ieu mesme que la Loy appelle *Alea*, qu'elle condâne, & non seulement les maisons où l'on fait vne coustume de iouer. Et d'où vient la coustume & ordinaire de iouer, que de ce qu'on aura vne fois commencé à ce faire, & manier les cartes & dez, mesmes en son priué & en sa maison? De dire qu'il y a vne vertu nommee Cortoisie, & *Entrapelia* en Grec, qui consiste à iouer & se recreer avec les hommes: il est vray. Mais telle vertu ne nous permet pas de iouer à ieux detestables avec eux, cōme sont ces ieux de Sort, c'est à dire de cartes de dez: ains seulement ceste vertu nous permet esbatre aux ieux hōnestes & licites, cōme d'eschez, & autres semblables, mesmes en tant que besoin est & moderémēt. Bref, ils demandent où il est parlé du ieu de Sort, pour le condāner ainsi aspremēt. Aufquels ie respon, qu'il y a deux passages expres en l'Escripture qui en font mētion, avec la plus grāde detestation du mōde: l'un est au vieux Testament, asauoir au Pseu. 22. ver. 19, & l'autre au nouueau, en S. Iean. 19, où il est parlé du ieu auquel le saye de nostre Seigneur Iesus Christ fut ioué. Et est dit notāment que ce fut à ce beau ieu de Sort: pour nous mōstrer que l'Eglise de Dieu sera premierement desbauchee par tel ieu & façon, & qu'il fera la premiere breche, pour venir puis apres à toute autre dissolu-


tion. Et pour conclurre cete Remonstrance, ie
 veux alleguer le dire de ce bõ pere S. Cypriã, qui
 en son liure escrit contre ces ieu, dit, Que le ieu
 de Cartes est inuention du diable: laquelle il in-
 uenta & forgea, pour tousiours mieux mettre l'i-
 dolatrie en plus grãd vsage & recõmandatiõ en-
 tre les hommes. Car les Rois & images que nous
 voyõs peints auiourd'hui dedãs les Cartes, etoyẽt
 anciennement idoles & images d'idoles: que les
 hõmes qui depuis se sont nõmez Chrestiens, ont
 changees & apellees Charlemagne, Laneelot du
 Lac, & d'autres nõs semblables, pour ne sembler
 estre idolatres: retenant toutesfois le mesme ieu
 & la mesme inuẽtion du diable: mais ils l'ont fait
 pour farder & desguiser mieux ce mal, & courir
 vne chose meschãte sous ces braues nõs. En som-
 me, il n'y a vsure quelle qu'elle soit si grande ni si
 enorme, que le gain fait en ce ieu: ou non seule-
 ment on gagne tout en vn moment & sans rien
 prester, mais aussi autant cõme le sort principal
 se monte. Partant estans ces ieu si cõtraires à la
 Parole de Dieu, si pernitiex & meschans, & de
 si dangereuse origine & consequence, il nous en
 faut entierement garder & abstenir.

F I N.



tion. Et pour conclurre cete Remonstrance, ie
 veux alleguer le dire de ce bõ pere S. Cypriã, qui
 en son liure escrit contre ces ieux, dit, Que le ieu
 de Cartes est inuention du diable: laquelle il in-
 uenta & forgea, pour tousiours mieux mettre l'i-
 dolatrie en plus grãd vsage & recõmandatiõ en-
 tre les hommes. Car les Rois & images que nous
 voyõs peints auiourd'hui dedãs les Cartes, etoyẽt
 anciennement idoles & images d'idoles: que les
 hõmes qui depuis se sont nõmez Chrestiens, ont
 changees & apellees Charlemagne, Laneelot du
 Lac, & d'autres nõs semblables, pour ne sembler
 estre idolatres: retenant toutesfois le mesme ieu
 & la mesme inuẽtion du diable: mais ils l'ont fait
 pour farder & desguiser mieux ce mal, & couvrir
 vne chose meschãte sous ces braues nõs. En som-
 me, il n'y a vsure quelle qu'elle soit si grande ni si
 enorme, que le gain fait en ce ieu: où non seule-
 ment on gagne tout en vn moment & sans rien
 prester, mais aussi autant cõme le sort principal
 se monte. Partant estans ces ieux si cõtraires à la
 Parole de Dieu, si pernitiẽux & meschans, & de
 si dangereuse origine & consequence, il nous en
 faut entierement garder & abstenir.

F I N.



plw. l.
from adw.
Cost: \$1.50
(6c.)